



JABATAN PERDANA MENTERI
JABATAN AUDIT NEGARA



LAPORAN KETUA AUDIT NEGARA 1/2026

**AKTIVITI KEMENTERIAN/JABATAN/
BADAN-BADAN BERKANUN PERSEKUTUAN
DAN PENGURUSAN SYARIKAT
KERAJAAN PERSEKUTUAN**



JABATAN AUDIT NEGARA





JABATAN PERDANA MENTERI
JABATAN AUDIT NEGARA

LAPORAN KETUA AUDIT NEGARA 1/2026

**AKTIVITI KEMENTERIAN/JABATAN/BADAN-BADAN
BERKANUN PERSEKUTUAN DAN PENGURUSAN
SYARIKAT KERAJAAN PERSEKUTUAN**



JABATAN AUDIT NEGARA

120
1906 - 2026
TAHUN

ISSN 2805-5241



Untuk maklumat selanjutnya sila hubungi:

Ketua Audit Negara
Jabatan Audit Negara Malaysia
Blok F2 & F3, Kompleks F
Lebuhraya Perdana Timur, Presint 1
Pusat Pentadbiran Kerajaan Persekutuan
62000 Putrajaya
MALAYSIA

Laman web: <https://www.audit.gov.my>
Emel: jbaudit@audit.gov.my
Tel: +603-8091 1000
Faks: +603-8091 1454

Hak Cipta Terpelihara ©

Semua Hak Terpelihara. Tiada mana-mana bahagian jua daripada penerbitan ini boleh diterbitkan dan disimpan di dalam bentuk yang boleh diperoleh semula atau disiarkan dalam sebarang bentuk elektronik, mekanikal, fotokopi, rakaman dan/atau sebaliknya tanpa mendapat izin daripada Urus Setia Jabatan Audit Negara Malaysia.



Dicetak Oleh
Percetakan Nasional Malaysia Berhad
Kuala Lumpur, 2026
Laman web: www.printnasiona.com.my
Emel: cservice@printnasiona.com.my
Tel: 603-9236 6895
Faks: 603-9222 4773

KANDUNGAN

	Muka Surat
PENDAHULUAN	1
RINGKASAN LAPORAN KETUA AUDIT NEGARA SECARA INFOGRAFIK	7
BAHAGIAN I - AKTIVITI KEMENTERIAN/JABATAN/ BADAN-BADAN BERKANUN PERSEKUTUAN	
1. Pengauditan Program Penyelidikan, Pembangunan, Pengkomersialan dan Inovasi (R&D&C&I)	17
2. Pengauditan Pematuhan Perbelanjaan Projek Pembangunan MyDigital ID oleh MIMOS Berhad	57
BAHAGIAN II - SYARIKAT KERAJAAN PERSEKUTUAN	
3. Pengauditan Badan Lain Termasuk Syarikat Kerajaan Persekutuan Melalui Sistem e-SelfAudit	77
- Pencapaian Mandat dan Objektif Penubuhan Syarikat	85
- Aspek Tatakelola	93
- Prestasi Kewangan Syarikat	103
BAHAGIAN III - PENGURUSAN SYARIKAT KERAJAAN PERSEKUTUAN	
4. Pelaburan Hartanah Berhad	123
BAHAGIAN IV - STATUS TINDAKAN BAGI ISU YANG DILAPORKAN DALAM LAPORAN KETUA AUDIT NEGARA BAGI AKTIVITI KEMENTERIAN/JABATAN DAN SYARIKAT KERAJAAN PERSEKUTUAN	
- KEDUDUKAN SETAKAT 31 DISEMBER 2025	167
PENUTUP	171
AKRONIM DAN SINGKATAN	175

PENDAHULUAN

JABATAN AUDIT NEGARA

120
1906 - 2026
TAHUN

PENDAHULUAN

1. Perkara 106 dan 107 Perlembagaan Persekutuan dan Akta Audit 1957 [*Akta 62*] menghendaki Ketua Audit Negara mengaudit penyata kewangan, pengurusan kewangan serta aktiviti kementerian/jabatan/agensi Kerajaan. Laporan mengenai pengauditan yang dijalankan hendaklah disediakan dan dikemukakan Laporan mengenainya kepada Duli Yang Maha Mulia Seri Paduka Baginda Yang di-Pertuan Agong untuk mendapatkan perkenan supaya laporan itu dibentangkan di dalam Dewan Rakyat.
2. Pengauditan pengurusan badan lain dan syarikat Kerajaan Persekutuan serta Negeri pula dilaksanakan selaras dengan peruntukan kuasa Ketua Audit Negara di bawah Perenggan 5(1)(d) Akta Audit 1957 [*Akta 62*]. Perenggan ini memperuntukkan kuasa kepada Ketua Audit Negara untuk mengaudit badan lain termasuk syarikat yang didaftarkan di bawah Akta Syarikat 2016 [*Akta 777*] dahulunya dikenali sebagai Akta Syarikat 1965 [*Akta 125*] yang menerima pemberian, pinjaman dan jaminan daripada Kerajaan Persekutuan atau Negeri. Kuasa ini juga meliputi sesebuah syarikat yang lebih daripada separuh modal syer berbayar dipegang oleh Kerajaan Persekutuan, Kerajaan Negeri atau Agensi Kerajaan. Selain itu, Perintah Audit (Akaun Badan Lain) (Pindaan) 2024 [*P.U. (A) 331/2024*] menyenaraikan syarikat-syarikat yang boleh diaudit.
3. Laporan Ketua Audit Negara 1/2026 ini meliputi empat bahagian seperti berikut:
 - 3.1. Bahagian I: Aktiviti Kementerian/Jabatan Kerajaan Persekutuan - Laporan ini mengandungi hasil pengauditan prestasi terhadap aktiviti kementerian/jabatan/agensi untuk menilai sama ada sesuatu aktiviti dilaksanakan dengan ekonomik, cekap dan berkesan bagi mencapai objektif yang ditetapkan;
 - 3.2. Bahagian II: Syarikat Kerajaan Persekutuan – Laporan ini adalah berkaitan pengauditan terhadap 852 Syarikat Kerajaan Persekutuan melalui Sistem e-SelfAudit;
 - 3.3. Bahagian III: Pengauditan Pengurusan Syarikat Kerajaan Persekutuan - Laporan ini mengandungi hasil pengauditan terperinci terhadap syarikat Kerajaan Persekutuan; dan
 - 3.4. Bahagian IV: Status Tindakan Susulan - Status tindakan bagi isu yang dilaporkan dalam Laporan Ketua Audit Negara bagi Aktiviti Kementerian/Jabatan dan Pengurusan Syarikat Kerajaan Persekutuan (kedudukan setakat 31 Disember 2025).

4. Pengauditan aktiviti kementerian/jabatan telah dibuat terhadap dua program/projek iaitu Program Penyelidikan, Pembangunan, Pengkomersialan dan Inovasi (R&D&C&I) dan Pengauditan Pematuhan Perbelanjaan Projek Pembangunan MyDigital ID (Projek MyDID) oleh MIMOS Berhad. Pengauditan dilaksanakan untuk menilai pengurusan program R&D&C&I Kerajaan telah dilaksanakan dengan ekonomik, cekap dan berkesan dan menilai perbelanjaan Projek MyDID dibuat secara teratur mengikut tadbir urus dan skop perjanjian.

5. Pengauditan melalui Sistem e-SelfAudit yang telah diluncurkan buat julung kalinya pada bulan Februari 2025 merupakan inisiatif melibatkan 1,856 Badan Lain termasuk Syarikat Kerajaan melalui Perintah Audit (Akaun Badan Lain) 2024 [*P.U.(A) 331/2024*] yang berkuat kuasa pada 1 November 2024. Pelaporan pada kali ini menumpukan kepada Fokus Utama Audit (Key Audit Area [KAA]) berkaitan tiga elemen yang dinilai iaitu pencapaian mandat dan objektif penubuhan syarikat; elemen tatakelola melibatkan aspek keanggotaan dan komposisi Lembaga Pengarah serta Jawatankuasa Audit; dan elemen prestasi kewangan melibatkan aspek pembayaran dividen oleh syarikat Kerajaan, syarikat Kerajaan dengan isu usaha berterusan (going concern) dan syarikat kerajaan berstatus dormant.

6. Jabatan Audit Negara juga melaksanakan pengauditan terperinci terhadap pengurusan syarikat Kerajaan Persekutuan iaitu Pelaburan Hartanah Berhad (PHB). Pemerhatian Audit telah dikemukakan kepada Ketua Pegawai Eksekutif syarikat dan pihak pengurusan syarikat telah dimaklumkan mengenai isu yang dibangkitkan dalam Mesyuarat Penutup. Surat pengesahan (confirmatory letter) telah dikemukakan sebelum laporan ini dimuktamadkan. Bagi meningkatkan lagi pencapaian objektif penubuhan syarikat dan menambah baik perkara yang dibangkitkan, saya telah mengemukakan beberapa syor yang perlu diambil tindakan oleh syarikat berkenaan.

7. Semua isu yang dilaporkan dalam Laporan Ketua Audit Negara (LKAN) kini disusul sehingga selesai melalui Papan Pemuka Dalam Talian Ketua Audit Negara (Auditor General's Dashboard - AGD) di laman web JAN (<http://agddashboard.audit.gov.my>) yang telah diperkasakan sejak tahun 2024. Portal AGD yang boleh diakses oleh orang awam adalah bertujuan memastikan penemuan, teguran dan syor yang dibangkitkan oleh JAN dalam LKAN diberi perhatian yang serius oleh semua pihak-pihak yang berkaitan. Ia merupakan satu mekanisme penting bagi memastikan isu yang dibangkitkan diambil tindakan penambahbaikan dengan membetulkan kelemahan yang dikenal pasti dan mencegah berulangnya isu yang sama pada masa hadapan.

8. Sehingga 31 Disember 2025, daripada 12,590 isu yang disusul oleh JAN, 711 isu (5.6%) masih berstatus 'Dalam Tindakan' (kuning) dan 11,879 isu (94.4%) telah 'Selesai' (Hijau). Impak kepada susulan audit ini, Kerajaan telah berjaya mengutip hasil dan mendapat bayaran balik berjumlah RM316.68 juta, antaranya melalui tuntutan penalti, sewa tertunggak, kutipan Liquidated Ascertained Damages (LAD), tunggakan pajakan tanah, kutipan duti dan cukai. Daripada jumlah tersebut, sejumlah RM221.52 juta adalah daripada Kementerian/Jabatan dan Syarikat Kerajaan Persekutuan manakala selebihnya sejumlah RM95.16 juta daripada Kerajaan Negeri/Jabatan/Agensi dan Syarikat Kerajaan Negeri.

9. Saya ingin merakamkan ucapan terima kasih kepada Kementerian dan Jabatan serta Syarikat Kerajaan berkaitan yang telah memberikan kerjasama kepada pegawai JAN sepanjang tempoh pengauditan. Penghargaan yang sama turut dizahirkan kepada seluruh warga Jabatan Audit Negara yang telah berusaha gigih serta memberikan sepenuh komitmen dan profesionalisme bagi memastikan laporan ini dapat disiapkan dengan berkualiti dan mengikut tempoh yang ditetapkan. Sebagai sebuah institusi yang telah berkhidmat melebihi satu abad, Jabatan Audit Negara akan terus melangkah ke hadapan dalam memperkasa tadbir urus dan integriti demi memperkukuh akauntabiliti pengurusan kewangan serta penyampaian perkhidmatan awam negara selaras dengan tema sambutan 120 tahun Jabatan Audit Negara iaitu "*120 Tahun Menjunjung Amanah: Audit Berkualiti Meningkatkan Akauntabiliti*".

'Audit Berkualiti Meningkatkan Akauntabiliti'



(DATO' SERI WAN SURAYA WAN MOHD RADZI)
Ketua Audit Negara

Putrajaya
30 Januari 2026

RINGKASAN LAPORAN KETUA AUDIT NEGARA SECARA INFOGRAFIK

JABATAN AUDIT NEGARA

120
1906 - 2026
TAHUN

RUMUSAN KESELURUHAN AUDIT

- ☐ Prestasi perbelanjaan kasar R&D (GERD) dan pelaksanaan projek yang rendah serta wujud kelemahan tadbir urus dan pemantauan telah menjejaskan keberkesanan program.
- ☐ Reformasi struktur diperlukan meliputi aspek kawalan kewangan, pembangunan garis panduan, pematuan perjanjian, pengurusan fasiliti dan aset R&D serta penilaian impak projek.

PENEMUAN AUDIT

Bajet RMKe-12	RM 7.099 bilion	Bajet 4 Kementerian	RM 3.563 bilion
----------------------	------------------------	----------------------------	------------------------

SASARAN DAN PENCAPAIAN RMKe-12

KRITERIA	SASARAN RMKe-12/ SDG 9.5	PENCAPAIAN	DICAPAI (/) BELUM DICAPAI (X)	
			RMKe-12	SDG 9.5
Perbelanjaan kasar R&D (GERD) kepada Keluaran Dalam Negeri Kasar (KDNK)	2.5%	1.01% (2022)	X	X
Perbelanjaan R&D oleh Sektor Swasta (BERD) kepada GERD	70%	51.37% (2022)	X	X
Bilangan Penyelidik bagi Setiap 10,000 Tenaga Buruh	130 orang	54 orang (2022)	X	X
Perbelanjaan Penyelidikan Eksperimental kepada GERD	50%	60.97% (2022)	/	
Kedudukan 20 Negara Teratas Global Innovation Index (GII)	20 Teratas	Kedudukan ke-34 (2025)	X	
Permohonan Paten Warganegara	2,000 Permohonan	993 (2024)	X	

BAKI GERAN PENYELIDIKAN TIDAK DIPULANGKAN OLEH 11 AGENSI PELAKSANA - RM183.11 JUTA

- ☐ **KPT** – RM110.67 juta
- ☐ **MITI** – RM55.64 juta
- ☐ **MOSTI** – RM14.33 juta
- ☐ **KPKM** – RM2.47 juta

PROJEK NAIK TARAF BANGUNAN DAN FASILITI BERKULAT - RM43.28 JUTA

Belum disiapkan menjejaskan aktiviti penyelidikan di UKM

KETIDAKPATUHAN SYARAT PERJANJIAN/GARIS PANDUAN - RM107.71 JUTA

MOSTI

- ☐ **RM65.78 juta** – Akaun bank berasingan tidak diwujudkan
- ☐ **RM5.58 juta** – Baki projek tamat belum dikutip semula
- ☐ **RM2.55 juta** – Kutipan hasil Cradle Fund Sdn. Bhd. tanpa kelulusan

KPKM

- ☐ **RM33.80 juta** – Peruntukan R&D&C&I digunakan bagi Perbelanjaan Mengurus

PROJEK PEMBANGUNAN COVID-19 SCREENING AND MONITORING TOOL i-BREATH UTM - RM1.06 JUTA

- ☐ 19 unit prototaip i-Breath tidak dapat dikesan
- ☐ Hak cipta tidak didaftarkan atas nama Kerajaan

SYOR AUDIT

Unit Pengurusan Penyelidikan (RMU)

Memperkasakan pemantauan Unit Pengurusan Penyelidikan Berpusat bagi memperkemas dan memperkukuh tadbir urus R&D&C&I serta mengadakan penyelarasan untuk pengumpulan data seterusnya menjejaskan kejayaan program/projek.

Garis Panduan Kebangsaan R&D&C&I

Menyediakan Garis Panduan Kebangsaan bagi menambah baik pengurusan dana meliputi aspek tadbir urus, kawalan kewangan, penetapan bidang keutamaan, tahap kesediaan teknologi (TRL), pendaftaran harta intelek dan mekanisme pemantauan/pelaporan bagi mengelakkan pertindihan skop dan ketelusan pengagihan dana.

Perkongsian Fasiliti dan Peralatan

Memperkukuhkan sistem berpusat bagi perkongsian fasiliti, kemudahan dan peralatan dari institusi penyelidikan, universiti dan industri untuk penyewaan, khidmat analitik dan nasihat teknikal bagi mengoptimumkan penggunaan aset negara dan mengurangkan kos pelaksanaan penyelidikan.

Peningkatan Projek R&D Berimpak Tinggi

Menjajarkan R&D yang berimpak tinggi untuk pengkomersialan, pemindahan teknologi, peningkatan harta intelek dan ahli saintis serta mewujudkan peluang pekerjaan dan keusahawanan bagi pertumbuhan ekonomi dan daya saing negara secara mampan.

RUMUSAN KESELURUHAN AUDIT

Secara keseluruhan, Projek MyDID menunjukkan kelemahan dalam perbelanjaan dan kawalan dalaman semasa pelaksanaan awal Projek MyDID di bawah pengurusan MIMOS. Struktur tadbir urus projek tidak berfungsi sebagaimana yang ditetapkan.

Dari aspek kewangan, terdapat ketidakpatuhan terhadap struktur kos, syarat yang dipersetujui dan perbelanjaan tidak mengikut tujuan peruntukan (purpose of vote). Perolehan peralatan telah dibuat tanpa kelulusan dan tidak digunakan mengakibatkan pembaziran serta kelemahan kawalan aset.

Sebagai salah seorang Ahli Lembaga Pengarah, wakil MIMOS hendaklah melaksanakan kuasa dan tanggungjawab fidusiarinya dengan memastikan setiap proses tadbir urus dan kawalan dalaman dipatuhi bagi memastikan kepentingan (best interest) Projek MyDID sentiasa terpelihara.

PENEMUAN AUDIT

- 1 Perbelanjaan RM28.13 juta **tanpa kelulusan jawatankuasa** ditetapkan.
- 2 **Perbelanjaan operasi** RM14.09 juta di bawah skop perkhidmatan projek dibayar menggunakan peruntukan pembangunan Projek MyDID, termasuk RM13.10 juta (93%) untuk bayaran emolumen dan *resource cost* sejumlah RM0.85 juta.
- 3 Perbelanjaan **tanpa/melebihi penyaluran peruntukan** sejumlah RM4.08 juta bagi 11 sub-skop projek.
- 4 Perbelanjaan **melebihi jumlah kos** bagi satu sub-skop projek sejumlah RM70,000.
- 5 Perolehan peralatan *Certificate Authority* RM79,000 **tanpa kelulusan Makmal Kajian Nilai** dan peralatan tersebut **tidak digunakan**.

SYOR AUDIT

MIMOS dan pihak pengurusan hendaklah:

- Memastikan perbelanjaan projek dilaksanakan dengan kelulusan Jawatankuasa serta mematuhi struktur kos dan tujuan peruntukan, termasuk pematuhan kepada Garis Panduan Pelaksanaan Projek Pembangunan.
- Memantapkan tadbir urus Geran Pembangunan untuk memastikan keputusan berkaitan peruntukan, pelaksanaan projek dan perolehan dibuat dengan ketelusan, akauntabiliti dan berpanduan peraturan sedia ada.

PELAKSANAAN e-SELFAUDIT

852

Badan Lain Termasuk Syarikat Diwartakan

**1 Badan Lain +
641 Syarikat**

Kemuka maklum balas

2 Syarikat

Tidak kemuka
maklum balas

**208
Syarikat**

Berstatus *winding
up/dissolved/*
tiada kepentingan
Kerajaan

641

Status Syarikat Kerajaan Persekutuan

411

Syarikat Aktif
Bukan SPV

114

SPV Aktif

116

Dorman

PENEMUAN AUDIT

Pencapaian Objektif Penubuhan Syarikat

509

Syarikat melaksanakan aktiviti selaras
objektif Perlembagaan Syarikat

4

Syarikat melaksanakan aktiviti tidak
selaras objektif Perlembagaan Syarikat

Keanggotaan dan Komposisi Lembaga Pengarah Syarikat Kerajaan

200

Syarikat mencapai
saranan komposisi
Lembaga Pengarah
dan pelantikan
Pengarah Bebas

52

Syarikat tidak mencapai
saranan komposisi
Lembaga Pengarah dan
pelantikan Pengarah Bebas

113

Syarikat tidak melantik
Pengarah Bebas

PENEMUAN AUDIT

Jawatankuasa Audit (JKA)

202

Syarikat menubuhkan
JKA atau setara
dengannya

68

Syarikat mempunyai
JKA di peringkat
syarikat induk

119

Syarikat tidak
menubuhkan JKA

Pembayaran Dividen oleh Syarikat Kerajaan

RM77.735 Bilion

Jumlah dividen dibayar
kepada pemegang saham
oleh **145** syarikat pada
tahun 2023

**Dividen Bayar Kepada
Kerajaan Persekutuan**

2022: 15 Syarikat
(RM50.777 bilion)
2023: 16 Syarikat
(RM43.279 bilion)

13

Syarikat MKD **tidak
membayar dividen**
kepada Kerajaan
Persekutuan pada tahun
2023 walaupun solven

Syarikat Kerajaan dengan Isu Usaha Berterusan (Going Concern)

141

Syarikat mempunyai
isu usaha berterusan
(going concern)

9

Syarikat menerima sokongan kewangan dengan baki
pendapatan geran tertunda (liabiliti) berjumlah
RM1.997 bilion pada tahun 2023

Syarikat Kerajaan Berstatus Dorman

62

Syarikat berstatus dormant 5 tahun
atau lebih

17

Syarikat berstatus dormant kurang
daripada 5 tahun

RUMUSAN AUDIT

Secara keseluruhannya, PHB telah melaksanakan mandat penubuhannya untuk memperkasa penyertaan Bumiputera dalam pemilikan hartanah komersial melalui Amanah Hartanah Bumiputera (AHB), dan aktiviti utama PHB juga telah dilaksanakan selaras dengan objektif penubuhannya. Kedudukan kewangan Kumpulan PHB juga menunjukkan prestasi positif dengan peningkatan keuntungan dan keupayaan aset melebihi liabiliti. Bagaimanapun, terdapat kelemahan pengurusan projek pembangunan hartanah di Mayang Mall dan Bangsar 61 yang telah menyebabkan projek lewat disiapkan, peningkatan kos dan kegagalan mendapatkan Perakuan Penyiapan dan Pematuhan. PHB mengamalkan tadbir urus korporat yang baik namun terdapat ketidakselarasan komposisi Lembaga Pengarah berbanding ketetapan Piagam Lembaga Pengarah.

PENEMUAN AUDIT

Pencapaian Mandat Penubuhan

Bil. Pemegang Unit AHB:



Pulangan Tahunan AHB:

- 2021 – 4.7 sen seunit
- 2022 – 5.0 sen seunit
- 2023 – 5.0 sen seunit
- 2024 – 5.0 sen seunit

Bangunan disandarkan kepada AHB:

21/26

Pencapaian Objektif Penubuhan

Petunjuk Prestasi Utama (KPI)

- 2021 – 75.7%
- 2022 – 85.4%
- 2023 – 42.0%
- 2024 – 88.0%

Pulangan Atas Pelaburan

20/26

Capai pulangan melebihi 100% (110.3%-260.5%)

Pengurusan Hartanah

Kadar Penghunan

- ❑ 2021 – 73.0%
- ❑ 2022 – 70.0%
- ❑ 2023 – 68.0%
- ❑ 2024 – 76.0%

Tunggakan Sewa

- ❑ 2021 – RM93.52 juta
- ❑ 2022 – RM86.38 juta
- ❑ 2023 – RM84.98 juta
- ❑ 2024 – RM79.90 juta

Pengurusan Pembangunan Hartanah

Mayang Mall

- ❑ Kelewatan penyiapan
 - * Pakej 1 – **369 hari**
 - * Pakej 2 – **1,254 hari**
- ❑ Kenaikan Kos **RM274.38 juta**
- ❑ **Kelulusan** tuntutan Loss & Expenses berjumlah RM13.57 juta **tidak selaras kontrak**
- ❑ Siap dan beroperasi pada **5 Disember 2024**

Bangsar 61

- ❑ Kelewatan penyiapan **1,818 hari**
- ❑ Kenaikan Kos Pembinaan TLK **RM144.35 juta**
- ❑ Projek belum siap, sepatutnya siap **15 Jun 2024**

Nota:TLK-Tempat Letak Kereta

Tatakelola

Bilangan wakil Kerajaan tidak ikut Terma Rujukan Lembaga Pengarah

BAHAGIAN I

AKTIVITI KEMENTERIAN/JABATAN/BADAN-BADAN BERKANUN PERSEKUTUAN

JABATAN AUDIT NEGARA

120 1905 - 2025
TAHUN

1. Pengauditan Program Penyelidikan, Pembangunan, Pengkomersialan dan Inovasi (R&D&C&I)

JABATAN AUDIT NEGARA

120
TAHUN
1905 - 2025

KEMENTERIAN PENDIDIKAN TINGGI
KEMENTERIAN SAINS, TEKNOLOGI DAN INOVASI
KEMENTERIAN PELABURAN, PERDAGANGAN DAN
INDUSTRI
KEMENTERIAN PERTANIAN DAN KETERJAMINAN
MAKANAN
KEMENTERIAN EKONOMI
KEMENTERIAN KEWANGAN

**1. PENGAUDITAN PROGRAM PENYELIDIKAN, PEMBANGUNAN,
PENGKOMERSIALAN DAN INOVASI (R&D&C&I)**

ABSTRAK

Aktiviti Penyelidikan, Pembangunan, Pengkomersialan dan Inovasi (R&D&C&I) di Malaysia didokong oleh Pemangkin Dasar 2 Rancangan Malaysia Kedua Belas (RMKe-12), Dasar Sains, Teknologi dan Inovasi Negara (DSTIN) 2021-2030, dan melalui Matlamat Pembangunan Mampan (SDG 9 – Industri, Inovasi dan Infrastruktur).

Pengauditan melibatkan empat kementerian yang menerima peruntukan tertinggi bagi program/projek R&D&C&I iaitu Kementerian Pendidikan Tinggi; Kementerian Sains, Teknologi dan Inovasi; Kementerian Pelaburan, Perdagangan dan Industri; Kementerian Pertanian dan Keterjaminan Makanan serta Kementerian Kewangan dan Kementerian Ekonomi yang terlibat dalam kelulusan bajet pembangunan.

Antara isu dikenal pasti adalah baki geran penyelidikan tidak dipulangkan bagi projek telah siap atau ditamatkan; ketidakpatuhan terhadap syarat perjanjian/garis panduan seperti ketiadaan akaun bank berasingan untuk penyaluran dana; baki projek tamat belum dikutip semula; dan kutipan hasil tanpa kelulusan. Selain itu, terdapat peruntukan R&D&C&I digunakan untuk perbelanjaan mengurus serta projek naik taraf bangunan/fasiliti belum disiapkan menjejaskan aktiviti penyelidikan dan prototaip projek tidak dapat dikesan.

Secara keseluruhannya, prestasi Perbelanjaan Kasar R&D (GERD) dan pelaksanaan projek yang rendah (34.1%) serta wujud kelemahan tadbir urus dan pemantauan telah menjejaskan keberkesanan program walaupun peruntukan signifikan dilaburkan oleh Kerajaan untuk memperkukuh ekosistem R&D&C&I. Reformasi struktur diperlukan meliputi aspek kawalan kewangan, pembangunan garis panduan, pematuhan perjanjian, pengurusan fasiliti dan aset R&D serta penilaian impak projek agar objektif strategik negara dalam inovasi dan teknologi tinggi dapat dicapai menjelang tahun 2030.


1. LATAR BELAKANG

1.1. Pemangkin Dasar 2 Rancangan Malaysia Kedua Belas (RMKe-12) telah menetapkan matlamat untuk mempercepatkan penerimgunaan teknologi dan inovasi bertujuan memperkukuh ekosistem sains, teknologi, inovasi dan ekonomi digital bagi mendorong transformasi ekonomi negara ke arah ekonomi berasaskan pengetahuan, inovasi dan teknologi tinggi.

1.2. Dasar Sains, Teknologi dan Inovasi Negara (DSTIN) 2021-2030 telah digubal oleh Kementerian Sains, Teknologi dan Inovasi untuk memanfaatkan Sains, Teknologi dan Inovasi (STI) serta memperkukuh ekosistem Penyelidikan, Pembangunan, Pengkomersialan dan Inovasi (R&D&C&I) dalam membina masyarakat yang maju dan progresif berasaskan sains. Kerajaan juga melalui Matlamat Pembangunan Mampan (SDG 9 - Industri, Inovasi dan Infrastruktur – di bawah Sasaran 9.5) menyatakan komitmen untuk meningkatkan penyelidikan saintifik, menaik taraf keupayaan teknologi sektor perindustrian termasuk menggalakkan inovasi dan meningkatkan dengan ketara bilangan pekerja penyelidikan dan pembangunan (R&D) serta perbelanjaan R&D awam dan swasta menjelang tahun 2030.

1.3. Kementerian Ekonomi bertanggungjawab menyelaraskan dan mengharmonikan mekanisme pembiayaan untuk semua aktiviti R&D&C&I berdasarkan kelulusan bajet pembangunan selari dengan keutamaan negara. Berdasarkan belanjawan bagi tahun 2021 hingga 2025, Kerajaan telah menganggarkan peruntukan pembangunan sejumlah RM7.099 bilion untuk aktiviti penyelidikan dan pembangunan. Siling perbelanjaan RMKe-12 bagi empat kementerian yang menerima peruntukan tertinggi melibatkan Program R&D&C&I adalah seperti dalam **Carta 1**.

CARTA 1
KEMENTERIAN MENERIMA SILING PERBELANJAAN RMKe-12 TERTINGGI
BAGI PROGRAM R&D&C&I



Sumber: Bahagian Pembangunan Kementerian


2. OBJEKTIF PENGAUDITAN

Pengauditan ini dijalankan untuk menilai pengurusan Program R&D&C&I Kerajaan telah dilaksanakan dengan ekonomik, cekap dan berkesan bagi mencapai objektif pemangkin dasar RMKe-12 iaitu mempercepatkan penerimgunaan teknologi dan inovasi serta selaras dengan SDG 9.

3. SKOP PENGAUDITAN

3.1. Pengauditan dijalankan di empat kementerian pelaksana yang menerima peruntukan tertinggi iaitu Kementerian Pendidikan Tinggi (KPT); Kementerian Sains, Teknologi dan Inovasi (MOSTI); Kementerian Pelaburan, Perdagangan dan Industri (MITI); Kementerian Pertanian dan Keterjaminan Makanan (KPKM) serta Kementerian Ekonomi (KE) dan Kementerian Kewangan (MOF) selaku agensi pusat yang meluluskan bajet/peruntukan R&D&C&I. Pengauditan juga dilaksanakan di agensi pelaksana/institut penyelidikan melibatkan lima Universiti Penyelidikan/*Research University* (RU), lima Institusi Pendidikan Tinggi Awam/Swasta (IPTA/IPTS), enam Agensi Kerajaan, lapan Syarikat Kerajaan dan tiga Agensi Teknikal seperti dalam **Rajah 1**.

RAJAH 1
AGENSI PELAKSANA DIAUDIT



3.2. Pemeriksaan fizikal dilaksanakan terhadap agensi pelaksana/universiti dan syarikat penerima dana melibatkan 87 Projek R&D&C&I bernilai RM318.48 juta bagi tahun 2021 hingga 30 Jun 2025.

3.3. Pengauditan ini bertujuan untuk menilai/mengukur pencapaian objektif program termasuk indikator SDG 9.5, prestasi perbelanjaan, status pelaksanaan fizikal projek dan aspek tatakelola pengurusan program serta impak Program R&D&C&I.

4. METODOLOGI PENGAUDITAN

Pengauditan dijalankan melalui semakan fail, pemeriksaan fizikal, temu bual dan analisis data. Maklumat lanjut seperti dalam **Rajah 2**.

RAJAH 2
METODOLOGI PENGAUDITAN



Sumber: Jabatan Audit Negara

5. PENEMUAN TERPERINCI AUDIT

Pengauditan telah dilaksanakan pada bulan Jun hingga September 2025. Penemuan Audit dan maklum balas kementerian/agensi **dibincangkan dalam Mesyuarat Penutup pada 16 Disember 2025**. Penjelasan lanjut mengenai setiap penemuan Audit adalah seperti berikut:

5.1. PENCAPAIAN OBJEKTIF PROGRAM

5.1.1. Pencapaian Objektif RMKe-12 - Pemangkin Dasar 2 dan SDG 9

- Pemangkin Dasar 2 dalam RMKe-12 adalah strategi untuk mempercepat penerimgunaan teknologi dan inovasi, bertujuan untuk mendigitalkan ekonomi, memperluas penggunaan teknologi termaju dan memupuk persekitaran yang menyokong pertumbuhan ekonomi digital melalui peningkatan ketersambungan digital, inovasi dan pembangunan bakat.
- Bagi menilai pencapaian objektif RMKe-12, sebanyak enam sasaran utama ditetapkan iaitu Perbelanjaan Kasar R&D (GERD) kepada Keluaran Dalam Negeri Kasar (KDNK); Perbelanjaan R&D oleh Sektor Swasta (BERD); bilangan penyelidik bagi setiap 10,000 tenaga buruh; perbelanjaan penyelidikan eksperimental kepada GERD; kedudukan 20 negara teratas dalam Global Innovation Index (GII); dan permohonan paten oleh warganegara.

- c. Penilaian juga melibatkan pencapaian sasaran SDG 9.5 iaitu meningkatkan penyelidikan saintifik, menaik taraf keupayaan teknologi sektor perindustrian menjelang tahun 2030, menggalakkan inovasi dan meningkatkan dengan ketara jumlah pekerja yang menjalankan R&D; serta perbelanjaan R&D awam dan swasta. Pencapaian Malaysia diukur melalui tiga indikator iaitu GERD kepada KDNK; BERD kepada GERD dan bilangan penyelidik bagi setiap 10,000 tenaga buruh.
- d. Sehingga 30 Jun 2025, **lima daripada enam objektif RMKe-12 dan kesemua tiga indikator SDG 9.5 belum dicapai**. Sasaran dan pencapaian dalam RMKe-12 serta indikator SDG 9.5 bagi objektif R&D&C&I adalah seperti dalam **Jadual 1**.

JADUAL 1
SASARAN, PENCAPAIAN RMKe-12 DAN SDG 9

KRITERIA	SASARAN RMKe-12/ SDG 9.5	PENCAPAIAN	DICAPAI (/) BELUM DICAPAI (X)		SASARAN RMK13
			RMKe-12	SDG 9.5	
Perbelanjaan Kasar R&D (GERD) kepada Keluaran Dalam Negeri Kasar (KDNK)	2.5%	1.01% (2022)	X	X	2.5%
Perbelanjaan R&D oleh Sektor Swasta (BERD) kepada GERD	70%	51.37% (2022)	X	X	70%
Bilangan Penyelidik bagi Setiap 10,000 Tenaga Buruh	130 orang	54 orang (2022)	X	X	Tiada
Perbelanjaan Penyelidikan Eksperimental kepada GERD	50%	60.97% (2022)	/		70%
Kedudukan 20 Negara Teratas GII	20 Teratas	Kedudukan ke-34 (2025)	X		20 teratas
Permohonan Paten oleh Warganegara	2,000 Permohonan	993 (2024)	X		2,000

Sumber: Buku RMKe-12 dan RMK13 serta Laporan SDG Malaysia 2023

- e. Maklumat pencapaian dilaporkan berdasarkan data Kajian R&D Kebangsaan tahun 2023 mengguna pakai data tersedia sehingga tahun kewangan 2022. Pihak KE memaklumkan penetapan sasaran bagi Rancangan Malaysia Ketiga Belas (RMK13) adalah sama dengan sasaran RMKe-12 memandangkan sasaran ditetapkan masih belum dicapai.

5.1.2. Pencapaian DSTIN 2021-2030

- a. DSTIN 2021-2030 meletakkan matlamat menjadikan Malaysia sebagai sebuah negara berteknologi tinggi pada tahun 2030. Melalui dasar ini, Kerajaan Malaysia berhasrat memperkukuhkan pembangunan dan penggunaan teknologi tinggi tempatan bagi memacu kemampanan ekonomi negara berasaskan inovasi sains dan teknologi. Usaha mencapai matlamat ini juga akan disokong melalui pemerkasaan bakat tempatan, R&D dalam bidang-bidang strategik negara,

perundangan dan peraturan yang menyokong pembangunan STI serta penaiktarafan infrastruktur teknologi termasuk teknologi digital.

- b. DSTIN digubal bagi menggariskan hala tuju strategik agenda pembangunan Sains, Teknologi, Inovasi dan Ekonomi (STIE) negara seterusnya menjadikan STIE sebagai elemen utama dalam penyediaan dasar dan pelan induk utama Kerajaan bagi menggalakkan inovasi dalam pertumbuhan ekonomi. Pencapaian Teras 2 DSTIN melibatkan sasaran strategi dan pelan tindakan bagi mencapai pembangunan teknologi melalui R&D&C&I. Sehingga 30 Jun 2025, hanya satu daripada enam strategi telah dicapai dan pencapaian Teras 2 DSTIN adalah seperti dalam **Jadual 2**.

JADUAL 2
PENCAPAIAN TERAS 2 DSTIN

STRATEGI	TELAH DICAPAI (/) BELUM DICAPAI (X)	
	JANGKA PENDEK (2022)	JANGKA PERTENGAHAN (2025)
Penetapan bidang keutamaan penyelidikan negara	X	X
Meningkatkan R&D bagi output yang bernilai tinggi, <i>outcome</i> yang berimpak tinggi dan inovasi baharu*	X	X
Menambah baik pengurusan dana R&D dan sumber dana alternatif	X	X
Menggalakkan perkongsian data terbuka*	X	X
Menggalakkan usaha dan kerjasama bagi menangani cabaran negara*	X	X
Memacu inovasi sosial untuk manfaat golongan terpinggir dan kurang bernasib baik	/	/

Sumber: Bahagian Perancangan Strategik MOSTI

Nota: (*) - Sebahagian strategi dicapai

- c. Sebanyak 12 inisiatif atau aktiviti telah ditetapkan untuk pencapaian enam strategi tersebut. Sehingga 30 Jun 2025, **enam (50%) daripada 12 inisiatif/aktiviti belum dicapai bagi tempoh jangka pendek (2021-2022)** dan **tujuh (58%) daripada 12 inisiatif/aktiviti belum dicapai bagi tempoh jangka pertengahan (2023-2025)**. Antara punca strategi Teras 2 DSTIN masih belum dicapai adalah seperti berikut:


- Strategi untuk penetapan bidang keutamaan penyelidikan negara iaitu meningkatkan sasaran GERD/KDNK sebanyak 2.5%, hanya mencatatkan 1.01% pada tahun 2022.
- Strategi untuk menambah baik pengurusan dana R&D dan sumber dana alternatif masih belum dicapai bagi tempoh 2021 hingga 2025. Inisiatif melibatkan KE yang belum dicapai adalah penyediaan Garis Panduan Kebangsaan bagi Pengurusan Dana R&D.

- iii. Strategi untuk menggalakkan perkongsian data terbuka iaitu pengukuhan National Scientific Facilities and Equipment (NSFE) bertujuan menggalakkan perkongsian kemudahan dan peralatan saintifik dalam kalangan komuniti STI serta meningkatkan kerjasama R&D masih belum dicapai. Merujuk data statistik NSFE sehingga bulan September 2025, sebanyak 3,279 data peralatan didaftarkan dengan nilai sejumlah RM1.645 bilion. Bagaimanapun, pihak MOSTI tidak mempunyai data berkaitan jumlah sewaan, bilangan kerjasama dan tawaran khidmat nasihat disebabkan pengumpulan data daripada institusi penyelidikan dilaksanakan secara manual dan sukarela.
- iv. Strategi dan pelan tindakan DSTIN yang dirangka turut melibatkan kementerian, agensi penyelidikan dan universiti sebagai agensi peneraju/pelaksana. Namun, pelan tindakan atau inisiatif berkaitan R&D&C&I tidak diselaraskan atau dijangka di peringkat KPT, MITI dan KPKM dalam pelan tindakan masing-masing.

5.1.3. Kedudukan Malaysia dalam Global Innovation Index (GII) Tahun 2021-2025

- a. GII ialah satu indeks penanda aras global yang mengukur tahap keupayaan dan prestasi inovasi sesebuah negara. Ia diterbitkan setiap tahun oleh World Intellectual Property Organization (WIPO) dengan kerjasama institusi antarabangsa yang lain.
- b. Laporan GII bagi tempoh RMKe-12 menunjukkan **Malaysia mencatat prestasi mendatar antara kedudukan 33 hingga 36 daripada 139 negara**. Malaysia berada pada kedudukan kedua dalam kalangan negara Association of Southeast Asian Nations (ASEAN) serta kedua dalam kelompok negara berpendapatan menengah atas (upper-middle income). Kedudukan Malaysia berbanding negara terpilih lain adalah seperti dalam **Rajah 3**.

RAJAH 3
KEDUDUKAN MALAYSIA DALAM GLOBAL INNOVATION INDEX



Sumber: Laporan Global Innovation Index Tahun 2021-2025

- c. Berdasarkan Laporan GII tahun 2025, kekuatan dan kelemahan bagi ekosistem inovasi Malaysia adalah seperti dalam **Jadual 3**.

JADUAL 3
KEKUATAN DAN KELEMAHAN BAGI EKOSISTEM INOVASI MALAYSIA

KEKUATAN	KELEMAHAN
Institusi: Persekitaran politik dan peraturan yang stabil.	Infrastruktur: Kos logistik dan kecekapan pengangkutan masih rendah.
Kecanggihan Pasaran: Persekitaran pelaburan dan persaingan yang kondusif.	Modal Insan dan R&D: Pelaburan BERD/GERD dan hasil penyelidikan tidak setanding negara maju.
Output Pengetahuan dan Teknologi: Keupayaan dalam penciptaan dan penyebaran teknologi.	Output Kreatif: Cabaran dalam pengkomersialan inovasi dan penciptaan nilai pasaran.


Sumber: Laporan GII Tahun 2025

5.1.4. Paten oleh Warganegara

- Paten adalah satu hak eksklusif yang dianugerahkan untuk suatu reka cipta, sama ada satu produk atau satu proses untuk melakukan sesuatu yang baru atau penyelesaian teknikal ke atas sesuatu masalah. Perekodan permohonan paten oleh warganegara adalah penting untuk negara sebagai petunjuk tahap inovasi nasional, pengukuran keupayaan R&D tempatan dan merangka dasar/inisiatif serta penentuan kedudukan dalam GII.
- Berdasarkan objektif RMKe-12, sasaran bilangan permohonan paten oleh warganegara ditetapkan sebanyak 2,000 permohonan. Analisis Audit mendapati **bilangan permohonan paten oleh warganegara bagi tempoh**

tahun 2021 hingga 2024 belum dicapai dengan purata permohonan hanya sebanyak 968 paten. Butiran lanjut seperti Rajah 4.

RAJAH 4
BILANGAN PERMOHONAN DAN PEMBERIAN PATEN
OLEH WARGANEGARA BAGI TAHUN 2021 HINGGA 2024



Sumber: Perbadanan Harta Intelek Malaysia (MyIPO)

- c. Analisis Audit terhadap permohonan paten oleh warganegara mengikut bidang teknologi mendapati bidang keperluan manusia merekodkan permohonan paten tertinggi iaitu sebanyak 909 paten (23.8%) diikuti bidang fizik sebanyak 866 paten (22.6%) daripada 3,824 paten bagi tempoh tahun 2021 hingga 2024. Butiran lanjut seperti **Jadual 4**.

JADUAL 4
PERMOHONAN PATEN OLEH WARGANEGARA MENGIKUT BIDANG TEKNOLOGI
BAGI TAHUN 2021 HINGGA 2024

TAHUN	BIDANG TEKNOLOGI					JUMLAH
	KEPERLUAN MANUSIA	FIZIK	KIMIA/LOGAM	OPERASI PELAKSANAAN/ PENGANGKUTAN	LAIN-LAIN*	
2021	197	216	235	147	206	1,001
2022	217	219	160	147	176	919
2023	230	221	162	145	176	934
2024	265	210	177	123	195	970
JUMLAH	909	866	734	562	753	3,824
PERATUS (%)	23.8	22.6	19.2	14.7	19.7	100

Sumber: MyIPO - Anggaran Statistik Permohonan Paten

Nota: (*) - Lain-lain merangkumi tekstil/kertas, teknologi binaan tetap, kejuruteraan mekanikal/pencahayaan/pemanasan/senjata/letupan dan elektrik

Maklum balas KE diterima pada 19 November 2025

KE mengambil maklum berhubung perkara ini dan berusaha memastikan semua sasaran tercapai berdasarkan kepada strategi dan inisiatif yang telah digariskan dalam RMK13. KE mengambil maklum berhubung strategi Garis Panduan Kebangsaan Pengurusan Dana R&D yang masih belum dibangunkan. Pelaksanaan perkara ini dan pengukuhan ekosistem R&D&C&I sedang dilaksanakan berdasarkan kepada keputusan Majlis Tindakan Ekonomi Negara (MTEN) pada 5 Disember 2024.

Maklum balas MITI diterima pada 22 November 2025

Pelan tindakan berkaitan R&D&C&I di peringkat MITI akan diselaraskan seterusnya diijarkan dalam Pelan Strategik MITI 2026-2030. Kedudukan Malaysia dalam GII untuk tempoh RMKe-12 yang agak mendatar menunjukkan ketidakseimbangan dan cabaran ekosistem inovasi negara. Kerajaan perlu melaksanakan anjakan paradigma daripada sekadar membiayai R&D semata-mata kepada mengamalkan pengurusan berorientasikan hasil yang lebih proaktif dan berfokus.

Maklum balas MOF diterima pada 24 November 2025

Pemantauan Pelan Pelaksanaan Dasar (PPD) RMK13 perlu dipertingkatkan dalam memastikan sasaran ditetapkan dalam RMK13 dicapai. MOF berpandangan bahawa kaedah penilaian dan pemantauan R&D&C&I perlu dibangunkan secara khusus untuk mengukur pencapaian dan mengenal pasti prestasi semasa Program/Projek R&D&C&I. Sehubungan itu, dicadangkan KE bekerjasama dengan kementerian terlibat seperti MOSTI dan KPT, institusi penyelidikan dan Badan Berkanun Persekutuan (BBP)/Syarikat Kerajaan berkaitan R&D&C&I supaya membangunkan kaedah penilaian dan pemantauan yang lebih menepati *nature* R&D&C&I.

MOF mengambil maklum mengenai kedudukan Malaysia dalam Laporan GII tahun 2021-2025 dan cabaran yang berkait dengan R&D&C&I di Malaysia. MOF akan sentiasa menyokong usaha untuk menambah baik tahap keupayaan dan inovasi di Malaysia melalui peruntukan tahunan yang disediakan dan juga melalui pemberian insentif pengecualian cukai yang berkaitan R&D.

Maklum Balas MyIPO pada 9 Disember 2025

Purata permohonan paten tempatan sepanjang lima tahun (2019-2023) sebanyak 1,034 permohonan. Sasaran 2,000 dilihat sangat tinggi dan mendadak mengambil kira *trend* dan purata permohonan paten serta keupayaan pereka cipta tempatan menghasilkan reka cipta dan inovasi yang baru di seluruh dunia. Melainkan, Kerajaan mewujudkan suatu polisi yang mewajibkan penerima geran R&D memfailkan paten

atau perbaharuan utiliti. Pereka cipta tempatan perlu memberi fokus paten yang berkualiti tinggi, khususnya memenuhi syarat seperti *Novelty, Inventive Step & Industrial Applicable* serta bernilai komersial.

Maklum balas MOSTI diterima pada 12 Disember 2025

Faktor utama sasaran RMKe-12 tidak tercapai adalah kerana sasaran asal tidak mengambil kira risiko pandemik COVID-19 dan kelembapan ekonomi global. Kedudukan GII adalah berkait rapat dengan GERD, indikator tenaga penyelidikan, output teknologi dan kualiti ekosistem inovasi. Apabila GERD jatuh, hampir semua aspek skor GII turut menurun.

MOSTI telah mengambil tindakan pembetulan dengan memohon kepada Unit Perancang Ekonomi (EPU) melalui Kajian Separuh Penggal RMKe-12 untuk mengubah sasaran kedudukan 20 negara teratas kepada 30 negara teratas menjelang 2025. Berdasarkan simulasi data dan justifikasi realistik, mencadangkan sasaran RMK13 berbentuk peningkatan relatif (20% improvement) berbanding kedudukan Malaysia dalam Laporan GII. MOSTI sedang melaksanakan Kajian Separuh Penggal DSTIN 2021-2030 yang akan dimuktamadkan pada bulan Mac 2026.

Pendapat Audit

Objektif strategik R&D&C&I RMKe-12 untuk mempercepat penerimgunaan teknologi dan inovasi ke arah pengukuhan ekosistem sains, teknologi dan ekonomi digital negara masih belum dicapai. Meskipun Malaysia berada dalam kalangan terbaik di ASEAN dan negara berpendapatan menengah atas, pelaburan dan hasil R&D negara masih rendah serta pengkomersialan inovasi dan harta intelek kurang memberi impak.

5.2. PENCAPAIAN PERBELANJAAN DAN FIZIKAL PROJEK

- a. Bagi tempoh RMKe-12, siling perbelanjaan sejumlah RM3.563 bilion telah diluluskan bagi pelaksanaan 79 Program R&D&C&I di KPT, MOSTI, MITI dan KPKM. Sehingga 30 Jun 2025, peruntukan yang disalurkan adalah berjumlah RM2.898 bilion berbanding perbelanjaan sebenar sejumlah RM2.533 bilion dengan baki perbelanjaan sejumlah RM364.92 juta atau 12.6%. **Prestasi perbelanjaan keseluruhan mencapai 87.4% berbanding peruntukan diterima.** Butiran lanjut seperti dalam **Jadual 5**.

JADUAL 5
SILING PERBELANJAAN, PERUNTUKAN DAN PRESTASI PERBELANJAAN
BAGI RMKE-12 SEHINGGA 30 JUN 2025

KEMENTERIAN	SILING (RM Juta)	PERUNTUKAN DITERIMA (RM Juta)	PERBELANJAAN SEHINGGA 30 JUN 2025	
			RM Juta	(%)
KPT	1,551.00	1,420.29	1,301.08	91.6
MOSTI	1,364.00	885.00	691.00	78.1
MITI	402.00	374.00	335.00	89.6
KPKM	245.79	219.19	206.48	94.2
JUMLAH	3,562.79	2,898.48	2,533.56	87.4

Sumber: Bahagian Pembangunan KPT, MOSTI, MITI dan KPKM serta iGFMS

- b. Prestasi perbelanjaan di MOSTI hanya mencapai 78.1% berbanding peruntukan diterima. Perkara ini disebabkan oleh 19 projek sejumlah RM166.89 juta sedang dalam pelaksanaan sehingga bulan Disember 2025; enam projek berjumlah RM60.15 juta dilanjutkan tempoh sebagai projek sambungan RMK13; dan pindaan siling kos projek sejumlah RM27.15 juta bagi enam projek.
- c. Prestasi perbelanjaan di KPT, MITI dan KPKM bagi tahun 2021 hingga 2025 telah mencapai antara 89% hingga 94% berbanding peruntukan diterima masing-masing. Perkara ini disebabkan oleh sekatan peruntukan bagi projek belum komited dan projek dalam pelaksanaan sehingga bulan Disember 2025 serta proses pemulangan baki kepada Kerajaan.
- d. KE meminda siling kos program setiap tahun melalui kelulusan di bawah *Rolling Plan* tertakluk kepada prestasi perbelanjaan oleh kementerian bagi tahun sebelumnya. Prestasi perbelanjaan rendah oleh kementerian dan pengurangan siling perbelanjaan telah menjejaskan perancangan serta melewatkan pelaksanaan program dan pencapaian objektif atau KPI yang ditetapkan.
- e. Berdasarkan rekod Bahagian Pembangunan di empat kementerian mendapati sebanyak 79 program melibatkan 12,445 Projek R&D&C&I berjumlah RM2.874 bilion dilaksanakan dalam tempoh RMKe-12 seperti dalam **Jadual 6**.

JADUAL 6
PROJEK R&D&C&I MENGIKUT KEMENTERIAN

KEMENTERIAN	BIL. PROGRAM	BIL. PROJEK	KOS PROJEK (RM Juta)
KPT	6	11,137	983.35
MOSTI	34	1,145	1,364.00
MITI	8	106	280.72
KPKM	31	57	245.79
JUMLAH	79	12,445	2,873.86

Sumber: KPT, MOSTI, MITI dan KPKM

- f. Analisis Audit mendapati sebanyak 2,915 (34.1%) projek telah berjaya disiapkan manakala **5,539 (64.7%) projek masih dalam pelaksanaan sehingga 30 Jun 2025**. Berdasarkan projek yang sedang dalam pelaksanaan, **sebanyak 1,476 (26.7%) projek diluluskan lanjutan masa (EOT)**. Maklumat lanjut seperti dalam **Jadual 7**.

JADUAL 7
STATUS PELAKSANAAN PROJEK R&D&C&I SEHINGGA 30 JUN 2025

KEMENTERIAN	SIAP	DALAM PELAKSANAAN		*TAMAT/BATAL	JUMLAH
		TANPA EOT	ADA EOT		
**KPT	2,226	3,699	1,306	17	7,248
MOSTI	643	284	158	60	1,145
MITI	31	39	11	25	106
KPKM	15	41	1	-	57
JUMLAH	2,915	4,063 (73.3%)	1,476 (26.7%)	102	8,556
		5,539			
PERATUS	34.1%	64.7%		1.2%	

Sumber: KPT, MOSTI, MITI dan KPKM

Nota: (*) - Termasuk projek ditamatkan/*revoke*/tarik diri

(**) KPT - Projek Dana Penyelidikan Fundamental (DPF) melibatkan lima RU sahaja

- g. Analisis Audit selanjutnya mendapati perkara seperti berikut:
- i. Projek dalam pelaksanaan tertinggi adalah KPT dengan 5,005 (90.4%) projek dan sebanyak 1,306 (26.1%) projek diberikan EOT antaranya disebabkan masalah fasiliti/ruang makmal, kelewatan dalam mendapatkan calon pelajar penyelidik yang sesuai, pandemik COVID-19, pertukaran ketua penyelidik, perubahan skop projek dan keperluan mencapai output projek seperti penerbitan dan paten. Sebanyak 2,596 daripada projek dalam pelaksanaan merupakan projek yang akan disiapkan dalam RMK13.
 - ii. Sebanyak 158 projek yang dibiayai oleh MOSTI diberikan EOT antaranya disebabkan kelewatan memuktamadkan perjanjian, proses perolehan yang panjang, pembelian peralatan luar negara dan penerima dana memerlukan lanjutan masa untuk mencapai KPI.
 - iii. Sebanyak 102 projek (1.2%) telah ditamatkan atau dibatalkan disebabkan oleh beberapa faktor, antaranya penerima dana gagal menyempurnakan aktiviti mengikut carta perbatuan yang ditetapkan dalam perjanjian, status perbelanjaan yang rendah, kegagalan menghantar laporan kemajuan, peletakan jawatan ketua projek, pelajar tidak menyambung pengajian serta ketidakupayaan syarikat untuk memberi komitmen kewangan.

Maklum balas MOF diterima pada 24 November 2025

MOF berpandangan pemantauan yang berterusan serta berfokus perlu dipertingkatkan dalam memastikan pelaksanaan Projek/Program R&D&C&I mencapai sasaran. Pemantauan ini amatlah ditekankan selaras dengan maksud Seksyen 15A Akta Tatacara Kewangan 1957 [*Akta 61*] berkaitan tugas Pegawai Pengawal serta Arahan Perbendaharaan (AP) 13(c). Selain itu, kaedah pemantauan yang berkesan bagi R&D&C&I perlu dikenal pasti bersama institusi penyelidikan dan BBP/Syarikat Kerajaan berkaitan R&D&C&I supaya kaedah pemantauan menepati *nature* R&D&C&I. Proses kerja R&D&C&I yang mengutamakan inovasi memerlukan tempoh masa yang lebih lama untuk diuji sebelum diteruskan proses seterusnya.

Maklum balas KPT diterima pada 8 Disember 2025

Kelulusan EOT projek-projek penyelidikan adalah mengikut syarat yang ditetapkan dalam dokumen Tadbir Urus Dana Penyelidikan iaitu maksimum EOT dibenarkan adalah enam bulan dan dikemukakan sekurang-kurangnya tiga bulan sebelum projek tamat manakala EOT untuk penerbitan artikel dalam jurnal terindeks bagi tujuan mencapai KPI adalah selama tiga bulan.

Maklum balas MOSTI diterima pada 12 Disember 2025

MOSTI mengesahkan EOT yang telah diluluskan kepada projek adalah untuk memastikan objektif projek tercapai dan dapat disiapkan dengan sempurna. Penamatan projek pula adalah selaras dengan pematuhan perjanjian yang ditandatangani, serta memastikan peruntukan Kerajaan bagi tujuan R&D dapat dimanfaatkan sepenuhnya.

Pendapat Audit

Prestasi perbelanjaan dan fizikal projek berjaya disiapkan adalah sebanyak 87.4% dan 34.1%. Bilangan projek dalam pelaksanaan yang tinggi sebanyak 5,539 (64.7%) projek sehingga 30 Jun 2025 memberi kesan kepada penilaian impak dan pencapaian objektif program.

5.3. PENGURUSAN PROGRAM R&D&C&I

5.3.1. Baki Geran Penyelidikan Tidak Dipulangkan

- a. Pekeliling Perbendaharaan PA 3.2 Perenggan 10 menetapkan perkara berkaitan Perakaunan untuk Pemberian (Geran) oleh Kerajaan Persekutuan. Perenggan 10.2.3 menyatakan sebarang lebihan daripada perbelanjaan, termasuk pemberian

bagi setiap tahun kewangan, tidak boleh dipindahkan kepada satu kumpulan wang rizab atau dibelanjakan untuk tujuan-tujuan lain, selain daripada tujuan yang diluluskan oleh Perbendaharaan terlebih dahulu.

- b. Berdasarkan surat pelantikan agensi pelaksana program/projek pembangunan di peringkat MOSTI, baki peruntukan perbelanjaan pembangunan perlu dipulangkan selepas projek berakhir.
- c. Setakat 30 Jun 2025, **baki geran penyelidikan di empat kementerian yang tidak dipulangkan adalah sejumlah RM183.11 juta yang melibatkan 7,904 projek.** Baki terkumpul bagi RU dan agensi pelaksana di bawah kementerian adalah seperti dalam **Jadual 8.**

JADUAL 8
BAKI GERAN PENYELIDIKAN BAGI PROJEK SIAP/DITAMATKAN SEHINGGA 30 JUN 2025

NAMA RU/ AGENCI	BIL. PROJEK	PERUNTUKAN DISALURKAN (RM Juta)	PERUNTUKAN DIBELANJA (RM Juta)	BAKI PERUNTUKAN (RM Juta)	JUMLAH BAKI MENGIKUT TEMPOH (RM Juta)		
					0 -4 TAHUN	5-9 TAHUN	≥ 10 TAHUN
*Kementerian Pendidikan Tinggi (KPT)							
UKM	2,133	359.01	327.36	31.65	16.80	10.26	4.59
UTM	2,068	206.12	182.93	23.19	15.82	5.66	1.71
USM	1,097	135.76	114.28	21.48	16.15	5.33	-
UPM	2,056	269.37	248.30	21.07	11.26	6.81	3.00
UM	469	78.12	64.84	13.28	13.21	0.07	-
JUMLAH (a)	7,823	1,048.38	937.71	110.67	73.24	28.13	9.30
Kementerian Pelaburan, Perdagangan dan Industri (MITI)							
MIDA	32	114.59	80.62	33.97	-	33.97	-
MIDF	28	102.26	80.59	21.67	-	21.67	-
JUMLAH (b)	60	216.85	161.21	55.64	-	55.64	-
Kementerian Sains, Teknologi dan Inovasi (MOSTI)							
CFSB	13	130.10	116.31	13.79	7.80	5.57	0.42
MDV	1	44.40	44.00	0.40	-	0.40	-
NIBM	5	12.90	12.76	0.14	0.06	0.08	-
JUMLAH (c)	19	187.40	173.07	14.33	7.86	6.05	0.42
Kementerian Pertanian dan Keterjaminan Makanan (KPKM)							
MARDI	2	5.00	2.53	2.47	2.47	-	-
JUMLAH (d)	2	5.00	2.53	2.47	2.47	-	-
JUMLAH (a+b+c+d)	7,904	1,457.63	1,274.52	183.11	83.57	89.82	9.72

Sumber: Research Management Centre (RMC) UM, UKM, USM, UPM dan UTM serta Agensi Pelaksana

Nota: (*) - Baki di lima RU merangkumi semua jenis geran penyelidikan daripada Kerajaan termasuk Syarikat Kerajaan

- d. Baki geran penyelidikan di lima RU dan enam agensi pelaksana tidak dipulangkan kepada kementerian masing-masing merupakan projek siap atau ditamatkan. Baki tertinggi yang tidak dipulangkan adalah KPT melibatkan lima RU berjumlah RM110.67 juta bagi 7,823 projek.
- e. Analisis Audit mendapati sejumlah RM9.72 juta (5.3%) merupakan baki yang melebihi tempoh 10 tahun manakala sejumlah RM89.82 juta (49%) adalah baki bagi tempoh antara lima hingga sembilan tahun. Baki geran penyelidikan yang tidak dipantau oleh kementerian berisiko digunakan untuk tujuan selain dari kelulusan asal.
- f. Baki geran penyelidikan MITI bagi RMKe-11 tidak dipulangkan sejumlah RM55.64 juta melibatkan MIDA dan MIDF. Agensi pelaksana telah menggunakan baki peruntukan bagi membiayai projek-projek baharu RMKe-12 tanpa kelulusan MOF dan KE.

Maklum balas KE diterima pada 19 November 2025

Kementerian bertanggungjawab memantau pelaksanaan projek/program menerusi Jawatankuasa Tindakan Pembangunan Kementerian (JTPK). AP Bab A, Tatacara Kewangan Perkara 6(b) menyatakan bahawa sekiranya terdapat lebih peruntukan, kementerian bertanggungjawab perlu memaklumkan pihak KE dan melaksanakan pemulangan lebih peruntukan tersebut. Sekiranya kementerian bercadang untuk melaksanakan penggunaan yang tidak terkandung dalam skop projek, maka Notis Perubahan (NOC) perlu dikemukakan kepada pihak KE untuk pertimbangan.

Maklum balas MOF diterima pada 24 November 2025

Sekiranya peruntukan yang disalurkan tidak dapat dioptimumkan penggunaannya, baki tersebut perlu diisytihar/dimaklum kepada MOF/KE untuk tindakan lanjut kerana ianya tidak boleh dibelanjakan bagi perkara yang tiada dalam skop asal penyaluran. MOF melalui kuasa Menteri Kewangan boleh memutuskan tindakan yang wajar terhadap baki peruntukan tersebut sama ada dipulangkan sebagai hasil Kerajaan, *repurpose* atau tindakan lain yang lebih sesuai selaras dengan Seksyen 6(1) Akta 61.

Maklum balas KPT diterima pada 9 Disember 2025

Jabatan Pendidikan Tinggi (JPT) telah mengemas kini dan mendapati geran penyelidikan yang masih berbaki di Institut Pengajian Tinggi (IPT) sejak tahun 2006. JPT telah menubuhkan Jawatankuasa Pengurusan Baki Dana Penyelidikan (JPDN) KPT

bagi memastikan tatakelola pengurusan baki dana penyelidikan ditadbir dan kawal selia ke atas penggunaan baki tersebut. Mesyuarat JPDN telah bersidang pada 5 Ogos 2025 dan telah memutuskan terma rujukan dan Garis Panduan JPDN. Surat permohonan cadangan penggunaan baki dana penyelidikan daripada KPT kepada Kementerian Kewangan telah dikemukakan melalui surat bertarikh 4 Disember 2025. Pelaksanaan seterusnya tertakluk kepada kelulusan Kementerian Kewangan.

Maklum balas MOSTI diterima pada 12 dan 17 Disember 2025

Baki peruntukan yang tidak komited bagi NIBM (RM0.14 juta) dan MDV (RM0.40 juta) telah selesai dipulangkan. MOSTI telah mengemukakan permohonan guna semula (repurpose) baki peruntukan tidak komited bagi CFSB berjumlah RM13.79 juta bagi tujuan pelaksanaan Program Pemecut Inovasi Startup (Accelerator & Re-Innovate) kepada Kementerian Kewangan melalui surat bertarikh 16 Disember 2025.

Maklum balas KPKM diterima pada 28 November 2025 dan 2 Januari 2026

MARDI telah menyelesaikan pemulangan baki RM2.10 juta bagi Projek Cannabinoid kepada KPKM selaras kelulusan Ketua Setiausaha (KSU) dan MOF, dan jumlah tersebut telah dikreditkan ke akaun Program Subsidi Ayam Penelusur 3.0. Sementara itu, Projek Ketum telah disiapkan dan diperakui oleh Mesyuarat Jawatankuasa Teknikal Kajian Kebolehgunaan Kanabis dan Ketum untuk Tujuan Perubatan (JTCK) pada 24 Julai 2025, namun baki peruntukan projek masih belum dikembalikan. Bahagian Sekuriti Makanan (BSM) KPKM telah mengeluarkan permintaan rasmi kepada MARDI untuk pengesahan dan pemulangan baki peruntukan. MARDI mengesahkan baki peruntukan Projek Kajian Kebolehlaksanaan Pembangunan Industri Ketum yang sedia untuk dipulangkan berjumlah RM0.66 juta. Pengesahan baki telah dibuat pada 20 November 2025 dan MARDI dalam proses memulangkan baki tersebut.

Maklum balas MITI diterima pada 2 Januari 2026

Kesemua projek Dana Berimpak Tinggi dari MIDA telah selesai membuat tuntutan sepenuhnya. Berikutan pemberian geran ini telah melebihi kos projek ditetapkan, maka jumlah RM33.97 juta tersebut telah digunakan untuk membayar komitmen projek ini yang telah diluluskan dan masih berstatus dalam pelaksanaan.

Bagi Program Pembangunan Pengeluaran Produk Nilai Tambah Tinggi dan Kompleks dari MIDF, penggunaan baki peruntukan adalah bagi memastikan kesinambungan pelaksanaan program dan mengelakkan gangguan terhadap projek yang sedang

berjalan. MIDF akan memastikan baki peruntukan diurus selaras dengan garis panduan kewangan yang ditetapkan.

MITI akan mendapatkan kelulusan khas secara menyeluruh bagi program ini daripada KE/MOF sebagai projek sambungan untuk membayar komitmen sedia ada di bawah projek yang sama sehingga selesai, yang mana tempoh pelaksanaan/pembayaran projek adalah melangkaui RMK.

Pendapat Audit	Baki geran penyelidikan yang tidak dipulangkan di empat kementerian berjumlah RM183.11 juta melibatkan 7,904 projek menunjukkan kelemahan dalam pengurusan kawalan kewangan, pemantauan projek dan tatacara penutupan projek. Ini juga menunjukkan dana penyelidikan tidak digunakan secara cekap untuk memberi impak yang ditetapkan.
-----------------------	---

5.3.2. Ketidakpatuhan Syarat Perjanjian/Garis Panduan

- a. Perenggan 20, Garis Panduan Penyediaan RMKe-12 menetapkan prestasi pelaksanaan menjadi pengukur utama dalam penentuan kejayaan sesebuah projek pembangunan. Bagi membantu kementerian/agensi membuat perancangan projek pembangunan yang akan dilaksana dalam RMKe-12, akta/pekeliling/garis panduan yang masih berkuat kuasa perlu dipatuhi.

5.3.2.1. Akaun Bank Berasingan Tidak Diwujudkan untuk Penyaluran Dana

- a. Klausula 4.1.3, Perjanjian Dana Penyelidikan Strategik MOSTI oleh Agensi Pelaksana dan Pemantau (SRF-APP) antara Kerajaan Malaysia dan MIMOS Berhad bertarikh 1 November 2021 menetapkan Agensi Pelaksana dan Pemantau (APP) hendaklah mempunyai akaun bank berasingan bagi pengurusan dana dan diasingkan daripada perniagaan yang lain.
- b. Merujuk Perenggan 7 (ii), Terma Rujukan APP di bawah MOSTI dalam Lampiran 2, Garis Panduan SRF-APP bertarikh 3 Januari 2025, APP dikehendaki mewujudkan akaun bank yang berasingan bagi tujuan penyaluran peruntukan daripada MOSTI dan pemantauan transaksi perbelanjaan program/projek.

- c. Semakan Audit mendapati **MIMOS Berhad tidak mewujudkan akaun bank berasingan untuk penyaluran peruntukan dari MOSTI.** Bagaimanapun, pihak **MOSTI telah menyalurkan dana ke akaun sedia ada milik MIMOS Berhad sejumlah RM65.78 juta** sehingga bulan Ogos 2024. MIMOS Berhad memaklumkan pembukaan beberapa akaun bank akan menambah kerumitan operasi dan meningkatkan risiko kesilapan. Penerimaan dan perbelanjaan Dana SRF-APP juga direkodkan melalui sistem kewangan SAP syarikat serta setiap dana direkod secara individu dengan menggunakan kod dana dan pusat kos yang unik bagi tujuan pemantauan. **Sehingga 30 Jun 2025, baki projek berjumlah RM20.17 juta masih belum dibelanjakan.**
- d. Ketiadaan akaun bank berasingan bagi dana SRF-APP menyukarkan pihak MOSTI mengenal pasti dan menjejaki aliran penggunaan dana dengan tepat. Perkara ini juga memberi risiko kepada penyalahgunaan dana oleh APP untuk tujuan lain dan menyulitkan proses kutipan semula sekiranya terdapat keperluan pemulangan baki dana kepada Kerajaan.

Maklum balas MOF diterima pada 24 November 2025

MOF berpandangan pendekatan yang dilaksanakan oleh MOSTI adalah bentuk kawalan dalaman bertujuan untuk menambah baik aspek pengurusan kewangan. Ini selaras dengan AP 13 (b) mengenai tanggungjawab Pegawai Pengawal dalam pelaksanaan atau pentadbiran sesuatu projek/program dan AP 13 (c) mengenai tanggungjawab berkaitan pemantauan.

Maklum balas MIMOS Berhad diterima pada 12 Disember 2025

Pada 23 September 2025, MIMOS Berhad telah memindahkan sejumlah RM1 juta ke akaun baru manakala baki sejumlah RM17 juta telah dimasukkan pada 3 Disember 2025. Baki akaun SRF bertarikh 3 Disember 2025 adalah berjumlah RM17.71 juta selepas perbelanjaan projek berkaitan SRF berjumlah RM2.46 juta dalam tempoh bulan Julai hingga November 2025.

Maklum balas MOSTI diterima pada 12 Disember 2025 dan 5 Januari 2026

MOSTI telah mengeluarkan surat peringatan kepada sembilan APP bagi pewujudan akaun khas untuk penyaluran dana SRF-APP pada 30 Jun 2025. MIMOS Berhad telah membuka akaun bank berasingan pada 30 Julai 2025. MOSTI juga telah mengeluarkan surat arahan pemindahan peruntukan bagi Dana SRF-APP ke Akaun Khas kepada semua APP pada 24 Disember 2025.

**Pendapat
Audit**

Ketiadaan akaun bank berasingan menunjukkan kelonggaran/kelemahan kawalan dalaman dan tadbir urus kewangan yang berisiko kepada perbelanjaan yang tidak sewajarnya.

5.3.2.2. Baki Projek Tamat Belum Dikutip Semula Berjumlah RM5.58 Juta

- a. Merujuk kepada Subklausu Penamatan Projek, Perjanjian R&D Fund antara Kementerian Tenaga, Sains, Teknologi, Alam Sekitar dan Perubahan Iklim (MESTECC) dan penerima dana menyatakan selepas penamatan perjanjian, entiti hendaklah membayar balik kepada Kerajaan keseluruhan dana yang telah dibayar oleh Kerajaan dalam tempoh 30 hari dari Tarikh Notis Penamatan.
- b. Perenggan 7, Pekeliling Perbendaharaan Malaysia, WP10.6 Pengurusan Akaun Belum Terima (ABT) menetapkan perkara mengenai tanggungjawab Pegawai Pengawal untuk memungut semua terimaan termasuk Akaun Belum Terima selaras dengan AP. Pegawai yang bertanggungjawab ke atas tunggakan ABT serta gagal mengambil tindakan mengutip balik tunggakan boleh dikenakan tindakan surcaj atau tatatertib.
- c. Sebanyak 10 projek telah ditamatkan oleh pihak Kerajaan kerana entiti gagal memenuhi obligasi yang ditetapkan dan sejumlah RM6.47 juta telah disalurkan kepada entiti ini selepas perjanjian ditandatangani. Bahagian Dana MOSTI telah membuat semakan semula amaun yang sepatutnya dikutip dengan mengambil kira pencapaian carta perbatuan dan penggunaan peruntukan yang telah disalurkan dan baki yang sepatutnya dikutip berjumlah RM6.40 juta berdasarkan notis penamatan. Bagaimanapun, hanya RM0.82 juta dapat dikutip manakala **sejumlah RM5.58 juta masih belum dikutip sehingga 30 Jun 2025 dan tidak dilaporkan sebagai ABT di peringkat MOSTI.**
- d. Kelemahan kutipan semula berlaku kerana tiada pemantauan secara khusus dibuat oleh Bahagian Dana MOSTI untuk menyegerakan proses tuntutan semula dari agensi pelaksana. Selain itu, peringatan kepada agensi pelaksana hanya dibuat melalui e-mel tanpa penyenggaraan rekod khas kutipan. Tindakan kutipan hanya dilaksanakan oleh Bahagian Dana berdasarkan pendekatan pentadbiran dalaman tanpa *Standard Operating Procedure* (SOP) yang jelas.

- e. Tunggakan ABT yang tidak dapat dikenal pasti dengan jelas, menyukarkan Kementerian mengambil tindakan yang sewajarnya serta berisiko untuk dihapus kira dan boleh menyebabkan kehilangan hasil kepada Kerajaan.

Maklum balas MOF diterima pada 24 November 2025

MOF berpandangan MOSTI perlu menambah baik prosedur pengurusan pemberian dana sedia ada dan memantapkan lagi kaedah pemantauan projek bagi memastikan ABT dapat dikenal pasti lebih awal dan dibuat kutipan semula. Ketetapan ini adalah selaras dengan AP 89A (b) yang menggariskan bahawa Pemungut dan Pegawai Pengawal bertanggungjawab untuk mengambil tindakan memungut semua ABT. Sekiranya terdapat hutang lapuk untuk dihapus kira, tindakan hendaklah diambil selaras dengan AP 328.

Maklum balas MOSTI diterima pada 12 Disember 2025 dan 5 Januari 2026

Bahagian Dana sedang meneliti dan menambah baik SOP kutipan balik yang komprehensif dan Pasukan *Task Force* telah ditubuhkan pada 4 Julai 2025 bagi meneliti isu tuntutan bayaran balik dengan sasaran penyelesaian dalam tempoh enam bulan sebelum diangkat kepada Penasihat Undang-undang MOSTI.

Selain itu, langkah penambahbaikan turut merangkumi pembangunan dan penguatkuasaan SOP yang selaras dengan tatacara kewangan, menambah baik sistem/pangkalan data pemantauan yang sistematik dan pelaksanaan tindakan penguatkuasaan lebih tegas terhadap entiti yang gagal membayar balik.

Memo berkenaan ABT telah dikemukakan kepada Bahagian Kewangan pada 28 Ogos 2025 untuk tindakan seterusnya dan akan dimasukkan dalam Laporan Jawatankuasa Pengurusan Kewangan dan Akaun akan datang.

Sebagai langkah memperkemas urusan ABT, Bahagian Dana akan mewujudkan unit khusus memantau urusan berkaitan ABT. Di peringkat Kementerian, setiap Pusat Tanggungjawab (PTJ) perlu melantik *Focal Person* yang berperanan untuk melaksanakan kawalan ABT di peringkat PTJ.

Pendapat Audit

Baki projek tamat yang belum dikutip sejumlah RM5.58 juta dan tidak dilaporkan sebagai ABT merupakan kelemahan dalam proses pemantauan kutipan tunggakan.

5.3.2.3. Kutipan Hasil oleh Cradle Fund Sdn. Bhd. (CFSB) Tanpa Kelulusan

- a. Berdasarkan Perkara 20, Garis Panduan Penyediaan RMKe-12 tahun 2021 hingga 2025, kementerian/agensi tidak dibenar membuat sebarang pindaan skop projek yang telah diluluskan bagi memastikan keberkesanan perancangan dan pelaksanaan projek. Sebarang pindaan hendaklah mendapat kelulusan KE.
- b. Berdasarkan surat pelantikan CFSB sebagai agensi pelaksana bagi melaksanakan projek/program pembangunan MOSTI bagi tahun 2021 hingga 2025, CFSB bersetuju dengan terma yang ditetapkan seperti berikut:
 - i. Memastikan penggunaan peruntukan perbelanjaan pembangunan hanya mengikut tujuan dan skop yang diluluskan;
 - ii. Mengembalikan baki peruntukan perbelanjaan pembangunan selepas projek berakhir (sekiranya ada);
 - iii. Menyediakan carta perbatuan pelaksanaan projek; dan
 - iv. Memohon dan mendapatkan kelulusan MOSTI bagi perkara-perkara seperti penggunaan selain daripada tujuan asal; penggunaan baki peruntukan untuk tujuan lain; dan pelanjutan tempoh penggunaan peruntukan.
- c. Berdasarkan klausa perjanjian Cradle Investment Programme (CIP) Sprint, apabila syarikat berjaya mencapai *success trigger point* dalam tempoh pembiayaan, CFSB mengikut budi bicara mutlaknya boleh menukar jumlah yang telah dibayar kepada geran separa (partial grant), di mana syarikat akan diwajibkan untuk membayar balik kepada CFSB sebanyak 30% daripada jumlah yang dibayar bersama dengan yuran pentadbiran (administrative fee) berjumlah RM10,000.
- d. Mesyuarat Lembaga Pengarah CFSB Bil. 7/2021 pada 7 Oktober 2021 telah membincangkan terma dan syarat bagi *success trigger* termasuk tuntutan semula 30% geran yang disalurkan. Bagaimanapun, kebenaran CFSB untuk mengutip caj yuran pentadbiran sejumlah RM10,000 tidak dibincangkan dalam mesyuarat tersebut. **Berdasarkan keputusan Mesyuarat Lembaga Pengarah Bil. 8/2021 pada 30 November 2021, SOP program termasuk *success trigger* adalah tertakluk kepada kelulusan MOSTI dan MOF.**

- e. Berdasarkan permohonan NOC kepada EPU oleh MOSTI bertarikh 15 Februari 2022, program pembiayaan baru yang diperkenalkan oleh CFSB adalah berbentuk geran bersyarat. Bagaimanapun, tiada perincian lanjut berkaitan *success trigger* dan caj yuran pentadbiran dinyatakan dalam skop program tersebut.
- f. Merujuk kepada rekod kewangan CFSB, sejumlah RM2.55 juta telah diterima daripada 14 syarikat penerima dana bagi Program CIP CFSB yang telah mencapai *success trigger point* bagi tempoh tahun 2021 hingga bulan Jun 2025. Kutipan *success trigger* daripada pendapatan atau pelaburan syarikat penerima geran diiktiraf sebagai hasil pendapatan kepada CFSB.
- g. Pihak Audit mendapati CFSB telah membuat **kutipan *success trigger* dan caj yuran pentadbiran sejumlah RM2.55 juta daripada syarikat penerima dana tanpa kelulusan KE dan MOSTI**. Selain itu, **pihak CFSB tidak mendapatkan kelulusan SOP program termasuk *success trigger* selaras dengan keputusan Mesyuarat Lembaga Pengarah CFSB**. Caj yuran pentadbiran berjumlah RM10,000 bagi *success trigger* juga tidak dinyatakan dalam SOP tersebut.

Maklum balas MOF diterima pada 24 November 2025

Berdasarkan semakan, *success trigger* adalah hasil daripada pelaburan syarikat dan bukan daripada hasil dana geran Kerajaan. Perkara ini sepatutnya diputuskan secara jelas dalam Mesyuarat Lembaga Pengarah seperti mana urusan-urusan kewangan yang lain. Selain itu, garis panduan dan SOP yang disediakan perlu ditambah baik dengan terma yang lebih jelas dan lengkap berkaitan *success trigger* bagi memudahkan pematuhan pihak syarikat serta pemantauan oleh Kementerian Kawal Selia dan Agensi Pusat.

Maklum balas MOSTI dan CFSB diterima pada 12 Disember 2025 dan 5 Januari 2026

Pelaksanaan projek tertakluk kepada kelulusan Skop dan Komponen dalam MyProjek. Bagaimanapun, ketetapan menuntut semula 30% geran yang disalurkan dan yuran pentadbiran tidak dinyatakan dalam skop. Pelaksanaan projek tertakluk kepada tatakelola CFSB. SOP CIP Spark dan CIP Sprint yang diluluskan Lembaga Pengarah pada 30 November 2021 tertakluk kelulusan MOSTI dan MOF. Dalam hal ini, CFSB telah mengemukakan permohonan NOC bagi pertukaran program CIP Ignite dan CIP Accelerate kepada CIP Spark dan CIP Sprint melalui MOSTI. EPU melalui surat

bertarikh 8 Mac 2022, telah meluluskan pewujudan dua program baru, iaitu Geran CIP Spark dan CIP Sprint.

Permohonan yang dikemukakan oleh CFSB kepada MOSTI tidak menyatakan secara khusus berkaitan *success trigger* dan caj yuran pentadbiran. Permohonan NOC yang dikemukakan kepada KE melalui MOSTI hanya menyentuh perkara berkaitan skop pembiayaan baru bagi CIP Spark dan CIP Sprint tanpa perincian SOP yang menjelaskan berkenaan *success trigger* dan caj yuran pentadbiran. CFSB akan menambah baik klausa *success trigger* agar lebih jelas.

Surat Permohonan Kelulusan SOP bagi Program CIP Spark dan CIP Sprint oleh CFSB telah dikemukakan kepada MOF untuk pertimbangan melalui surat MOSTI bertarikh 31 Disember 2025. MOSTI juga melalui surat bertarikh 31 Disember 2025 telah mengeluarkan teguran kepada Ahli Lembaga Pengarah CFSB berhubung pelaksanaan SOP CIP Spark dan CIP Sprint tanpa kelulusan.

Pendapat Audit	Kutipan hasil CFSB tanpa kelulusan KE dan MOSTI merupakan isu tatakelola melibatkan ketidakpatuhan terhadap kuasa melulus dan tidak wajar dikenakan kepada syarikat penerima dana. Selain itu, SOP program tidak mendapat kelulusan MOSTI dan MOF selaras keputusan Lembaga Pengarah CFSB.
-----------------------	---

5.3.2.4. Peruntukan Pembangunan R&D&C&I MARDI Digunakan bagi Perbelanjaan Mengurus

- a. Garis Panduan RMKe-12 menetapkan bahawa kementerian/agensi perlu mematuhi klasifikasi pembiayaan peruntukan berdasarkan Senarai Klasifikasi Pembiayaan Projek di bawah Belanja Pembangunan (DE) dan Belanja Mengurus (OE). Perbelanjaan seperti penyenggaraan sistem dan yuran langganan/lesen perisian bukan secara program/pakej, perolehan perkhidmatan ICT serta perbelanjaan lain seperti bayaran bil utiliti, tuntutan perjalanan dan bayaran emolumen, elaun dan bantuan tunai kakitangan termasuk lantikan kontrak/sementara dikategorikan OE di bawah peruntukan mengurus.
- b. Berdasarkan Peraturan Kewangan MARDI, selain daripada sumber peruntukan mengurus yang diterima daripada KPKM, pihak MARDI turut membiayai perbelanjaan jenis mengurus menggunakan Wang Rezab MARDI (WRM). Skop perbelanjaan WRM seperti Perenggan 4.2.5.d, Peraturan Kewangan MARDI

menetapkan antaranya termasuk perbelanjaan bagi aset, perkhidmatan penyelenggaraan, pembaikan/naik taraf, emolumen dan pelaburan.

- c. Analisis Audit dijalankan terhadap 14 projek pembangunan R&D&C&I yang diluluskan oleh KE kepada MARDI dan dua projek khas di bawah Bahagian Sekuriti Makanan dengan kos siling berjumlah RM137.50 juta. Sehingga 30 Jun 2025, sejumlah RM114.15 juta telah dibelanjakan berbanding RM109.28 juta peruntukan diterima di mana lebihan perbelanjaan adalah ditampung menggunakan pendahuluan daripada WRM.
- d. Hasil analisis Audit mendapati **MARDI telah menggunakan sejumlah RM33.80 juta (29.6%) daripada peruntukan R&D&C&I yang diterima daripada KPKM untuk tujuan perbelanjaan mengurus** berbanding sejumlah RM114.15 juta yang telah dibelanjakan. Perbelanjaan mengurus ini adalah bertentangan dengan ketetapan Belanja OE dan DE dalam Garis Panduan Penyediaan RMKe-12 tersebut. Maklumat lanjut adalah seperti dalam **Jadual 9**.


JADUAL 9
BELANJA MENGURUS MENGGUNAKAN PERUNTUKAN PROJEK PEMBANGUNAN R&D&C&I MARDI DAN PROJEK KHAS DALAM RMKe-12 SEHINGGA 30 JUN 2025

PROJEK	KOS PROJEK (RM Juta)	PERUNTUKAN DITERIMA (RM Juta)	PERBELANJAAN (RM Juta) (a)	JUMLAH BELANJA MENGURUS (RM Juta) (b)	PENGGUNAAN BELANJA OE DARIPADA JUMLAH PERBELANJAAN (%) (c) = (b)/(a) x 100
14 Projek Pembangunan R&D&C&I MARDI	132.50	104.28	111.62	33.09	29.6
2 Projek Khas ditawarkan Bahagian Sekuriti Makanan	5.00	5.00	2.53	0.71	28.1
JUMLAH (RM Juta)	137.50	109.28	114.15	33.80	29.6

Sumber: Laporan Perbelanjaan Projek Pembangunan R&D&C&I MARDI – RMKe-12

- e. Analisis jenis perbelanjaan mengurus berjumlah RM33.80 juta menggunakan peruntukan pembangunan adalah seperti dalam **Rajah 5**. Perbelanjaan operasi tertinggi melibatkan bayaran tuntutan perjalanan pegawai sejumlah RM12.90 juta (38.2%) dan bayaran emolumen/elaun kakitangan kontrak yang terdiri daripada Pembantu Awam, Pembantu Penyelidik dan Penolong Pegawai Penyelidik sejumlah RM10.90 juta (32.3%).

RAJAH 5 ANALISIS BELANJA MENGURUS MENGGUNAKAN PERUNTUKAN PEMBANGUNAN



Sumber: Laporan Perbelanjaan, Bahagian Kewangan MARDI

- f. Perkara ini berlaku disebabkan perenggan 5.5.5.a. dan m. dalam Peraturan Kewangan MARDI yang diluluskan oleh Pengurusan Tertinggi MARDI membenarkan perbelanjaan bagi jenis mengurus dicajkan di bawah peruntukan sama ada Peruntukan Pembangunan, Projek R&D, Projek Khas dan lain-lain peruntukan bagi menampung kekurangan peruntukan mengurus melalui Wang Rezab MARDI.
- g. Penggunaan peruntukan pembangunan bagi membiayai pelbagai perbelanjaan mengurus yang berulang dan bersifat pentadbiran memberi kesan kepada kemajuan projek serta tidak selaras dengan objektif asal pembiayaan peruntukan.

Maklum balas KPKM diterima pada 19 November 2025

KPKM mengambil maklum ketidakpatuhan penggunaan peruntukan pembangunan oleh MARDI dan akan mendapatkan penjelasan serta pelan tindakan pembetulan, termasuk penyelarasan peraturan kewangan dalaman MARDI selari dengan peraturan Perbendaharaan yang sedang berkuat kuasa.

Maklum Balas KE pada 19 November 2025

Semua peruntukan DE adalah tertakluk kepada Garis Panduan RMKe-12. Pegawai Pengawal kementerian terlibat bertanggungjawab memastikan pematuhan dibuat sepenuhnya. Garis panduan perbelanjaan yang dikeluarkan oleh kementerian/agensi pelaksana hendaklah selari dengan Garis Panduan KSP RMKe-12 dan Garis Panduan RMK13.

Kebenaran diberikan kepada tuntutan perjalanan/emolumen bagi sesuatu projek dan hanya dibenarkan untuk projek tersebut sahaja, manakala pengambilan sumber manusia dan aset perlulah menggunakan peruntukan OE kementerian berkaitan.

Maklum balas MOF diterima pada 24 November 2025

Secara prinsip, semua perbelanjaan perlu dibelanjakan berdasarkan skop projek, syarat serta tujuan yang telah ditetapkan khususnya perbelanjaan pembangunan yang disediakan lengkap dengan skop projek yang spesifik. Bagaimanapun, sekiranya ada keperluan kritikal dan mendesak untuk menggunakan peruntukan pembangunan bagi menampung kekurangan peruntukan mengurus dan wang rezab BBP/syarikat, perkara ini perlu dirujuk kepada MOF untuk pertimbangan.

Maklum balas MARDI diterima pada 2 Januari 2026

MARDI akur dengan penemuan pihak Audit seperti yang dinyatakan. MARDI telah merangka tindakan pembetulan dan penambahbaikan supaya pelaksanaan Projek R&D&C&I di bawah RMK13 mematuhi sepenuhnya garis panduan dan peraturan kewangan yang ditetapkan.

Kertas Pertimbangan Memohon Kelulusan Penambahbaikan Peraturan Kewangan MARDI (PKM) akan dibentangkan dalam Mesyuarat Khas Jawatankuasa Kewangan Lembaga MARDI (JKLM) Bil.1/2026 yang dijadualkan pada 5 Februari 2026 untuk semakan terperinci dan perakuan ahli mesyuarat.

Pendapat Audit	Penggunaan peruntukan pembangunan R&D&C&I berjumlah RM33.80 juta untuk skop operasi dan pentadbiran adalah bertentangan dengan peraturan yang telah ditetapkan dalam Garis Panduan RMKe-12.
-----------------------	--

5.3.3. Projek Naik Taraf Bangunan dan Fasiliti Berkulat di UKM Belum Disiapkan Menjejaskan Aktiviti Penyelidikan

- a. Dua blok Bangunan Sains Biologi dan Sains Kimia, Fakulti Sains dan Teknologi (FST) UKM Kampus Bangi berkeluasan 39,284 m² yang telah dibina pada tahun 1980 telah mengalami masalah serangan kulat sejak tahun 2010. Bangunan ini dalam keadaan sangat kritikal dan tidak selamat diduduki akibat penyebaran kulat yang serius menyebabkan bangunan ditutup dan tidak digunakan sejak tahun 2020. Pihak UKM telah mengosongkan dua blok bangunan ini pada bulan Disember 2020 dan diserahkan kepada pihak Jabatan Kerja Raya (JKR) untuk

dilaksanakan skop kerja seperti naik taraf, rawatan bangunan dan kelengkapan peralatan makmal pada tahun 2023. Isu pengudaraan, pengubahsuaian fungsi bilik dan binaan kemudahan/struktur yang mengandungi asbestos telah menyebabkan pembiakan dan penyebaran kulat di dinding dan siling bangunan seperti dalam **Gambar 1** hingga **Gambar 4**.

GAMBAR 1



Makmal FST, UKM
- Penyebaran Kulat di Siling Bangunan
(Sumber: Laporan UKM Tahun 2020)

GAMBAR 2



Makmal Penyelidikan Siswazah, UKM
- Penyebaran Kulat di Siling Bangunan
(Sumber: Laporan UKM Tahun 2020)

GAMBAR 3



Makmal Penyelidikan Siswazah, UKM
- Penyebaran Kulat di Dinding Bangunan
(Sumber: Laporan UKM Tahun 2020)

GAMBAR 4



Makmal Penyelidikan Siswazah, UKM
- Penyebaran Kulat di Dinding Bangunan
(Sumber: Laporan UKM Tahun 2020)

- b. Projek Menaik Taraf Bangunan dan Fasiliti Berkulat serta Berisiko Kesihatan di Kampus UKM Bangi berjumlah RM43.28 juta telah ditawarkan kepada Syarikat 181682-M dan Pengarah JKR Negeri Selangor selaku Pegawai Penguasa Projek. Berdasarkan Klausa 2.0, Dokumen Kontrak yang ditandatangani antara JKR Malaysia dan Syarikat 181682-M pada 30 Mac 2023 menyatakan tempoh kontrak bermula pada 12 April 2023 dan tamat pada 7 Oktober 2025.
- c. **Projek ini telah diluluskan dua EOT selama 15 bulan dan dijangka siap pada 6 Januari 2027.** EOT ini disebabkan oleh kelewatan pihak JKR untuk melantik subkontraktor mekanikal dan elektrik. Selain itu, projek ini mendapat 11 Arahan Perubahan Kerja (APK) dengan tambahan kos berjumlah RM3.04 juta disebabkan oleh penambahan skop setelah penilaian tapak dijalankan

terutamanya kerja-kerja yang melibatkan kerosakan dalaman. Maklumat projek adalah seperti dalam **Jadual 10**.

JADUAL 10
MAKLUMAT PROJEK

PERKARA	BUTIRAN
Nama Projek	Menaik Taraf Bangunan dan Fasiliti Berkulat serta Berisiko Kesihatan di Kampus UKM Bangi
Pegawai Penguasa	Pengarah JKR Negeri Selangor
Nilai Projek Asal	RM43.28 juta
Objektif	Mewujudkan persekitaran pembelajaran, penyelidikan dan pekerjaan yang sihat dan selamat
Tempoh Projek Asal	12 April 2023 – 7 Oktober 2025
Tempoh Projek Selepas EOT	6 Januari 2027 (2 EOT selama 15 bulan)
APK	11 APK berjumlah RM3.04 juta

Sumber: UKM dan JKR

- d. Semakan Audit mendapati **kemajuan fizikal projek hanya mencapai sebanyak 34% setakat bulan Oktober 2025**. Keadaan makmal yang sedang dinaik taraf semasa lawatan pihak Audit pada 12 November 2025 adalah seperti dalam **Gambar 5** dan **Gambar 6**. Kerja rawatan kulat di Bangunan P13 Sains Kimia belum dilaksanakan serta **Bangunan P15 Sains Kimia masih digunakan dan belum diserahkan lagi kepada JKR** seperti dalam **Gambar 7** dan **Gambar 8**.

GAMBAR 5



Tingkat 1, Makmal Sains Biologi UKM
- Kulat di Siling Bangunan
(12.11.2025)
(Sumber: Jabatan Audit Negara)

GAMBAR 6



Auditorium, Bangunan Sains Biologi UKM
- Kulat di Siling Bangunan
(12.11.2025)
(Sumber: Jabatan Audit Negara)

GAMBAR 7



Makmal di Bangunan P13 Sains Kimia UKM
- Kerja-Kerja Rawatan Kulat Belum Dilaksanakan
(12.11.2025)
(Sumber: Jabatan Audit Negara)

GAMBAR 8



Bangunan P15 Sains Kimia UKM
- Bangunan Berkulat Masih Digunakan
(12.11.2025)
(Sumber: Jabatan Audit Negara)

- e. Kerosakan ini menyebabkan UKM terpaksa menanggung kos tambahan berjumlah RM1.81 juta untuk sewaan makmal luar, naik taraf ruang dewan, kos penyimpanan sampel, penggantian aset dan perabot bagi memastikan 251 projek penyelidikan berjumlah RM41.06 juta dapat diteruskan. Berikutan penutupan fasiliti utama akibat isu kulat, sebanyak 27 projek berjumlah RM3.09 juta juga telah diberikan kelulusan lanjutan masa antara enam hingga 21 bulan bagi memastikan kelangsungan projek. Selain itu, sebanyak 63 aset R&D bernilai RM0.72 juta perlu dipindahkan atau ditempatkan di lokasi lain bagi meneruskan aktiviti penyelidikan.
- f. Penangguhan selama 15 bulan dalam penyiapan projek ini oleh pihak JKR turut menyebabkan fasiliti tersebut masih tidak dapat digunakan serta berpotensi meningkatkan kos tambahan kepada pihak UKM bagi menampung dan meneruskan aktiviti penyelidikan sepanjang tempoh tersebut.

Maklum balas MOF diterima pada 24 November 2025

Kementerian dicadangkan mengambil langkah proaktif untuk mewujudkan jawatankuasa/platform di peringkat kementerian untuk meneliti projek-projek yang bermasalah di bawah kementerian, termasuk projek-projek di bawah BBP.

Maklum balas JKR diterima pada 25 November 2025

Projek ini dikategorikan di bawah projek pelaksanaan Pemulihan, Pemuliharaan, Ubah Suai dan Naik Taraf (PPUN) dan dilaksanakan secara *design to cost* memandangkan anggaran asal adalah melebihi kos yang diluluskan. Terdapat banyak skop yang memerlukan penambahan setelah penilaian tapak dijalankan. Pihak JKR telah membuat permohonan NOC kepada KPT dan UKM bagi kenaikan kos berjumlah

RM18 juta pada 20 Disember 2024. KPT melalui surat bertarikh 7 Mac 2025 memaklumkan tambahan RM10 juta telah diluluskan oleh Kementerian Ekonomi. Lanjutan itu, subkontraktor mekanikal bagi kerja sistem penyaman udara dan pengudaraan mekanikal telah dilantik bermula 28 Oktober 2025 sehingga 22 Disember 2026 (60 minggu). EOT ke-3 dijangka akan diangkat bagi skop *Nominated Subcontractor* (NSC) mekanikal (tempoh tambahan tersebut) serta pelaksanaan kerja kontrak semasa, iaitu penyiapan Blok Biologi skop NSC elektrik yang belum dilantik disebabkan oleh peningkatan kos sejumlah RM8 juta.

Maklum balas UKM diterima pada 26 November 2025

Penutupan makmal utama menyebabkan projek penyelidikan ditangguh atau dijalankan dalam keadaan kurang optimum. Ruang ganti adalah tidak mencukupi bagi menampung kapasiti penyelidikan dan peralatan. Kekurangan prasarana menjejaskan produktiviti penerbitan (lebih 40% belum dapat dicapai menjelang Oktober 2025), menyukarkan pengambilan pelajar baru, dan menjejaskan kualiti hasil penyelidikan kerana penyelidik terpaksa menyesuaikan tajuk kajian dengan kemudahan yang ada.

Pihak UKM telah memaklumkan kepada JKR (sewaktu penyediaan dokumen tender) bahawa Makmal P15 Bangunan Sains Kimia dilanjutkan tempoh penyerahan kerana keperluan mendesak untuk pengajaran dan pembelajaran. Mengikut jadual naik taraf kedua-dua Bangunan Biologi dan Kimia, aktiviti makmal di P15 akan dilaksanakan di Bangunan Biologi dan bahagian lain di Bangunan Kimia apabila Bangunan Biologi siap. UKM sedang melaksanakan pengosongan secara berfasa selari dengan penyediaan makmal sementara oleh JKR, dan akan menyerahkan Bangunan P15 kepada JKR apabila penempatan alternatif sedia dan selamat digunakan.

Pendapat Audit	Kegagalan menyiapkan projek mengikut jadual menyebabkan peningkatan kos projek sejumlah RM3.04 juta dan kos tambahan lain sejumlah RM1.81 juta serta memberi kesan kepada prestasi pencapaian 251 projek penyelidikan di UKM bernilai RM41.06 juta.
-----------------------	--

5.3.4. Projek Pembangunan COVID-19 *Screening and Monitoring Tool i-Breath* UTM

- a. Projek Pembangunan COVID-19 *Screening and Monitoring Tool i-Breath* di bawah Dana Penyelidikan Strategik (SRF) telah diluluskan oleh MOSTI kepada National Institutes of Biotechnology Malaysia (NIBM) dengan jumlah peruntukan sejumlah RM1.06 juta. NIBM bertanggungjawab sebagai Agensi Pelaksana dan Pemantau

(APP) manakala UTM dilantik untuk membantu APP dalam melaksanakan projek tersebut. Prototaip i-Breath dibangunkan bagi tujuan mengukur tahap karbon dioksida yang dihasilkan daripada pernafasan individu, sama ada yang mempunyai masalah pernafasan atau tanpa masalah pernafasan. Perjanjian bagi Dana SRF telah ditandatangani antara NIBM dan UTM pada 31 Mei 2022. Maklumat dan objektif projek adalah seperti dalam **Jadual 11**.

JADUAL 11
MAKLUMAT PROJEK

PERKARA	BUTIRAN
Program/Dana	Dana Pemacu – Geran Dana Penyelidikan Strategik (SRF)
Nama Projek	Projek Pembangunan COVID-19 <i>Screening and Monitoring Tool i-Breath</i>
Kementerian	MOSTI
Agensi Pemantau dan Pelaksana	National Institutes of Biotechnology Malaysia (NIBM)/ Universiti Teknologi Malaysia
Jumlah Dana R&D	RM1.06 juta
Objektif Projek	• 20 unit prototaip i-Breath bagi tujuan klinikal dan <i>home-based testing</i>; • Penilaian i-Breath dalam kumpulan besar pesakit COVID-19 melibatkan semua kategori (CAT1–3) serta penyakit pernafasan lain (SARS, pneumonia); dan • Pendaftaran i-Breath dengan Pihak Berkuasa Peranti Perubatan (MDA).
Tempoh Projek Asal	1 Januari 2022 – 31 Julai 2022 (7 bulan)
Tempoh Projek Selepas EOT	1 Januari 2022 – 31 Disember 2023 (24 bulan)

Sumber: Dokumen Perjanjian NIBM – UTM bertarikh 31 Mei 2022

b. Merujuk kepada laporan akhir bertarikh 5 Mei 2024, pihak Bahagian Dana MOSTI mengesahkan penyempurnaan projek ini telah disiapkan dan objektif projek tercapai. Pemeriksaan fizikal Audit pada 10 September 2025 bersama pihak Research Management Centre (RMC) UTM di Makmal Fakulti Kejuruteraan Elektrik (FKE), UTM Skudai mendapati perkara seperti berikut:

- i. **19 unit prototaip i-Breath tidak berada dalam makmal dan tiada dalam simpanan pihak UTM** manakala satu unit prototaip berada dalam simpanan pihak Bahagian Dana MOSTI. Pihak UTM telah mengeluarkan surat arahan kepada ahli pasukan penyelidik pada 1 Oktober 2025 untuk membuat laporan polis berkaitan ketiadaan 19 unit prototaip tersebut.
- ii. **Pengasingan tugas kewangan tidak diwujudkan bagi perolehan** berkaitan prototaip, ujian klinikal, bahan mentah dan analisis pasaran melibatkan 16 baucar berjumlah RM0.89 juta. Ketua Penyelidik selaku Ketua Jabatan telah melaksanakan pelbagai peranan (one-man show) bagi tujuan bayaran iaitu pemohon pesanan tempatan, pengesah pesanan

penghantaran, perakuan penerimaan barangan dan pengesahan invoice serta penyedia dan pengesah dokumen di peringkat PTJ.

iii. **Peranti i-Breath tidak didaftarkan sebagai peranti perubatan di bawah Pihak Berkuasa Peranti Perubatan (MDA).**

iv. Klausula 10.2.1, dokumen perjanjian antara NIBM dan UTM menetapkan pemilikan harta intelek projek adalah kepunyaan Kerajaan. Semakan Audit terhadap pangkalan data MyIPO berkaitan Projek i-Breath mendapati dua paten telah difailkan atas nama UTM sebagai pemilik manakala **hak cipta telah didaftarkan atas nama individu iaitu Ketua Penyelidik Projek**. Maklumat lanjut adalah seperti dalam **Jadual 12**.

JADUAL 12
HARTA INTELEK PROJEK i-BREATH

JENIS HARTA INTELEK	NOMBOR PERMOHONAN	TARIKH MOHON	STATUS	PEMILIK (OWNER)
Hak cipta (Copyright)	CRLY2021E02194	17 Jun 2021	<i>*Registered</i> 29 September 2021	Ketua Penyelidik
Paten	PI2023003399	8 Jun 2023	<i>Under substantive examination</i>	UTM
Paten	PI2023007389	4 Disember 2023	<i>Under substantive examination</i>	UTM

Sumber: Perbadanan Harta Intelek Malaysia

Nota : (*) - Algorithm for Identification of COVID-19 Using Breathing Pattern

c. Perkara ini berlaku kerana ketiadaan prosedur yang jelas berkenaan rekod aset berbentuk prototaip di peringkat RMC UTM dan pengecualian pengasingan tugas oleh Jabatan Bendahari serta ketiadaan mekanisme pemantauan di peringkat UTM dan MOSTI selepas projek siap untuk dikomersialkan. Kesannya, **projek pembangunan i-Breath bernilai RM1.06 juta tidak dapat dikomersialkan serta tidak menjaga kepentingan Kerajaan kerana hak cipta telah didaftarkan atas nama individu iaitu Ketua Penyelidik Projek tersebut.**

Maklum balas KE diterima pada 19 November 2025

KE berpandangan bahawa sebarang kehilangan aset Kerajaan perlu dilaporkan sebagaimana peraturan yang telah digariskan dalam Tatacara Pengurusan Aset Alih Kerajaan AM 2.8 Kehilangan Dan Hapus Kira yang menyatakan bahawa kehilangan aset alih Kerajaan hendaklah dilaporkan kepada Ketua Jabatan dengan serta-merta dan Ketua Jabatan yang bertanggungjawab hendaklah melaporkan kepada pihak polis kurang daripada 24 jam dari masa kehilangan aset tersebut. Dalam isu penetapan hak cipta pula, KE berpandangan bahawa hak cipta sesuatu prototaip hendaklah didaftarkan berdasarkan kepada garis panduan yang dikeluarkan oleh KPT atau IPT berkenaan.

Maklum balas MOF diterima pada 24 November 2025 dan 23 Januari 2026

MOF berpandangan projek ini menunjukkan tiada SOP dan garis panduan yang jelas dalam pengurusan R&D&C&I di peringkat UTM khususnya berkaitan pengurusan kewangan, perolehan dan aset. MOSTI juga melalui NIBM perlu mengemas kini prosedur semasa dalam penyaluran geran R&D&C&I secara kolaborasi atau lain-lain kerjasama bagi memastikan pemantauan dapat dilaksanakan dengan lebih berkesan dan objektif kajian boleh mencapai tahap dikomersialkan.

MOF berpandangan serius atas kelalaian atau ketidakcekapan dalam pengurusan kewangan termasuk kehilangan aset awam yang boleh dikenakan tindakan surcaj selaras dengan AP 303. Selain itu, penyelarasan terma teknikal berkaitan R&D&C&I perlu dilaksanakan bagi memastikan semua institut penyelidikan mempunyai terma dan garis panduan yang lengkap dan standard untuk diguna pakai sebagai rujukan dan pemantauan.

Perkara berkaitan pendaftaran, pemilikan paten dan hak cipta memerlukan penelitian lanjut antara institusi yang mewakili kerajaan atau pegawai penyelidik. Perkara ini perlu dikaji serta ditetapkan mengikut *nature* dan persekitaran R&D&C&I bagi memastikan peraturan yang dibangunkan tidak merencatkan minat penyelidik dan inovator untuk membuat kajian.

Maklum balas UTM diterima pada 26 November 2025

Pada 15 Oktober 2025, ahli kumpulan penyelidik projek ini telah membuat laporan polis di Balai Polis Taman Universiti berkaitan kehilangan 19 unit peranti berkenaan. Selain itu, UTM turut akan mengemukakan laporan lengkap pelaksanaan projek beserta penjelasan mengenai status baki 19 unit prototaip kepada MOSTI bagi tujuan rekod dan penutupan akhir projek.

RMC UTM memaklumkan bahawa Ketua Penyelidik telah memfailkan pendaftaran harta intelek atas nama individu penyelidik sendiri, tanpa melalui Innovation and Commercialisation Centre (ICC) UTM, iaitu pusat rasmi universiti yang bertanggungjawab terhadap urusan pengurusan dan pengkomersialan harta intelek. Hak cipta *Algorithm for Identification of COVID-19 Using Breathing Pattern* tersebut telah didaftarkan sebelum projek bermula.

Dari segi nilai tambah penyelidikan, UTM memaklumkan bahawa sekiranya mendapat kelulusan MOSTI, hasil teknikal dan pengetahuan yang diperoleh daripada pembangunan peranti i-Breath berpotensi dijadikan asas kepada penyelidikan lanjutan atau dikomersialkan melalui kerjasama dengan pihak industri.

Maklum balas MyIPO diterima pada 8 Disember 2025

Dua permohonan paten berkaitan peranti i-Breath masih dalam proses pemeriksaan substantif. Laporan pemeriksaan dijangkakan dikeluarkan sama ada penghujung Disember 2025 – penghujung Januari 2026. Sementara itu, satu hak cipta peranti kekal berdaftar atas nama Ketua Penyelidik, dan tiada sebarang permohonan pindaan, pemindahan hak milik atau penukaran nama pemilik difailkan selepas tarikh pemberitahuan pada 29 September 2021.

Maklum balas MOSTI diterima pada 12 Disember 2025

Projek i-Breath ini boleh dibentangkan di bengkel *Due Diligence* jika ahli pasukan projek ini bersedia untuk membuat pembentangan kepada panel penilai.

Maklum balas MDA diterima pada 2 Januari 2026


MDA mengesahkan peranti perubatan berdaftar dengan MDA adalah peranti RESPRO. MDA tidak dapat mengesahkan peranti ini sama dengan (identical) peranti i-Breath walaupun tujuan kedua-dua peranti ini hampir sama. MDA tidak dimaklumkan berkenaan pertukaran nama peranti daripada i-Breath kepada RESPRO.

Pendapat Audit	Projek peranti i-Breath bernilai RM1.06 juta yang tidak didaftar hak cipta atas nama Kerajaan merupakan aspek tatakelola melibatkan kelemahan dan ketidakcekapan pengurusan projek.
-----------------------	--

5.4. IMPAK PROGRAM R&D&C&I RMKe-12

- a. Objektif R&D&C&I RMKe-12 adalah untuk mempercepatkan penerimgunaan teknologi dan inovasi bagi memperkukuh ekosistem sains, teknologi dan ekonomi digital negara. DSTIN 2021–2030 dan SDG 9 menjadi panduan utama dalam usaha meningkatkan keupayaan teknologi, bilangan penyelidik dan perbelanjaan R&D. Kerajaan telah memperuntukkan sejumlah RM3.563 bilion bagi tempoh RMKe-12 untuk menyokong lebih 12,000 projek di bawah 79 program merentasi empat kementerian utama. Penyaluran dana sebenar berdasarkan prestasi perbelanjaan kementerian adalah sejumlah RM2.898 bilion dengan pengurangan sejumlah RM663 juta. Selain itu, prestasi perbelanjaan keseluruhan telah mencapai sebanyak 87.4% namun pencapaian fizikal projek hanya sebanyak 34.1% projek yang berjaya disiapkan. Pengurangan peruntukan dan prestasi fizikal projek yang rendah antaranya memberi impak kepada pencapaian Program R&D&C&I seperti di **Rajah 6**.

RAJAH 6
IMPAK PROGRAM R&D&C&I



Sumber: Jabatan Audit Negara

- b. Analisis Audit terhadap impak Program R&D&C&I adalah seperti berikut:
- i. Lima daripada enam objektif RMKe-12 belum dicapai;
 - ii. Tiga indikator SDG 9.5 belum dicapai;
 - iii. Kedudukan negara dalam Laporan **GII berada pada tangga ke-34** berbanding sasaran kedudukan 20 negara teratas;
 - iv. Pencapaian **GERD hanya 1.01%** berbanding sasaran 2.5% manakala pencapaian **BERD hanya 51.37%** berbanding sasaran 70%;
 - v. Sebanyak 50% inisiatif jangka pendek DSTIN belum dicapai manakala 58% inisiatif jangka pertengahan belum dicapai;
 - vi. Hanya **968 purata permohonan paten** dicapai bagi tempoh 2021 hingga 2024 berbanding sasaran 2,000 permohonan paten pada tahun 2025; dan
 - vii. Dua sasaran **KPI Universiti Penyelidikan belum dicapai** iaitu kedudukan satu RU dalam kelompok 10 universiti teratas di Asia dan dua RU dalam kelompok 100 universiti teratas di peringkat global. Bagaimanapun, hanya UM mencapai kedudukan ke-60 dalam kelompok 100 universiti teratas di peringkat global.

6. RUMUSAN KESELURUHAN AUDIT

Secara keseluruhannya, prestasi Perbelanjaan Kasar R&D (GERD) dan pelaksanaan projek yang rendah serta wujud kelemahan tadbir urus dan pemantauan telah menjejaskan keberkesanan program walaupun peruntukan signifikan dilaburkan oleh Kerajaan untuk memperkukuh ekosistem R&D&C&I. Reformasi struktur diperlukan meliputi aspek kawalan kewangan, pembangunan garis panduan, pematuhan perjanjian, pengurusan fasiliti dan aset R&D serta penilaian impak projek agar objektif strategik negara dalam inovasi dan teknologi tinggi dapat dicapai menjelang tahun 2030.

7. SYOR AUDIT

Pihak Audit mengambil maklum ulasan enam kementerian terlibat yang telah diaudit bagi program R&D&C&I. Berdasarkan rumusan keseluruhan, pihak Audit berpandangan penyelarasan secara berpusat bagi ekosistem R&D&C&I wajar dilaksanakan bagi memastikan penyeragaman dan pengukuhan aktiviti penyelidikan dalam meningkatkan tahap pencapaian dan keberkesanan R&D&C&I secara keseluruhan.

Bagi memastikan kelemahan yang dibangkitkan tidak berulang, pihak Audit mengesyorkan penambahbaikan seperti berikut:

7.1. Unit Pengurusan Penyelidikan (RMU)

KE memperkasakan pemantauan Unit Pengurusan Penyelidikan Berpusat bagi memperkemas dan memperkukuh tadbir urus R&D&C&I serta mengadakan penyelarasan dengan kementerian, institusi penyelidikan, universiti dan industri untuk pengumpulan data seterusnya menjejak kejayaan program/projek bagi memastikan keberkesanan penggunaan wang awam dan kejayaan pelaksanaan inisiatif penyelidikan negara.

7.2. Garis Panduan Kebangsaan R&D&C&I

KE menyediakan Garis Panduan Kebangsaan R&D&C&I bagi menambah baik pengurusan dana meliputi aspek tadbir urus, kawalan kewangan, penetapan bidang keutamaan, tahap kesiediaan teknologi (Technology Readiness Level – TRL), pendaftaran harta intelek dan mekanisme pemantauan/pelaporan bagi mengelakkan pertindihan skop dan ketelusan pengagihan dana.

7.3. Perkongsian Fasiliti dan Peralatan

KE dan MOSTI memperkukuhkan sistem berpusat bagi perkongsian fasiliti, kemudahan dan peralatan dari institusi penyelidikan, universiti dan industri untuk penyewaan, khidmat analitik dan nasihat teknikal bagi mengoptimumkan penggunaan aset negara dan mengurangkan kos pelaksanaan penyelidikan.

7.4. Peningkatan Projek R&D Berimpak Tinggi

KE dan kementerian pelaksana menjajarkan R&D yang berimpak tinggi untuk pengkomersialan, pemindahan teknologi, peningkatan harta intelek dan ahli saintis serta mewujudkan peluang pekerjaan dan keusahawanan bagi pertumbuhan ekonomi dan daya saing negara secara mampan.

2. Pengauditan Pematuhan Perbelanjaan Projek Pembangunan MyDigital ID oleh MIMOS Berhad

JABATAN AUDIT NEGARA

120
MAS - 2026
TAHUN

KEMENTERIAN SAINS, TEKNOLOGI DAN INOVASI
KEMENTERIAN DALAM NEGERI
JABATAN PERDANA MENTERI
MIMOS BERHAD
MAJLIS KESELAMATAN NEGARA

2. PENGAUDITAN PEMATUHAN PERBELANJAAN PROJEK PEMBANGUNAN
MyDIGITAL ID OLEH MIMOS BERHAD

ABSTRAK

MIMOS Berhad (MIMOS) telah dilantik sebagai agensi pelaksana bagi Projek Pembangunan MyDigital ID (Projek MyDID). Pengauditan ini dijalankan untuk menilai sama ada perbelanjaan Projek MyDID oleh MIMOS berjumlah RM28.13 juta daripada penyaluran pertama berjumlah RM80 juta dibuat secara teratur mengikut tadbir urus dan skop perjanjian. Skop pengauditan adalah dari Julai 2023 hingga Mac 2025.

Secara keseluruhan, terdapat kelemahan dalam perbelanjaan dan kawalan dalaman semasa pelaksanaan awal Projek MyDID di bawah pengurusan MIMOS. Struktur tadbir urus projek tidak berfungsi sebagaimana yang ditetapkan.

Dari aspek kewangan, pihak Audit mendapati sejumlah RM28.13 juta telah dibelanjakan tanpa kelulusan jawatankuasa ditetapkan yang merangkumi 11 sub-skop projek yang dibelanja tanpa/melebihi penyaluran peruntukan berjumlah RM4.08 juta dan perbelanjaan melebihi jumlah kos bagi satu sub-skop berjumlah RM70,000. Ini menunjukkan kelemahan kawalan dalaman dan ketidakpatuhan terhadap tadbir urus serta mandat yang ditetapkan. Selain itu, perbelanjaan resource cost, emolumen, kemudahan perubatan kakitangan dan kelengkapan pejabat berjumlah RM14.09 juta dibayar menggunakan dana pembangunan, bertentangan dengan Garis Panduan Pelaksanaan Projek Pembangunan Rancangan Malaysia Kedua Belas (RMKe-12), menunjukkan perbelanjaan tidak mengikut tujuan peruntukan (purpose of vote).

Dari aspek perolehan, pihak Audit mendapati pembelian peralatan Certificate Authority (CA), iaitu security cage dan door access dibuat tanpa kelulusan Makmal Kajian Nilai serta peralatan tersebut tidak digunakan menunjukkan kelemahan kawalan dalaman dan ketidakpatuhan prosedur kelulusan perolehan yang menjejaskan tadbir urus projek serta berlakunya pembaziran ke atas aset yang dibeli tidak digunakan untuk projek.


1. LATAR BELAKANG

1.1. Pada 21 Julai 2023, MIMOS Berhad (MIMOS) telah dilantik sebagai agensi pelaksana bagi Projek Pembangunan MyDigital ID (Projek MyDID) dan diletakkan di bawah Kementerian Dalam Negeri (KDN) serta Jabatan Pendaftaran Negara (JPN) yang bertindak sebagai agensi menyelia. KDN telah membuat penyaluran peruntukan pembangunan RM80 juta kepada MIMOS berdasarkan surat KDN bertarikh 12 Disember 2023. MIMOS bertanggungjawab untuk mengemukakan perincian peruntukan RM80 juta kepada KDN dan perbelanjaan akan dipantau serta disahkan oleh jawatankuasa yang telah ditetapkan. Perbelanjaan projek telah ditetapkan untuk mendapatkan kelulusan daripada jawatankuasa terlebih dahulu sebelum projek dilaksanakan. MIMOS telah memindahkan penyaluran pertama yang diterima daripada KDN berjumlah RM80 juta kepada My Digital ID Sdn. Bhd. (MYDIDSB) pada 20 Februari 2024, iaitu selepas MYDIDSB ditubuhkan. MYDIDSB merupakan syarikat *Special Purpose Vehicle* (SPV) yang telah ditubuhkan oleh MIMOS pada 15 Januari 2024 bagi melaksanakan Projek MyDID.

1.2. Pada 1 Mac 2024, Mesyuarat Jemaah Menteri bersetuju Majlis Keselamatan Negara (MKN) diberikan peranan sebagai agensi yang menyelia pelaksanaan Projek MyDID sehingga siap sepenuhnya. Perjanjian antara MKN dan MIMOS bertarikh 20 Disember 2024 menetapkan tempoh pelaksanaan projek bermula pada 21 Julai 2023 hingga 31 Disember 2025 melibatkan enam skop yang meliputi perkakasan ICT, pembangunan sistem aplikasi, perisian, rangkaian, perkhidmatan dan lain-lain.

1.3. MIMOS telah membelanjakan sejumlah RM28.13 juta untuk tempoh Disember 2023 hingga Mac 2025. Perincian perbelanjaan adalah seperti dalam **Carta 1**.

CARTA 1
PERBELANJAAN PROJEK MyDID OLEH MIMOS



Sumber: Maklumat Perbelanjaan Berdasarkan Dokumen Tuntutan MIMOS

2. OBJEKTIF PENGAUDITAN

Pengauditan ini dijalankan untuk menilai sama ada perbelanjaan Projek MyDID oleh MIMOS berjumlah RM28.13 juta daripada penyaluran pertama berjumlah RM80 juta dibuat secara teratur mengikut tadbir urus dan skop perjanjian.

3. SKOP PENGAUDITAN

Skop pengauditan adalah dari Julai 2023 hingga Mac 2025. Pengauditan dilaksanakan di MIMOS dan Agensi Keselamatan Siber Negara (NACSA), MKN, Jabatan Perdana Menteri (JPM) serta libat urus dengan KDN dan Kementerian Sains, Teknologi dan Inovasi (MOSTI).

4. METODOLOGI PENGAUDITAN

Pengauditan dijalankan dengan menyemak fail, minit mesyuarat, rekod dan dokumen yang berkaitan. Pemeriksaan fizikal dan temu bual bersama pegawai yang bertanggungjawab turut dijalankan.

5. PENEMUAN TERPERINCI AUDIT

Pengauditan telah dilaksanakan pada bulan Mei hingga Oktober 2025. Penemuan Audit dan maklum balas daripada MIMOS telah dibincangkan dalam Mesyuarat Penutup pada 20 November 2025. Penjelasan lanjut bagi setiap penemuan Audit adalah seperti dalam perenggan berikut:

5.1. Tadbir Urus dan Perbelanjaan RM28.13 Juta Tanpa Kelulusan Jawatankuasa Ditetapkan

- a. Klausula Mukadimah B, Lampiran C, Perenggan 3 surat bertarikh 12 Disember 2023 dalam Perjanjian Projek MyDID menyatakan MIMOS bertanggungjawab untuk mendapatkan kelulusan daripada Jawatankuasa Pemandu (JKP) dan Jawatankuasa Teknikal (JKT) projek sebelum sebarang pelaksanaan serta perbelanjaan dibuat.
- b. Perenggan 2, surat bertarikh 18 Disember 2023 daripada KDN kepada MIMOS menyatakan “bagi menyegerakan pelaksanaan Projek Identiti Digital Nasional (IDN)¹, MIMOS hendaklah mengemukakan perincian peruntukan dan senarai perolehan bagi proses *On Boarding* Perkhidmatan Awam sebaik sahaja perolehan tersebut dilaksanakan kepada JKT dan JKP untuk disahkan”. Perenggan 3 surat yang sama

¹ Projek IDN ini merujuk kepada Projek MyDID

menyatakan, “bagaimanapun, bagi tujuan pelaksanaan dan perolehan seterusnya dalam Projek IDN, masih tertakluk kepada Perenggan 3 surat bertarikh 12 Disember 2023”.

- c. Klausula 26 Perjanjian menyatakan tiada ubah suaian atau pindaan kepada mana-mana peruntukan Perjanjian ini berkuat kuasa atau mengikat Pihak-pihak melainkan jika ia dibuat secara persetujuan bersama dan dibuat secara bertulis melalui perjanjian tambahan secara khusus merujuk kepada perjanjian ini dan ditandatangani oleh Pihak-pihak. Peruntukan berkenaan dengan pindaan atau ubah suaian itu hendaklah sebagai tambahan kepada dan dibaca sebagai sebahagian daripada Perjanjian ini yang hendaklah terus berkuat kuasa dan berkesan sepenuhnya antara Pihak-pihak.
- d. Semakan Audit mendapati **MIMOS telah membentangkan pelan perbelanjaan projek dalam Mesyuarat JKT IDN** pada 2 Februari 2024 dan mesyuarat mengambil maklum mengenai pembentangan ini. **Mesyuarat ini bersetuju permohonan pelaksanaan Makmal Kajian Nilai dibuat semula kerana terdapat perubahan skop projek.** Seterusnya, pada 19 Februari 2024, **Mesyuarat JKP IDN bersetuju supaya MIMOS mengemukakan perincian spesifikasi projek kepada KDN bagi permohonan pelaksanaan Makmal Kajian Nilai.**
- e. MIMOS telah membelanjakan sejumlah RM28.13 juta untuk tempoh Disember 2023 hingga Mac 2025. Bayaran balik oleh MYDIDSB ke atas tuntutan MIMOS telah dibuat melalui lapan transaksi bayaran antara 6 Mei 2024 hingga 11 April 2025 berjumlah RM28.01 juta, manakala RM0.12 juta belum diterima oleh pihak MIMOS. Semakan Audit mendapati, **perbelanjaan RM28.13 juta telah dilaksanakan tanpa disahkan terlebih dahulu oleh JKT dan JKP projek,** iaitu jawatankuasa yang dilantik pada 29 Januari 2024 seperti yang dinyatakan melalui **surat bertarikh 12 Disember 2023.**
- f. Semakan Audit selanjutnya mendapati **perbelanjaan MIMOS ini telah disahkan pada 25 Oktober 2024 oleh JKP IDN, KDN yang dilantik pada tahun 2021 di bawah tadbir urus Projek IDN.** Bagaimanapun, **jawatankuasa ini bukanlah jawatankuasa yang dilantik seperti yang diarahkan melalui surat bertarikh 12 Disember 2023.** Jawatankuasa IDN, KDN yang dilantik pada tahun 2021 yang kemudiannya dibubarkan selepas mesyuarat berkenaan mengesahkan perbelanjaan MIMOS tersebut. Butiran lanjut seperti dalam **Jadual 1.**

JADUAL 1
BAYARAN BALIK TERHADAP TUNTUTAN MIMOS

BAYARAN BALIK TERHADAP TUNTUTAN MIMOS				
BIL.	TAHUN	TEMPOH DIKUNCI MASUK DALAM SISTEM KEWANGAN MIMOS	TARIKH TRANSAKSI BAYARAN BALIK KEPADA MIMOS	AMAUN BAYARAN BALIK KEPADA MIMOS (RM Juta)
1.	2024	Januari - Februari	06.05.2024	7.82
2.		April - Jun	28.06.2024	2.30
3.		Jun - Julai	19.08.2024	3.15
4.		Ogos - September	16.10.2024	4.44
5.		Oktober - November	20.12.2024	3.20
6.		April - November	Perbelanjaan belum diterima oleh MIMOS	0.12
JUMLAH				21.03
7.	2025	Disember 2024 - Februari 2025	25.03.2025	5.67
8.		Mac	10.04.2025	0.68
9.		Februari	11.04.2025	0.75
JUMLAH				7.10
JUMLAH KESELURUHAN				28.13

Sumber: Maklumat Perbelanjaan Berdasarkan Dokumen Tuntutan MIMOS

- g. Walau bagaimanapun, semakan Audit turut mendapati **tiada perjanjian tambahan dibuat untuk membatalkan/meminda Klausa Mukadimah B, Lampiran C, dalam Perjanjian Projek MyDID**, iaitu merujuk kepada pemakaian terhadap terma dan syarat untuk mendapatkan kelulusan daripada JKT dan JKP projek sebelum sebarang pelaksanaan serta perbelanjaan dibuat.

Maklum Balas MIMOS diterima pada 27 November 2025

Arahan dari pihak KDN dan juga JPM di mana MIMOS perlu menubuhkan syarikat SPV bagi menjayakan Projek MyDID. Semua urusan pengurusan dalaman dijalankan oleh syarikat SPV tersebut iaitu, MYDIDSB dengan bantuan urus tadbir oleh ahli lembaga syarikat berdasarkan keputusan yang telah dibuat oleh pegawai pengawal projek tersebut iaitu JPM, JKT, JKP dan Jawatankuasa Kabinet Majlis IDN.

Pihak pengurusan MYDIDSB mempunyai Bahagian Tadbir Urus Korporat dan operasinya sendiri yang memantau dan mengurus segala urusan projek, termasuk membuat segala keputusan berkaitan dengan projek. MYDIDSB juga mempunyai jawatankuasa perolehan, pengurusan projek dan lain-lain.

MYDIDSB mempunyai *Limits of Authority* (LOA) perolehan yang telah diluluskan oleh Lembaga Pengarah MIMOS. Segala perolehan yang diluluskan adalah mengikut LOA perolehan ini. Pengurusan dan keputusan Projek dibuat sepenuhnya oleh pihak pengurusan tertinggi MYDIDSB. Pihak MIMOS hanya menguruskan proses perolehan dan pembayaran bagi pihak MYDIDSB sebagai *shared service provider*.

MYDIDSB mempunyai Lembaga Tender sendiri yang dilantik oleh Ketua Setiausaha Negara yang diketuai oleh Ketua Setiausaha MOSTI dan dianggotai oleh wakil MOSTI, Kementerian Kewangan (MOF) dan Jabatan Perkhidmatan Awam. Walau bagaimanapun, semua keputusan proses perolehan MyDID yang diproses oleh MIMOS sebelum ini adalah tertakluk kepada autoriti pengurusan berdasarkan LOA MYDIDSB.

Berdasarkan Garis Panduan Perolehan Kumpulan MIMOS dan Garis Panduan MOF di mana semua perolehan kumpulan perlu dilakukan mengikut tatacara perolehan semasa yang berkuat kuasa, dengan itu fungsi perolehan kumpulan MIMOS dikendalikan oleh Jabatan Perolehan bagi pihak MYDIDSB berdasarkan kelulusan yang diperolehi daripada MYDIDSB.

Maklum Balas MOSTI diterima pada 9 Januari 2026

MOSTI mengambil perhatian bahawa perbelanjaan Projek IDN perlu mendapat pengesahan daripada jawatankuasa yang diberi mandat melalui surat bertarikh 12 Disember 2023.

Maklum Balas KDN diterima pada 9 Januari 2026

JKT Projek IDN yang dilantik telah bersidang pada 2 Februari 2024 hanya mengambil maklum dan tidak mengesahkan Pelan Perbelanjaan Projek IDN yang dibentangkan oleh MIMOS. Manakala Mesyuarat JKP IDN pada 19 Februari 2024 pula memutuskan bahawa Mesyuarat JKT IDN perlu bersidang sekali lagi selepas Mesyuarat JKP ini bersidang bagi melihat secara teliti perancangan dan perbelanjaan peruntukan bagi Projek IDN oleh MIMOS dan memastikan tatakelola pembayaran adalah teratur, bagi membantu penilaian dan pengesahan oleh JKP IDN.

Seterusnya, perbincangan berhubung status pelaksanaan Projek MyDID pada 6 Ogos 2024 telah bersetuju agar JKT IDN dan JKP IDN yang asal (sebelum penubuhan tadbir urus yang baharu) adalah bertanggungjawab untuk meneliti dan mengesahkan perbelanjaan bagi tujuan penutupan akaun MIMOS sebelum diserahkan kepada MKN.

Pendapat Audit | **Pelaksanaan projek dibuat tanpa tadbir urus dan mandat seperti dalam surat KDN bertarikh 12 Disember 2023 yang menghendaki MIMOS mendapatkan kelulusan daripada JKT dan JKP projek sebelum sebarang pelaksanaan dan perbelanjaan dibuat. MIMOS juga tidak mematuhi arahan untuk mendapatkan pengesahan JKT dan JKP sebaik sahaja perolehan dilaksanakan seperti dalam surat bertarikh 18 Disember 2023.**

5.2. Perbelanjaan Operasi RM14.09 Juta Menggunakan Peruntukan Pembangunan Projek

- a. Berdasarkan Lampiran 5 [Pecahan Kos] Perjanjian Tambahan No. 1 Projek MyDID, kos penyaluran pertama bagi Skop Perkhidmatan di bawah sub-skop *E14 Project Management* adalah berjumlah RM12.30 juta.
- b. Lampiran II Garis Panduan Pelaksanaan Projek Pembangunan di bawah Rancangan Malaysia Kedua Belas (RMKe-12)² yang dikeluarkan oleh Unit Perancang Ekonomi, JPM menyatakan perbelanjaan emolumen serta perolehan kelengkapan pejabat tidak dibenarkan dibayar di bawah peruntukan pembangunan. Semua bayaran berkaitan hendaklah dibiayai melalui peruntukan mengurus.
- c. Semakan Audit mendapati MIMOS telah membuat tuntutan balik sejumlah RM14.17 juta di bawah sub-skop *E14 Project Management*. Bagaimanapun, **sejumlah RM14.09 juta (99.4%) merupakan perbelanjaan operasi yang tidak selaras dengan ketetapan Garis Panduan Pelaksanaan Projek Pembangunan di bawah RMKe-12.** Perbelanjaan operasi tersebut adalah *resource cost*, emolumen, kemudahan perubatan kakitangan dan kelengkapan pejabat. Butiran lanjut seperti dalam **Jadual 2**.

JADUAL 2
TUNTUTAN PERBELANJAAN OPERASI
DI BAWAH SUB-SKOP *E14 PROJECT MANAGEMENT*

BIL.	JENIS PERBELANJAAN	AMAUN (RM Juta)
1.	<i>Resource Cost</i> (Disember 2023 dan Januari 2024)	0.85
2.	Emolumen (Februari 2024 hingga Mac 2025)	13.10
3.	Kemudahan perubatan kakitangan	0.14
4.	Kelengkapan pejabat (mesin kopi)	0.003
JUMLAH		14.09

Sumber: Dokumen Bayaran

- d. Semakan Audit mendapati MIMOS telah membuat **tuntutan *resource cost* bagi bulan Disember 2023 dan Januari 2024 berjumlah RM0.85 juta** bagi **57 pegawai sedia ada MIMOS yang terlibat dalam pelaksanaan Projek MyDID sebelum penubuhan MYDIDSB.** Pihak Audit mendapati tuntutan tersebut adalah **emolumen yang sepatutnya ditanggung melalui dana operasi MIMOS dan tidak wajar dituntut di bawah peruntukan Projek MyDID.**

² Garis Panduan ini merujuk kepada Garis Panduan Penyediaan Kajian Separuh Penggal Rancangan Malaysia Kedua Belas (KSP RMKe-12) dan Permohonan Projek Pembangunan Tahun 2024-2025

- e. Semakan lanjut mendapati **sejumlah RM13.10 juta (93%)** daripada RM14.09 juta telah **dibelanjakan bagi pembayaran emolumen** dari bulan Februari 2024 hingga Mac 2025, melibatkan seramai 59 hingga 98 pegawai. Daripada jumlah tersebut, seramai 59 pegawai adalah pegawai MIMOS yang telah dipindahkan ke MYDIDSB pada Februari 2024. Butiran lanjut mengenai bayaran balik emolumen adalah seperti dalam **Jadual 3**.

JADUAL 3
PERBELANJAAN EMOLUMEN BAGI BULAN FEBRUARI 2024 HINGGA MAC 2025
MENGGUNAKAN PERUNTUKAN PEMBANGUNAN PROJEK MyDID

BIL.	BULAN	BIL. PEGAWAI	AMAUN (RM Juta)
Tahun 2024			
1.	Februari	59	0.78
2.	Mac	63	0.77
3.	April	65	0.85
4.	Mei	66	0.86
5.	Jun	70	0.83
6.	Julai	63	0.93
7.	Ogos	70	0.83
8.	September	78	0.86
9.	Oktober	83	1.06
10.	November	94	1.25
11.	Disember	95	0.95
JUMLAH			9.97
Tahun 2025			
12.	Januari	98	1.03
13.	Februari	94	1.06
14.	Mac	93	1.04
JUMLAH			3.13
JUMLAH KESELURUHAN			13.10

Sumber: Dokumen Bayaran

Maklum Balas MIMOS diterima pada 14 dan 27 November 2025

Dana yang diperuntukkan merupakan satu-satunya sumber kewangan bagi tujuan pelaksanaan projek, merangkumi pembelian aset serta pembiayaan operasi. Sehubungan itu, segala perbelanjaan dan pelaksanaan aktiviti projek adalah bergantung sepenuhnya kepada dana tersebut bagi memastikan skop projek yang telah dirancang dapat dilaksanakan dengan berkesan.

MYDIDSB merupakan sebuah syarikat Sendirian Berhad yang ditempatkan di bawah MKN, JPM sebagai Pegawai Pengawal, dan mempunyai Perjanjian Perkhidmatan tersendiri.

Sehubungan itu, segala keputusan perolehan termasuk keputusan berkaitan pembayaran balik diputuskan sepenuhnya oleh pihak MYDIDSB.

MYDIDSB tidak menerima sebarang peruntukan mengurus sejak penubuhannya sehingga kini, termasuk bagi tahun 2026 berdasarkan pewartaan belanjawan terkini. MYDIDSB masih menggunakan peruntukan pembangunan Projek MyDID bukan sahaja sehingga Mac 2025, malah secara berterusan sehingga kini. Semua perbelanjaan tersebut adalah ditentukan dan dilaksanakan oleh pihak pengurusan MYDIDSB sendiri, manakala pihak MIMOS hanya menguruskan proses pembayaran gaji bagi pihak MYDIDSB sebagai *shared service provider* seperti yang diluluskan oleh pihak pengurusan MYDIDSB.

MIMOS tidak mempunyai bidang kuasa dalam membuat keputusan berhubung pengurusan MYDIDSB, memandangkan perkara tersebut adalah tertakluk kepada LOA MYDIDSB yang diluluskan oleh Lembaga Pengarahnya.

Maklum Balas MOSTI diterima pada 9 Januari 2026

MOSTI mengambil maklum dan akur bahawa peruntukan pembangunan tidak boleh digunakan bagi menampung perbelanjaan operasi seperti yang ditetapkan dalam Garis Panduan Pelaksanaan Projek Pembangunan di bawah RMKe-12. MOSTI akan memastikan MIMOS tidak menggunakan peruntukan pembangunan untuk menampung kos operasi pada masa akan datang.

Pendapat Audit | Peruntukan pembangunan tidak dibenarkan untuk membayar perbelanjaan operasi termasuk emolumen seperti ditetapkan dalam Garis Panduan Pelaksanaan Projek Pembangunan di bawah RMKe-12. Selain itu, wakil MIMOS perlu menjalankan kewajipan fidusiari (fiduciary duty) dalam memastikan pematuhan kepada syarat-syarat yang ditetapkan.

5.3. Perbelanjaan Tanpa/Melebihi Penyaluran Peruntukan Sejumlah RM4.08 Juta

- a. Klausula 4.1 (iv) Perjanjian Tambahan No. 1 Projek MyDID (Lampiran 5 - Pecahan Kos) menyatakan mengenai pecahan kos bagi setiap skop projek mengikut penyaluran peruntukan. Maklumat lanjut mengenai penyaluran pertama berjumlah RM80 juta dalam perjanjian adalah seperti dalam **Jadual 4**.

JADUAL 4
PENYALURAN PERTAMA RM80 JUTA MENGIKUT
SKOP PROJEK MyDID DALAM PERJANJIAN

BIL.	SECTION	SKOP	KOS PENYALURAN PERTAMA YANG DITETAPKAN DALAM PERJANJIAN (RM Juta)
1.	A	Perkakasan ICT	9.85
2.	B	Pembangunan Sistem Aplikasi	-
3.	C	Perisian	1.50
4.	D	Rangkaian	-
5.	E	Perkhidmatan	66.66
6.	F	Lain-lain	1.99
JUMLAH			80.00

Sumber: Perjanjian Tambahan No.1 Projek MyDID

- b. Semakan Audit mendapati penyaluran peruntukan bagi 11 sub-skop projek dalam perjanjian adalah berjumlah RM23.16 juta. Bagaimanapun, **11 sub-skop** ini telah dibelanjakan sejumlah RM27.24 juta, iaitu **tanpa/melebihi kos penyaluran sejumlah RM4.08 juta (17.6%)**. Perbelanjaan tanpa kos penyaluran adalah melibatkan sub-skop B1, B11 dan E7, manakala perbelanjaan melebihi kos penyaluran adalah C7, C8, E1, E9, E10, E11, E14 dan F2. Butiran lanjut seperti dalam **Jadual 5**.

JADUAL 5
PERBELANJAAN TANPA/MELEBIHI KOS PENYALURAN MENGIKUT SUB-SKOP PROJEK

BIL.	SUB-SKOP	PERINCIAN ITEM DALAM PERJANJIAN	KOS PENYALURAN PERTAMA (RM Juta)	PERBELANJAAN (RM Juta)	LEBIHAN PERBELANJAAN BERDASARKAN KOS PENYALURAN AWAL (RM Juta)
			(a)	(b)	(c)=(b) - (a)
SECTION B: PEMBANGUNAN SISTEM APLIKASI					
1.	B1	Aplikasi MyDID (Android)	-	0.04	0.04
2.	B11	Modul Pendaftaran di Kios	-	0.005	0.005
JUMLAH			-	0.045	0.045
SECTION C: PERISIAN					
3.	C7	Development Tools	0.01	0.04	0.03
4.	C8	CA Certs - Digital Cert	1.49	1.51	0.02
JUMLAH			1.50	1.55	0.05
SECTION E: PERKHIDMATAN					
5.	E1	Cloud Services Subscription	0.003	0.05	0.047
6.	E7	SSL Certificate for Servers	-	0.002	0.002
7.	E9	Online Onboarding Services	2.57	2.64	0.07
8.	E10	System Integration	2.59	3.45	0.86
9.	E11	Use Cases Integration	2.73	3.79	1.06
10.	E14	Project Management	12.30	14.17	1.87
JUMLAH			20.19	24.10	3.91

BIL.	SUB-SKOP	PERINCIAN ITEM DALAM PERJANJIAN	KOS PENYALURAN PERTAMA (RM Juta)	PERBELANJAAN (RM Juta)	LEBIHAN PERBELANJAAN BERDASARKAN KOS PENYALURAN AWAL (RM Juta)
			(a)	(b)	(c)=(b) - (a)
SECTION F : LAIN-LAIN					
11.	F2	Data Centre Services	1.47	1.54	0.07
JUMLAH			1.47	1.54	0.07
JUMLAH KESELURUHAN			23.16	27.24	4.08

Sumber: Perjanjian Tambahan No.1 Projek MyDID; Maklumat Perbelanjaan; dan Dokumen Bayaran

- c. Perbelanjaan tanpa/melebihi penyaluran adalah disebabkan perubahan sub-skop yang tidak dibawa ke Mesyuarat JKT dan JKP seperti ditetapkan dalam surat bertarikh 12 Disember 2023.

Maklum Balas MIMOS diterima pada 14 November 2025

Pada peringkat awal pelaksanaan Projek MyDID, pihak MIMOS telah menggunakan dana sendiri dan menganggap bahawa kontrak pelaksanaan/perolehan yang diberikan adalah bersifat komersial. Sehubungan itu, pendekatan pelaksanaan projek telah disusun berasaskan metodologi *agile*, yang menekankan keutamaan perbelanjaan bagi menyokong objektif utama projek. Pendekatan ini turut memberi penekanan kepada fleksibiliti dalam pengurusan sumber serta pelaksanaan aktiviti berdasarkan keperluan semasa.

Walaupun dana projek disalurkan oleh KDN melalui MIMOS, pengurusan dan kawalan penuh terhadap dana tersebut telah dikendalikan secara langsung oleh MYDIDSB. Sebaik sahaja penubuhan MYDIDSB dimuktamadkan, keseluruhan dana berjumlah RM80 juta yang diterima oleh MIMOS telah dipindahkan sepenuhnya kepada syarikat berkenaan. Langkah ini diambil bagi memastikan pengurusan dana dapat dilaksanakan secara lebih efisien dan selaras dengan objektif pelaksanaan projek yang telah ditetapkan. Selepas pemindahan dana berjumlah RM80 juta kepada MYDIDSB, pihak MIMOS telah menginbois segala perbelanjaan berkaitan dengan projek ini, yang telah didahulukan menggunakan dana dalaman MIMOS.

Maklum Balas MOSTI diterima pada 9 Januari 2026

MOSTI akan memastikan pelaksanaan projek di bawah MIMOS pada masa akan datang teratur dan tidak melebihi penyaluran serta peruntukan yang ditetapkan.

Pendapat Audit | Pendekatan pelaksanaan projek oleh MIMOS berasaskan metodologi *agile* dan fleksibiliti dalam pengurusan sumber adalah kurang berkesan menyebabkan perbelanjaan tanpa/melebihi penyaluran dan ketidakpatuhan terhadap syarat perjanjian.

5.4. Perbelanjaan Melebihi Jumlah Kos Bagi Sub-Skop Projek Sejumlah RM70,000

- a. Klausa 4.1 (iv) Perjanjian Tambahan No. 1 Projek MyDID (Lampiran 5 - Pecahan Kos) menetapkan jumlah kos bagi setiap sub-skop projek.
- b. Semakan Audit mendapati jumlah kos dalam perjanjian bagi sub-skop **F2 Data Centre Services** adalah berjumlah RM1.47 juta. Bagaimanapun, perbelanjaan bagi sub-skop ini adalah RM1.54 juta, iaitu **melebihi jumlah kos RM70,000 (4.8%)**. Butiran lanjut seperti dalam **Jadual 6**.

JADUAL 6
PERBELANJAAN MELEBIHI JUMLAH KOS BAGI SUB-SKOP PROJEK

SUB-SKOP	PERINCIAN ITEM DALAM PERJANJIAN	JUMLAH KOS SUB-SKOP DALAM PERJANJIAN (RM Juta)	PERBELANJAAN (RM Juta)	LEBIHAN PERBELANJAAN BERDASARKAN JUMLAH KOS SUB-SKOP (RM Juta)
		(a)	(b)	(c) = (b) - (a)
F2	<i>Data Centre Services</i>	1.47	1.54	0.07
JUMLAH		1.47	1.54	0.07

Sumber: Perjanjian Tambahan No.1 Projek MyDID; Maklumat Perbelanjaan; dan Dokumen Bayaran

- c. Perbelanjaan melebihi jumlah kos bagi sub-skop dalam perjanjian adalah disebabkan perubahan sub-skop yang tidak dibawa ke Mesyuarat JKT dan JKP seperti ditetapkan dalam surat bertarikh 12 Disember 2023.

Maklum Balas MIMOS diterima pada 27 November 2025

Segala keputusan perbelanjaan bagi pihak MYDIDSB adalah diputuskan oleh pihak pengurusan syarikat tersebut berdasarkan LOA yang berkuat kuasa, dan selaras dengan keputusan-keputusan yang telah diperoleh melalui JKT, JKP, agensi pengawal serta Lembaga Pengarah MYDIDSB. Pihak pengurusan MYDIDSB mempunyai Bahagian Tadbir Urus Korporat dan Operasi yang memantau dan mengurus segala urusan projek, termasuk membuat segala keputusan perbelanjaan berkaitan dengan projek. Segala maklumat terperinci berkaitan perbelanjaan dan keputusan pengurusan MYDIDSB adalah berada di bawah bidang kuasa MYDIDSB.

Maklum Balas MOSTI diterima pada 9 Januari 2026

MOSTI akan memastikan pelaksanaan projek di bawah MIMOS pada masa akan datang teratur dan tidak melebihi penyaluran serta peruntukan yang ditetapkan.

Pendapat Audit | **Perbelanjaan yang melebihi jumlah kos keseluruhan sub-skop projek menunjukkan kawalan perbelanjaan yang tidak berkesan serta pemantauan kewangan yang lemah. Ini juga merupakan ketidakpatuhan terhadap syarat perjanjian yang ditetapkan. Wakil MIMOS juga perlu menjalankan kewajipan fidusiari (fiduciary duty) dalam memastikan pematuan kepada skop perjanjian.**


5.5. Perolehan Peralatan *Certificate Authority* RM79,000 Tanpa Kelulusan Makmal Kajian Nilai

- a. Pekeliling Unit Perancang Ekonomi, JPM Bil. 1 Tahun 2015 menyatakan Kerajaan telah menetapkan supaya Pengurusan Nilai dilaksanakan bagi semua program/projek bernilai RM50 juta dan ke atas.
- b. Berdasarkan Minit Mesyuarat JKT IDN bertarikh 2 Februari 2024, mesyuarat memaklumkan Makmal Kajian Nilai perlu dilaksanakan bagi projek pembangunan bernilai RM50 juta ke atas. Makmal Kajian Nilai perlu dilaksanakan semula kerana terdapat perubahan atau perbezaan skop projek antara Projek IDN yang dirancang oleh KDN dengan Projek IDN³ yang dilaksanakan oleh MIMOS.
- c. MIMOS telah membentangkan pelan perbelanjaan projek antaranya pelaksanaan dan perolehan *Certificate Authority* (CA) dalam Mesyuarat JKT IDN bertarikh 2 Februari 2024. Walau bagaimanapun, mesyuarat hanya mengambil maklum mengenai pembentangan ini. Pada 19 Februari 2024, Mesyuarat JKP IDN bersetuju supaya MIMOS mengemukakan perincian spesifikasi projek kepada KDN bagi permohonan pelaksanaan Makmal Kajian Nilai.
- d. Semakan Audit mendapati MIMOS telah membuat perolehan peralatan CA, iaitu **dua unit door access** dan **security cage masing-masing pada 23 dan 29 Februari 2024 berjumlah RM79,000** di bawah sub-skop *F2: Data Centre Services* **untuk pembangunan CA.**

³ Projek IDN ini merujuk kepada Projek MyDID

- e. Berdasarkan Laporan Makmal Kajian Nilai yang telah dilaksanakan pada 22 hingga 24 Julai 2024, pembangunan CA tidak dipersetujui serta telah disyorkan untuk dikeluarkan daripada skop projek kerana MIMOS bukanlah agensi pelaksana CA. Skop pembangunan CA ini meliputi antaranya server, *cage* dan *safe box*.
- f. Semakan lanjut mendapati **MIMOS telah membuat perolehan peralatan CA empat hari selepas Mesyuarat JKP memutuskan untuk ke Makmal Kajian Nilai**. Seterusnya, **Makmal Kajian Nilai mengesyorkan supaya pembangunan CA dikeluarkan daripada skop projek**.
- g. Pemeriksaan fizikal Audit pada 5 Ogos 2025 mendapati peralatan ini **tidak digunakan dan masih ditempatkan di Pusat Data MIMOS**. Butiran lanjut seperti dalam **Gambar 1**.

GAMBAR 1



Pusat Data MIMOS
- Perolehan *Security Cage* dan *Door Access* Dibuat
Tanpa Kelulusan Makmal Kajian Nilai dan Tidak Digunakan
(05.08.2025)
(Sumber: Jabatan Audit Negara)

Maklum Balas MIMOS diterima pada 14 dan 27 November 2025

Pihak MIMOS mengambil maklum bahawa aset-aset yang dimaksudkan adalah harta milik MYDIDSB. Berdasarkan semakan semasa, aset-aset tersebut didapati berada dalam keadaan baik dan berfungsi sepenuhnya.

Berdasarkan Garis Panduan Perolehan kumpulan MIMOS dan Garis Panduan MOF, semua perolehan kumpulan perlu dilakukan mengikut tatacara perolehan semasa yang berkuat kuasa. Dengan itu fungsi perolehan kumpulan MIMOS dikendalikan oleh Jabatan Perolehan bagi pihak MYDIDSB. Segala keputusan berkaitan perolehan bagi projek MYDIDSB adalah diuruskan sepenuhnya oleh pihak pengurusan MYDIDSB.

Pada Mesyuarat JKT Bil. 1/2024 pada 2 Februari 2024, pihak MIMOS telah membentangkan slaid yang mana butiran berkaitan *security cage* dan *safe box* telah diperincikan. Pihak JKT telah mengambil maklum pembentangan MIMOS seperti dalam Minit Mesyuarat JKT Bil. 1/2024.

Pembangunan CA merupakan salah satu skop asal projek yang dicadangkan oleh MIMOS. Pembelian *security cage* dan *door access* tersebut adalah mengikut skop projek, yang menunjukkan bahawa skop asal MIMOS adalah termasuk pembelian *security cage*. Pembelian peralatan tersebut telah dibuat pada bulan Februari 2024 dan diterima pada bulan April 2024 sebelum sesi Makmal Kajian Nilai pada 22 hingga 24 Julai 2024.

Skop CA telah dikeluarkan daripada projek dalam sesi Makmal Kajian Nilai pada 22 hingga 24 Julai 2024 dan laporan Makmal Kajian Nilai telah dikeluarkan pada bulan Oktober 2024.

Maklum Balas MOSTI diterima pada 9 Januari 2026

MOSTI mengambil maklum bahawa Makmal Kajian Nilai perlu dilaksanakan bagi semua projek bernilai RM50 juta ke atas, selaras dengan pekililing Kerajaan yang berkuat kuasa.

Pendapat Audit	Perolehan oleh MIMOS tanpa kelulusan Makmal Kajian Nilai, menunjukkan kelemahan kawalan dalaman dan ketidakpatuhan prosedur kelulusan perolehan yang menjejaskan tadbir urus projek serta berlakunya pembaziran ke atas aset yang dibeli tidak digunakan untuk projek.
---------------------------	---

6. RUMUSAN KESELURUHAN AUDIT

6.1. Secara keseluruhan, terdapat kelemahan dalam perbelanjaan dan kawalan dalaman semasa pelaksanaan awal Projek MyDID di bawah pengurusan MIMOS. Struktur tadbir urus projek tidak berfungsi sebagaimana yang ditetapkan seperti ketiadaan pembentangan rasmi mengenai kelulusan perbelanjaan dan status pelaksanaan projek semasa mesyuarat.

6.2. Dari aspek kewangan, pihak Audit mendapati sejumlah RM28.13 juta telah dibelanjakan tanpa kelulusan Jawatankuasa ditetapkan yang merangkumi 11 sub-skop projek yang dibelanja tanpa/melebihi penyaluran peruntukan berjumlah RM4.08 juta dan perbelanjaan melebihi jumlah kos bagi satu sub-skop berjumlah RM70,000. Ini menunjukkan ketidakpatuhan jelas terhadap struktur kos projek dan syarat yang dipersetujui.

6.3. Pihak Audit juga mengesahkan bahawa perbelanjaan bagi *resource cost*, emolumen, kemudahan perubatan kakitangan dan kelengkapan pejabat berjumlah RM14.09 juta dibayar menggunakan dana pembangunan, bertentangan dengan Garis Panduan Pelaksanaan Projek Pembangunan RMKe-12 yang tidak membenarkan emolumen dan perolehan kelengkapan pejabat dibiayai melalui peruntukan pembangunan, sekali gus menunjukkan perbelanjaan tidak mengikut tujuan peruntukan (*purpose of vote*).

6.4. Dari aspek perolehan, pihak Audit mendapati pembelian *security cage* dan *door access* dibuat tanpa kelulusan Makmal Kajian Nilai, dan peralatan ini tidak digunakan, yang membawa kepada pembaziran kewangan serta mencerminkan kelemahan kawalan aset.

6.5. Secara umumnya, sebagai salah seorang Ahli Lembaga Pengarah, wakil MIMOS hendaklah melaksanakan kuasa dan tanggungjawab fidusiarinya dengan memastikan setiap proses tadbir urus dan kawalan dalaman dipatuhi bagi memastikan kepentingan (*best interest*) Projek MyDID sentiasa terpelihara. Ini termasuk keperluan pematuhan syarat-syarat yang dikenakan oleh KDN kepada pengurusan MYDIDSB agar syarat-syarat berkenaan dipatuhi.

7. SYOR AUDIT

Bagi mengatasi kelemahan yang dibangkitkan dan memastikan perkara yang sama tidak berulang pada masa hadapan, MIMOS disyorkan melaksanakan penambahbaikan dengan mengambil tindakan seperti berikut:

7.1. Pihak pengurusan hendaklah memastikan semua perbelanjaan projek dilaksanakan dengan kelulusan Jawatankuasa yang berkaitan serta mematuhi struktur kos dan tujuan peruntukan yang telah diluluskan, termasuk pematuhan kepada Garis Panduan Pelaksanaan Projek Pembangunan RMKe-12 bagi mengelakkan perbelanjaan yang tidak dibenarkan melalui dana pembangunan (*purpose of vote*).

7.2. Memantapkan tadbir urus Geran Pembangunan untuk memastikan keputusan berkaitan peruntukan, pelaksanaan projek dan perolehan dibuat dengan ketelusan, akauntabiliti dan berpandukan peraturan sedia ada. Pemantapan peranan ini juga membantu memperkukuh tadbir urus korporat, meningkatkan keberkesanan penggunaan geran pembangunan dan memastikan tujuan asal geran tercapai.

BAHAGIAN II

SYARIKAT KERAJAAN PERSEKUTUAN

JABATAN AUDIT NEGARA

120 1808 - 2028
TAHUN

3. Pengauditan Badan Lain Termasuk Syarikat Kerajaan Persekutuan Melalui Sistem e-SelfAudit

- Pencapaian Mandat dan Objektif Penubuhan Syarikat
- Aspek Tatakelola
- Prestasi Kewangan Syarikat

JABATAN AUDIT NEGARA

120 1904 - 2024
TAHUN

PENGAUDITAN BADAN LAIN TERMASUK SYARIKAT KERAJAAN PERSEKUTUAN MELALUI SISTEM e-SELFAUDIT

1. LATAR BELAKANG

1.1. Mengikut Perenggan 5(1)(d) Akta Audit 1957 [*Akta 62*], Ketua Audit Negara diberi kuasa untuk memeriksa, menyiasat dan mengaudit akaun mana-mana badan lain termasuk syarikat yang didaftarkan di bawah Akta Syarikat 2016 [*Akta 777*] yang menerima pemberian dan pinjaman daripada Persekutuan atau Negeri, dan termasuk juga sesuatu syarikat yang lebih daripada separuh modal syer berbayarnya dipegang oleh Persekutuan, Negeri atau pihak berkuasa awam.

1.2. Pindaan Akta Audit 1957 telah diluluskan di Dewan Rakyat pada 3 Julai 2024 dan di Dewan Negara pada 24 Julai 2024. Kali terakhir Akta ini dipinda adalah pada tahun 1991, iaitu 33 tahun yang lalu. Pindaan ini antaranya memperluaskan kuasa Ketua Audit Negara untuk mengaudit badan lain termasuk syarikat (selepas ini ditulis sebagai entiti) yang menerima jaminan kewangan daripada Kerajaan Persekutuan atau Negeri.

1.3. Susulan pindaan Akta Audit 1957, Jabatan Audit Negara (JAN) seterusnya telahewartakan sejumlah 1,856 entiti melalui Perintah Audit (Akaun Badan Lain) (Pindaan) 2024 [*P.U. (A) 331/2024*] bagi tujuan pengauditan yang berkuat kuasa pada 1 November 2024. Jumlah ini meningkat lebih sekali ganda (100.6%) berbanding 925 entiti yang diwartakan pada tahun 2022. Komposisi entiti yang telah diwartakan seperti dalam **Jadual 1**.

JADUAL 1
KOMPOSISI ENTITI YANG DIWARTAKAN

BIL.	BADAN LAIN TERMASUK SYARIKAT	JUMLAH
1.	Syarikat yang ditubuhkan di bawah Akta Syarikat 2016 [<i>Akta 777</i>]	1,851
2.	Badan lain yang didaftarkan di bawah Jabatan Pendaftaran Pertubuhan Malaysia (ROS)	4
3.	Badan lain yang didaftarkan di bawah Bahagian Hal Ehwal Undang-Undang (BHEUU)	1
JUMLAH		1,856

Sumber: Pangkalan Data Sistem e-SelfAudit

1.4. Daripada 1,856 entiti yang diwartakan tersebut, sebanyak 852 merupakan entiti di peringkat Kerajaan Persekutuan manakala 1,004 merupakan entiti di peringkat Kerajaan Negeri. Pewartaan yang berkuat kuasa pada 1 November 2024 ini membolehkan pengauditan dilaksanakan terhadap syarikat induk serta subsidiari di bawahnya, termasuklah syarikat-syarikat di peringkat Negeri yang ditubuhkan di bawah Menteri Besar Diperbadankan (Menteri Besar Incorporated – MBI), Ketua Menteri Diperbadankan (Chief Minister Incorporated – CMI) dan Perbadanan Setiausaha Kerajaan Negeri (State Secretary Incorporated – SSI).

2. PELAKSANAAN SISTEM e-SELFAUDIT DI PERINGKAT KERAJAAN PERSEKUTUAN

2.1. JAN telah memperkenalkan Sistem e-SelfAudit, iaitu satu platform digital yang dibangunkan secara dalaman bagi membolehkan kesemua entiti diwartakan menjalani penilaian sendiri secara dalam talian merangkumi enam elemen penilaian iaitu polisi, ekonomi, sosial, alam sekitar, teknologi dan perundangan. Pengauditan melalui Sistem e-SelfAudit telah dimulakan pada bulan November 2024 melalui projek rintis yang melibatkan 206 syarikat. Seterusnya baki 1,650 entiti memulakan proses penilaian sendiri di bawah Sistem e-SelfAudit mulai 6 Februari 2025 hingga 30 Mei 2025. Melalui Sistem e-SelfAudit, pengauditan dapat dilaksanakan secara 100% terhadap entiti yang diwarta pada setiap tahun buat julung kalinya. Ini membolehkan JAN melaksanakan pemantauan dan penilaian prestasi badan lain/syarikat Kerajaan secara menyeluruh. Pelaksanaan pengauditan ini dilancarkan oleh YAB Dato' Seri Anwar bin Ibrahim, Perdana Menteri pada 6 Februari 2025. Butirannya adalah seperti dalam **Gambar 1** dan **2**.

GAMBAR 1



GAMBAR 2



Majlis Peluncuran Sistem e-SelfAudit di Putrajaya International Convention Centre (PICC)
(Tarikh: 6 Februari 2025)

Sumber: Jabatan Audit Negara

2.2. Sepanjang tempoh pelaksanaan Sistem e-SelfAudit, JAN telah melaksanakan sesi libat urus dengan kesemua entiti terlibat melalui Khidmat Meja Bantuan secara fizikal dan dalam talian (online). Selain itu, sesi taklimat khas juga telah diadakan secara berkala berdasarkan permohonan yang diterima daripada entiti. Khidmat Meja Bantuan secara dalam talian melalui Sistem e-SelfAudit dibuka pada setiap hari mulai pelaksanaan projek rintis sehingga tarikh akhir maklum balas dikemukakan oleh entiti kepada JAN. Selain itu, enam siri Khidmat Meja Bantuan telah dibuka secara fizikal di peringkat Ibu Pejabat JAN dan empat siri di peringkat JAN Negeri bagi membolehkan bantuan serta khidmat nasihat secara bersemuka diberikan kepada wakil entiti. JAN juga telah melaksanakan dua siri taklimat khas kepada syarikat di peringkat Persekutuan serta satu siri masing-masing di peringkat negeri Pahang dan Sarawak. Butirannya adalah seperti dalam **Jadual 2** dan **Gambar 3** hingga **6**.

JADUAL 2
PELAKSANAAN KHIDMAT MEJA BANTUAN FIZIKAL DAN TAKLIMAT KHAS BAGI
SISTEM e-SELFAUDIT KEPADA ENTITI DIWARTAKAN

BIL.	PERKARA	BILANGAN
1.	Khidmat Meja Bantuan secara fizikal di peringkat Ibu Pejabat JAN	6
2.	Khidmat Meja Bantuan secara fizikal di peringkat JAN Negeri	4
3.	Sesi Taklimat Khas	4

Sumber: Jabatan Audit Negara

GAMBAR 3



Kaunter Khidmat Meja Bantuan di JAN Ibu Pejabat
(Tarikh: 21 & 22 November 2024)

GAMBAR 4



Kaunter Khidmat Meja Bantuan Sempena Majlis
Peluncuran Sistem e-SelfAudit di Putrajaya International
Convention Centre (PICC)
(Tarikh: 6 Februari 2025)

GAMBAR 5



Kaunter Khidmat Meja Bantuan di JAN Ibu Pejabat
(Tarikh: 20 Mac 2025)

Sumber: Jabatan Audit Negara

GAMBAR 6



Kaunter Khidmat Meja Bantuan di JAN Ibu Pejabat
(Tarikh: 9 April 2025)

3. MAKLUM BALAS DIKEMUKAKAN OLEH ENTITI PERSEKUTUAN DIWARTA

3.1. Bagi 852 entiti di peringkat Kerajaan Persekutuan yang diwarta, status pelaksanaan Sistem e-SelfAudit adalah seperti berikut:

- satu badan lain dan 641 syarikat telah mengemukakan maklum balas;
- dua syarikat gagal mengemukakan maklum balas dalam tempoh ditetapkan; dan
- 208 syarikat berstatus *winding up/dissolved*/tidak lagi berkaitan dengan Kerajaan. Butiran seperti dalam **Jadual 3**.

JADUAL 3
STATUS PELAKSANAAN SISTEM e-SELFAUDIT BAGI SYARIKAT
KERAJAAN PERSEKUTUAN

BIL.	BADAN LAIN/SYARIKAT KERAJAAN	JUMLAH
1.	Syarikat Kerajaan Persekutuan yang kemuka maklum balas	641
2.	Badan Lain yang kemuka maklum balas	1
3.	Tidak kemuka maklum balas dalam tempoh ditetapkan	2
4.	Status <i>Winding Up/Dissolved</i> /tidak lagi berkaitan Kerajaan: - Dalam proses pembubaran – 15 syarikat <i>Winding up/dissolved</i> berdasarkan status SSM – 153 syarikat - Tiada lagi kepentingan Kerajaan – 40 badan lain termasuk syarikat	208
JUMLAH		852

Sumber: Pangkalan Data Sistem e-SelfAudit

3.2. Setakat 31 Disember 2025, 642 (99.7%) daripada 644 entiti telah mengemukakan maklum balas melalui Sistem e-SelfAudit. Selepas maklum balas diterima melalui Sistem e-SelfAudit, JAN telah melaksanakan proses verifikasi melalui audit meja bagi mengesahkan ketepatan maklumat yang diisytiharkan oleh entiti dan dokumen sokongan yang dimuat naik dalam sistem. Selain itu, sebanyak 208 syarikat yang berstatus *winding up/dissolved*/tidak lagi berkaitan Kerajaan akan disusul pada tahun 2026 bagi menentukan status pembubaran, kedudukan aset dan liabiliti serta pinjaman Kerajaan yang masih belum selesai.

3.3. Dua syarikat yang gagal mengemukakan maklum balas dalam tempoh ditetapkan adalah Equal Concept Sdn. Bhd. dan Sharikat Jengka Sendirian Berhad. Kedua-dua syarikat ini telah diwartakan di bawah perenggan 5(1)(d) Akta Audit 1957 kerana menerima pinjaman daripada Kerajaan Persekutuan. Berdasarkan Penyata Kewangan Kerajaan Persekutuan Tahun 2024, baki pinjaman Equal Concept Sdn. Bhd. adalah sebanyak RM83.44 juta manakala baki pinjaman Sharikat Jengka Sendirian Berhad adalah sebanyak RM10.61 juta. Kedua-dua syarikat masih tidak mengemukakan maklum balas Sistem e-SelfAudit walaupun peringatan telah dikemukakan sebanyak lapan kali dengan pemakluman terakhir melalui Sistem e-SelfAudit pada 26 September 2025.

4. OBJEKTIF ANALISIS AUDIT

Objektif analisis Audit adalah untuk menilai tiga elemen utama, iaitu pencapaian mandat dan objektif penubuhan syarikat; pematuhan aspek tatakelola berdasarkan prinsip tadbir urus korporat yang digariskan dan prestasi kewangan yang dinilai berdasarkan Penyata Kewangan Beraudit Tahun 2022 dan 2023.

5. SKOP DAN METODOLOGI AUDIT


5.1. Skop analisis Audit meliputi 641 syarikat di peringkat Kerajaan Persekutuan yang terdiri daripada 525 berstatus aktif [terdiri 114 syarikat ditubuhkan dengan tujuan khas (Special Purposes Vehicle – SPV) dan 411 syarikat aktif bukan SPV] serta 116 syarikat berstatus dormant yang telah mengemukakan maklum balas serta dokumen sokongan berkaitan melalui Sistem e-SelfAudit pada tahun 2024 dan 2025. Pecahan mengikut jenis syarikat pula mendapati 575 didaftarkan sebagai Syarikat Berhad Menurut Syer [Company Limited by Shares – CLBS] dan 66 didaftarkan sebagai Syarikat Berhad Menurut Jaminan [Company Limited by Guarantee – CLBG]. Butiran lanjut seperti dalam **Jadual 4** dan **Carta 1**.

JADUAL 4
SYARIKAT KERAJAAN PERSEKUTUAN MENGIKUT JENIS DAN STATUS

JENIS	STATUS			JUMLAH
	AKTIF		DORMAN	
	SPV	BUKAN SPV		
CLBS	111	349	115	575
CLBG	3	62	1	66
JUMLAH	114	411	116	641

Sumber: Pangkalan Data Sistem e-SelfAudit

CARTA 1
BILANGAN SYARIKAT MENGIKUT JENIS DAN STATUS



Sumber: Pangkalan Data Sistem e-SelfAudit

5.2. Dalam pelaporan kali ini, JAN menganalisis enam Fokus Utama Audit [Key Audit Area – KAA] bagi tiga elemen yang dinilai seperti berikut:

- a. Pencapaian Mandat dan Objektif Penubuhan Syarikat
- b. Aspek Tatakelola:
 - Keanggotaan dan Komposisi Lembaga Pengarah; dan
 - Jawatankuasa Audit.
- c. Prestasi Kewangan:
 - Pembayaran Dividen oleh Syarikat Kerajaan;
 - Syarikat Kerajaan Dengan Isu Usaha Berterusan (Going Concern); dan
 - Syarikat Kerajaan Berstatus Dorman.

5.3. Syarikat membuat pengisytiharan dalam Sistem e-SelfAudit berdasarkan prestasi dan kedudukan kewangan yang dilaporkan dalam Penyata Kewangan Beraudit bagi tahun 2022 dan 2023. Aspek tatakelola pula adalah berdasarkan pengisytiharan amalan semasa syarikat sehingga tarikh maklum balas dikemukakan kepada JAN.

5.4. Analisis Audit bagi tujuan penyediaan laporan ini adalah berdasarkan data-data yang telah diverifikasi dan disimpan dalam pangkalan data Sistem e-SelfAudit yang berpusat di JAN.

6. HASIL ANALISIS AUDIT

Penemuan Audit bagi enam KAA yang dianalisis, iaitu Pencapaian Objektif Penubuhan Syarikat; Keanggotaan dan Komposisi Lembaga Pengarah; Jawatankuasa Audit; Pembayaran Dividen oleh Syarikat Kerajaan; Syarikat Kerajaan Dengan Isu Usaha Berterusan; dan Syarikat Kerajaan Berstatus Dorman adalah seperti perenggan berikutnya.

Pencapaian Mandat dan Objektif Penubuhan Syarikat

JABATAN AUDIT NEGARA

120
TAHUN
1904 - 2024

PENCAPAIAN MANDAT DAN OBJEKTIF PENUBUHAN SYARIKAT

1. LATAR BELAKANG

1.1. Objektif penubuhan syarikat Kerajaan antara lain adalah untuk memenuhi mandat dan tujuan khusus yang telah ditetapkan oleh Kerajaan dan pada masa yang sama memberi nilai tambah kepada pembangunan sosioekonomi negara. Pencapaian objektif penubuhan syarikat diukur melalui perkara seperti berikut:

- a. menilai sama ada operasi dan aktiviti utama syarikat telah dilaksanakan selaras dengan objektif penubuhannya; dan
- b. menilai sama ada syarikat mempunyai Pelan Strategik dan Petunjuk Prestasi Utama (KPI) yang selaras dengan objektif penubuhan yang ditetapkan.

1.2. Penilaian Audit bagi mengukur pencapaian objektif penubuhan syarikat dilaksanakan terhadap 525 syarikat aktif. Penilaian tidak dilaksanakan ke atas syarikat dormant dengan tiada sebarang aktiviti operasi dijalankan sepanjang tempoh yang dinilai. Daripada 525 syarikat aktif, 12 syarikat telah dikeluarkan daripada analisis, mengambil kira status syarikat yang hanya menerima pinjaman daripada Kerajaan Persekutuan di mana Kerajaan Persekutuan atau Badan Berkanun Persekutuan atau Pihak Berkuasa Awam tidak memegang lebih daripada separuh modal syer berbayar dalam syarikat tersebut. Ini menjadikan penilaian terhadap pencapaian objektif penubuhan syarikat hanya melibatkan 513 syarikat Persekutuan.

2. PENEMUAN AUDIT

2.1. OPERASI DAN AKTIVITI UTAMA

2.1.1. Analisis Audit telah dilaksanakan bagi menilai kepatuhan operasi syarikat terhadap objektif penubuhannya. Penilaian ini adalah selaras dengan prinsip tatakelola yang baik dan keperluan perundangan di bawah Perenggan 35(2)(a) Akta Syarikat 2016 [*Akta 777*] yang menghadkan aktiviti syarikat kepada objektif yang termaktub dalam Perlembagaannya.

2.1.2. Pihak Audit telah membandingkan objektif penubuhan yang ditetapkan dalam Perlembagaan dan aktiviti utama syarikat yang dinyatakan dalam Penyata Kewangan Beraudit. Hasil perbandingan menunjukkan 509 (99.2%) daripada 513 syarikat aktif telah melaksanakan aktiviti yang selaras dengan objektif dalam Perlembagaan Syarikat.

Sebanyak empat (0.8%) syarikat menjalankan aktiviti yang tidak selaras sepenuhnya dengan Perlembagaan Syarikat. Butiran lanjut seperti dalam **Jadual 1** dan **Jadual 2**.

JADUAL 1
PEMATUHAN AKTIVITI UTAMA SYARIKAT BERBANDING PERLEMBAGAAN

PERKARA	JUMLAH
Aktiviti utama selaras dengan Perlembagaan Syarikat	509
Aktiviti utama tidak selaras dengan Perlembagaan Syarikat	4
JUMLAH KESELURUHAN	513

Sumber: Pangkalan Data Sistem e-SelfAudit

JADUAL 2
AKTIVITI UTAMA TIDAK SELARAS DENGAN PERLEMBAGAAN SYARIKAT

BIL.	NAMA SYARIKAT	PERLEMBAGAAN SYARIKAT	AKTIVITI UTAMA
1.	Go Energy Sdn. Bhd.	Menjalankan perniagaan sebagai pemborong, peruncit dan pengedar ubat-ubatan, bahan kimia, bahan sintetik, kosmetik dan produk farmaseutikal.	Menguruskan pengoptimuman tenaga dan teknologi hijau.
2.	UiTM Energy & Facilities Sdn. Bhd.	Perniagaan berkaitan hartanah dan perumahan, pemerolehan dan pengurusan hartanah serta pemilikan dan urus niaga harta tak alih.	Aktiviti pengurusan fasiliti, penyelesaian tenaga dan kecekapan.
3.	TEKUN Nasional	Pembiayaan kepada usahawan, kutipan bayaran balik pembiayaan daripada usahawan, membina jaringan usahawan kecil, membangunkan usahawan kecil berdaya maju, menyediakan khidmat perundingan dan sokongan kepada usahawan kecil serta membuat pelaburan dana dalam Malaysia.	- Mengurus dan memberi pembiayaan yang mudah, cepat dan tidak membebankan usahawan kecil sebagai modal tambahan untuk meningkatkan perniagaan mereka melalui penerimaan pinjaman dan geran daripada Kerajaan serta penjana pendapatan daripada aktiviti pelaburan didapati selaras dengan objektif penubuhannya. - Bagaimanapun, tekun telah menyalurkan dalam bentuk pinjaman dan pendahuluan/pelaburan kepada Koperasi Rakan TEKUN Berhad (KRTB) yang tidak selaras dengan objektif penubuhannya.
4.	Studios Film Office Sdn. Bhd.	Menjalankan urusniaga hartanah, pedagang am dan pengimport, dan ejen komisen bagi pelbagai jenis barangan dan komoditi serta pengurusan aset syarikat bagi tujuan pembangunan dan perluasan perniagaan syarikat yang terlibat dalam industri berkaitan.	Mentadbir dan mengagihkan Insentif Penerbitan Filem di Malaysia (Film in Malaysia Incentive Plus [FIMI Plus]) menggunakan geran yang diterima bagi pihak syarikat oleh syarikat induknya iaitu Khazanah Nasional Berhad.

Sumber: Pangkalan Data Sistem e-SelfAudit, Perlembagaan Syarikat dan Penyata Kewangan Beraudit Tahun 2022 dan 2023

2.2. PELAN STRATEGIK/PELAN PERNIAGAAN

2.2.1. Berdasarkan seksyen 211 Akta Syarikat 2016 [*Akta 777*], perniagaan dan hal ehwal syarikat hendaklah diuruskan oleh atau di bawah arahan Lembaga Pengarah, dan Lembaga Pengarah mempunyai kuasa untuk mengurus, mengarah serta menyelia pengurusan syarikat tertakluk kepada Akta ini dan Perlembagaan Syarikat. Selaras dengan seksyen 213 Akta 777 juga, Pengarah hendaklah melaksanakan tanggungjawab mereka dengan bertindak bagi maksud yang sepatutnya, dengan suci hati demi kepentingan syarikat serta dengan tahap ketelitian, kemahiran dan usaha yang munasabah, termasuk memastikan hala tuju dan perancangan syarikat adalah jelas, terkawal dan sejajar dengan objektif penubuhan syarikat.

2.2.2. Merujuk kepada Prinsip A, Panduan G1.1, Malaysian Code on Corporate Governance (MCCG) 2021, bagi membolehkan Lembaga Pengarah melaksanakan tanggungjawabnya dalam mencapai matlamat dan objektif syarikat, Lembaga Pengarah hendaklah memastikan pelan strategik syarikat menyokong penciptaan nilai jangka panjang dan merangkumi strategi mengenai pertimbangan ekonomi, alam sekitar dan sosial yang mendasari kelestarian. Keperluan bagi penyediaan Pelan Strategik dan Pelan Perniagaan lazimnya diperuntukkan secara jelas dalam Perlembagaan Syarikat, Piagam Lembaga Pengarah atau dasar tadbir urus dalaman.

2.2.3. Analisis Audit terhadap 513 syarikat Persekutuan mendapati amalan terbaik berkaitan penyediaan Pelan Strategik/Pelan Perniagaan adalah seperti berikut:

- a. 445 (86.7%) syarikat telah menyediakan Pelan Strategik selaras dengan objektif penubuhan;
- b. sembilan (1.8%) syarikat menyediakan Pelan Strategik tetapi tidak selaras dengan objektif penubuhan; dan
- c. 59 (11.5%) syarikat tidak menyediakan Pelan Strategik.

Butiran lanjut seperti dalam **Jadual 3**.

JADUAL 3
PEMATUHAN PELAN STRATEGIK BERBANDING OBJEKTIF PENUBUHAN

PERKARA	JUMLAH
Pelan Strategik selaras dengan objektif penubuhan	445
Pelan Strategik tidak selaras dengan objektif penubuhan	9
Pelan Strategik tidak disediakan	59
JUMLAH KESELURUHAN	513

Sumber: Pangkalan Data Sistem e-SelfAudit

2.3. PENCAPAIAN PETUNJUK PRESTASI UTAMA (KPI)

2.3.1. Seksyen 252 Akta Syarikat 2016 [*Akta 777*] memperuntukkan kewajipan Pengarah untuk menyediakan laporan pengarah bagi setiap tahun kewangan dan memastikan laporan tersebut diluluskan oleh Lembaga Pengarah. Peruntukan ini tidak mewajibkan penetapan atau pelaksanaan KPI.

2.3.2. Seksyen 253 Akta 777 pula menetapkan kandungan minimum laporan pengarah termasuk aktiviti utama syarikat dan perkara-perkara yang dinyatakan dalam Bahagian II, Jadual Kelima Akta 777. Walau bagaimanapun, seksyen ini tidak secara khusus mensyaratkan laporan pencapaian KPI atau analisis prestasi KPI secara terperinci, kecuali setakat ia dimasukkan sebagai sebahagian daripada ulasan perniagaan yang bersifat pilihan.

2.3.3. Garis Panduan Tadbir Urus Dan Ahli Lembaga Pengarah Syarikat Menteri Kewangan (Diperbadankan) [MKD] 2024, Bahagian B, Peranan Ahli Lembaga Pengarah Syarikat MKD, Seksyen 9, Pelaporan Korporat [Perkara 9.4(a), (b) dan (c)] menetapkan Lembaga Pengarah hendaklah memastikan syarikat melaporkan pencapaian KPI tahun semasa dan menetapkan KPI tahun berikutnya berdasarkan tujuan dan operasi syarikat. KPI ini melibatkan petunjuk prestasi kewangan dan bukan kewangan serta wajaran yang bersesuaian bagi setiap petunjuk berdasarkan perniagaan teras syarikat. Berdasarkan kerangka tatakelola ini, Garis Panduan MKD Tahun 2024 adalah terpakai kepada syarikat di bawah MKD dan boleh dijadikan rujukan amalan terbaik oleh lain-lain syarikat yang mempunyai kepentingan Kerajaan.

2.3.4. Analisis Audit terhadap 513 syarikat Persekutuan mendapati amalan terbaik berkaitan penyediaan KPI adalah seperti berikut:

- a. 437 (85.2%) syarikat telah menyediakan KPI selaras dengan pelan strategik syarikat;
- b. 14 (2.7%) syarikat menyediakan KPI tetapi tidak selaras dengan pelan strategik syarikat; dan
- c. 62 (12.1%) syarikat tidak menyediakan KPI sebagai sasaran hala tuju yang ditetapkan.

Butiran lanjut seperti di **Jadual 4**.

JADUAL 4
PEMATUHAN PETUNJUK PRESTASI UTAMA BERBANDING
PELAN STRATEGIK SYARIKAT

PERKARA	JUMLAH
Petunjuk Prestasi Utama disediakan selaras dengan Pelan Strategik Syarikat	437
Petunjuk Prestasi Utama disediakan tidak selaras dengan Pelan Strategik Syarikat	14
Petunjuk Prestasi Utama tidak disediakan	62
JUMLAH KESELURUHAN	513

Sumber: Pangkalan Data Sistem e-SelfAudit

2.3.5. Semakan selanjutnya terhadap 451 syarikat Persekutuan yang telah menyediakan KPI mendapati hanya 379 syarikat yang telah diluluskan oleh Lembaga Pengarah. KPI bagi 48 syarikat pula tidak dibentangkan untuk mendapat kelulusan Lembaga Pengarah manakala KPI bagi 24 syarikat lagi tidak dapat disahkan sama ada telah dibentangkan untuk kelulusan Lembaga Pengarah. Butiran lanjut seperti dalam **Jadual 5**.

JADUAL 5
KELULUSAN PETUNJUK PRESTASI UTAMA OLEH LEMBAGA PENGARAH

PERKARA	JUMLAH
Petunjuk Prestasi Utama diluluskan oleh Lembaga Pengarah	379
Petunjuk Prestasi Utama tidak diluluskan oleh Lembaga Pengarah	48
Petunjuk Prestasi Utama tidak dapat disahkan mendapat kelulusan Lembaga Pengarah	24
JUMLAH KESELURUHAN	451

Sumber: Pangkalan Data Sistem e-SelfAudit

2.3.6. Selanjutnya, 62 syarikat Persekutuan tidak menyediakan KPI di mana dua syarikat merupakan subsidiari yang dimiliki oleh syarikat MKD dan tertakluk kepada Garis Panduan MKD Tahun 2024. Butiran syarikat seperti dalam **Jadual 6**.

JADUAL 6
SYARIKAT MKD ATAU SYARIKAT SUBSIDIARI MKD
YANG TIDAK MENYEDIKAN KPI

BIL.	NAMA SYARIKAT	SYARIKAT INDUK
1.	Multimodal Freight Sdn. Bhd.	Keretapi Tanah Melayu Berhad
2.	Mount Serudum Ventures Sdn. Bhd.	Khazanah Nasional Berhad

Sumber: Pangkalan Data Sistem e-SelfAudit

3. RUMUSAN

Secara keseluruhannya, didapati 509 (99.2%) daripada 513 syarikat Kerajaan yang dinilai telah melaksanakan operasi dan aktiviti utama yang selaras dengan objektif penubuhannya. Bagaimanapun, empat syarikat (0.8%) menjalankan aktiviti yang tidak selaras atau tidak selaras sepenuhnya dengan Perlembagaan Syarikat. Selain itu, terdapat 59 (11.5%) syarikat yang tidak menyediakan Pelan Strategik dan sembilan (1.8%) syarikat menyediakan Pelan Strategik tetapi tidak selaras dengan objektif penubuhannya. Sebanyak 62 syarikat tidak menyediakan KPI sebagai amalan terbaik dalam memastikan pencapaian hala tuju yang ditetapkan.

4. SYOR AUDIT

4.1. Pihak Lembaga Pengarah disarankan memastikan rantai akauntabiliti diperkukuh dengan menyelaraskan aktiviti utama syarikat agar sentiasa patuh kepada Perlembagaan Syarikat.

4.2. Pihak syarikat disarankan membangunkan Pelan Strategik dan Petunjuk Prestasi Utama (KPI) yang selaras dengan objektif penubuhan serta memastikan dokumen tersebut mendapat kelulusan Lembaga Pengarah bagi mengelakkan risiko kegagalan operasi dan kelemahan tadbir urus.

Aspek Tatakelola

JABATAN AUDIT NEGARA

120
1904 - 2024
TAHUN

1. PENGENALAN

1.1 Kerangka penilaian tatakelola adalah berpandukan kepada gabungan statut, kod, dan garis panduan amalan terbaik di peringkat kebangsaan dan antarabangsa. Rujukan utama yang menjadi asas penilaian adalah seperti berikut:

- a. Akta Syarikat 2016;
- b. Arahan YAB Perdana Menteri No. 1 Tahun 2023 Siri 1 No. 1 Tahun 2024 - Gerakan Pemantapan Tatakelola Nasional Bagi Syarikat Berkepentingan Kerajaan (SBK) dan Syarikat Berhad Menurut Jaminan (CLBG) (Arahan YAB Perdana Menteri);
- c. Malaysian Code on Corporate Governance (MCCG) 2021;
- d. The Green Book (2006): Enhancing Board Effectiveness; dan
- e. Garis Panduan Tadbir Urus Dan Ahli Lembaga Pengarah Syarikat Menteri Kewangan (Diperbadankan) [MKD] 2024.

1.2 Terdapat enam perkara utama di bawah aspek tatakelola yang dinilai melalui Sistem e-SelfAudit iaitu Pengerusi, Lembaga Pengarah, Setiausaha Syarikat, Prosedur Operasi Standard (SOP), Jawatankuasa Audit dan Audit Dalam. Pelaporan pada kali ini menumpukan kepada dua aspek iaitu keanggotaan dan komposisi Lembaga Pengarah serta Jawatankuasa Audit (JKA).

2. KEANGGOTAAN DAN KOMPOSISI LEMBAGA PENGARAH BAGI SYARIKAT KERAJAAN PERSEKUTUAN

2.1. LATAR BELAKANG

2.1.1 Lembaga Pengarah merupakan komponen utama dalam rangka kerja tadbir urus korporat. Mengikut Akta Syarikat 2016 [*Akta 777*], Lembaga Pengarah ialah sekumpulan Pengarah. Dalam hal ini, Pengarah ditakrifkan di bawah seksyen 2 sebagai "*mana-mana orang yang memegang jawatan pengarah sesuatu perbadanan tidak kira dengan apa juga nama dipanggil.*" Seksyen 213(1) pula menetapkan Pengarah hendaklah pada setiap masa menjalankan kuasanya mengikut Akta ini, bagi maksud yang sepatutnya, dan dengan suci hati untuk kepentingan syarikat.

2.1.2 MCCG 2021 pula menyarankan fungsi strategik dan pengawasan Lembaga Pengarah, termasuklah:

- a. menetapkan hala tuju strategik syarikat bagi memastikan perkembangan syarikat;
- b. menjalankan pengawasan terhadap pengurusan syarikat; dan
- c. menetapkan nilai dan piawaian syarikat serta memastikan kewajipan kepada pemegang saham dan pihak berkepentingan dipenuhi.

2.1.3 Dua aspek yang disemak dalam perkara berkaitan Lembaga Pengarah, iaitu keanggotaan Lembaga Pengarah sama ada mematuhi bilangan yang ditetapkan dalam Perlembagaan Syarikat, dan sama ada komposisi Pengarah Bebas kepada Pengarah Bukan Bebas mematuhi Arahan YAB Perdana Menteri yang menetapkan Ahli Lembaga Pengarah (ALP) hendaklah terdiri daripada sekurang-kurangnya satu pertiga Pengarah Bebas. Penilaian aspek Lembaga Pengarah hanya dilaksanakan terhadap 401 daripada 411 syarikat aktif bukan SPV yang mana Kerajaan Persekutuan atau Badan Berkanun Persekutuan atau Pihak Berkuasa Awam memegang lebih daripada separuh modal syer berbayar dalam syarikat tersebut.

2.2. PENEMUAN AUDIT

2.2.1. Keanggotaan Lembaga Pengarah Selaras Dengan Perlembagaan Syarikat

- a. Merujuk kepada subseksyen 32(1) Akta 777, sesuatu syarikat boleh menerima pakai suatu perlembagaan bagi syarikat dan penerimapakaian itu hendaklah melalui ketetapan khas. Subseksyen 32(3) pula menyatakan perlembagaan yang diterima pakai di bawah subseksyen (1) hendaklah mengikat syarikat itu, pengarahnya dan anggotanya.
- b. Keanggotaan Lembaga Pengarah bagi sesebuah syarikat ditentukan sepenuhnya berdasarkan peruntukan klausa yang terkandung dalam Perlembagaan Syarikat masing-masing.
- c. Analisis Audit mendapati keanggotaan Lembaga Pengarah bagi 385 (96%) daripada 401 syarikat adalah mematuhi Perlembagaan Syarikat masing-masing dengan bilangan Lembaga Pengarah yang dilantik antara satu hingga 18 orang.

d. Selanjutnya, keanggotaan Lembaga Pengarah tidak mematuhi Perlembagaan Syarikat bagi lima syarikat yang melantik kurang daripada bilangan ditetapkan manakala satu syarikat melantik lebih daripada bilangan ditetapkan.

e. Bilangan Lembaga Pengarah yang dilantik bagi 10 syarikat adalah antara dua hingga sembilan orang. Bilangan Pengarah yang perlu dilantik tidak dinyatakan dalam Perlembagaan Syarikat namun secara umumnya telah mematuhi bilangan minimum yang ditetapkan dalam perenggan 196(1)(a) dan (b) Akta 777. Butiran lanjut seperti dalam **Jadual 1**.

JADUAL 1
STATUS KEANGGOTAAN LEMBAGA PENGARAH

PERKARA	JUMLAH
Keanggotaan Lembaga Pengarah mematuhi Perlembagaan Syarikat	385
Keanggotaan Lembaga Pengarah tidak mematuhi Perlembagaan Syarikat	6
Keanggotaan Lembaga Pengarah selaras dengan bilangan minimum ditetapkan dalam Akta 777	10
JUMLAH KESELURUHAN	401

Sumber: Pangkalan Data Sistem e-SelfAudit

f. Berdasarkan pengisytiharan dalam Sistem e-SelfAudit, sebanyak 54 syarikat mempunyai wakil Kerajaan dalam Lembaga Pengarah. Sembilan syarikat tidak mempunyai wakil Kerajaan walaupun Perlembagaan Syarikat atau Piagam Lembaga Pengarah menetapkan keperluan tersebut.

2.2.2. Komposisi Lembaga Pengarah Selaras Dengan Arahan YAB Perdana Menteri

a. Kebebasan Lembaga Pengarah merupakan elemen yang penting bagi memastikan keberkesanan Lembaga Pengarah dalam melaksanakan peranan yang ditetapkan sepertimana digariskan dalam Arahan YAB Perdana Menteri bertarikh 20 Mei 2024. Perenggan 5.2 Arahan YAB Perdana Menteri antara lain menetapkan ALP hendaklah terdiri daripada sekurang-kurangnya satu pertiga Pengarah Bebas untuk mengukuhkan kebebasan Lembaga Pengarah. Penglibatan Pengarah Bebas juga akan dapat mengukuhkan keobjektifan Lembaga Pengarah dalam perbincangan dan proses membuat keputusan.

b. Takrifan Pengarah Bebas seperti dinyatakan dalam Arahan YAB Perdana Menteri adalah Pengarah yang bebas daripada pengurusan dan sebarang perniagaan atau hubungan lain dengan SBK dan CLBG atau syarikat berkaitan SBK dan CLBG termasuklah seseorang yang:

- i. bukan pegawai Kerajaan yang sedang berkhidmat;
 - ii. bukan seorang pegawai SBK dan CLBG atau syarikat berkaitan SBK dan CLBG tersebut;
 - iii. bukan ahli keluarga mana-mana pegawai SBK dan CLBG atau syarikat berkaitan SBK dan CLBG tersebut; dan
 - iv. bukan yang sedang berkhidmat sebagai penasihat atau terlibat dalam sebarang transaksi termasuk menyediakan khidmat nasihat profesional untuk SBK dan CLBG atau syarikat berkaitan SBK dan CLBG tersebut.
- c. Analisis Audit mendapati tahap pematuhan terhadap saranan yang dinyatakan dalam Arahan YAB Perdana Menteri belum dilaksanakan sepenuhnya oleh syarikat Kerajaan Persekutuan. Butirannya adalah seperti berikut:
- i. 200 (49.9%) syarikat telah melaksanakan saranan berkaitan komposisi Lembaga Pengarah dan pelantikan Pengarah Bebas;
 - ii. 52 (13%) syarikat telah melantik Pengarah Bebas namun masih tidak mencapai sekurang-kurangnya satu pertiga daripada bilangan Lembaga Pengarah keseluruhannya seperti yang disarankan;
 - iii. 113 (28.1%) syarikat tidak melantik Pengarah Bebas dalam Lembaga Pengarah dan ALP dianggotai oleh Pengarah Bukan Bebas keseluruhannya; dan
 - iv. komposisi Lembaga Pengarah bagi 36 (9%) syarikat tidak dapat disahkan kerana tidak diisytiharkan oleh syarikat dalam Sistem e-SelfAudit.

Butiran lanjut seperti dalam **Jadual 2**.

JADUAL 2
STATUS PELANTIKAN PENGARAH BEBAS DALAM LEMBAGA PENGARAH

PERKARA	JUMLAH
Komposisi Lembaga Pengarah dan pelantikan Pengarah Bebas selaras dengan saranan ditetapkan	200
Komposisi Lembaga Pengarah dan pelantikan Pengarah Bebas tidak mencapai saranan ditetapkan	52
Tiada pelantikan Pengarah Bebas dalam Lembaga Pengarah	113
Komposisi Lembaga Pengarah tidak dapat disahkan kerana maklumat tidak lengkap	36
JUMLAH KESELURUHAN	401

Sumber: Pangkalan Data Sistem e-SelfAudit

2.3. RUMUSAN

Secara keseluruhannya, 385 (96%) daripada 401 syarikat Persekutuan telah membuat pelantikan Lembaga Pengarah selaras dengan ketetapan dalam Perlembagaan Syarikat. Bagaimanapun, 165 (41.1%) syarikat Persekutuan masih tidak mengamalkan saranan berkaitan komposisi Lembaga Pengarah seperti yang dinyatakan dalam Arahan YAB Perdana Menteri berhubung keanggotaan Pengarah Bebas yang perlu mencapai sekurang-kurangnya satu pertiga daripada ALP. Ini boleh menjejaskan keupayaan Lembaga Pengarah untuk melaksanakan pengawasan yang bebas dan objektif.

2.4. SYOR AUDIT

Bagi menangani isu yang dibangkitkan, JAN mengesyorkan Kementerian Pengawal dan Lembaga Pengarah kesemua syarikat terlibat mempertimbangkan syor seperti berikut:

2.4.1. syarikat terlibat melakukan semakan menyeluruh terhadap komposisi Lembaga Pengarah berasaskan Perlembagaan Syarikat dan keperluan yang ditetapkan dalam Arahan YAB Perdana Menteri; dan

2.4.2. melantik wakil Kerajaan dalam Lembaga Pengarah selaras dengan ketetapan Perlembagaan Syarikat atau Piagam Lembaga Pengarah bagi menjaga kepentingan Kerajaan selaku pemegang kepentingan dalam syarikat terlibat.

3. JAWATANKUASA AUDIT (JKA)

3.1. LATAR BELAKANG

3.1.1. Berdasarkan Bab 1, The Green book (2006) : Enhancing Boards Effectiveness, Lembaga Pengarah disyorkan untuk menubuhkan Jawatankuasa Audit (JKA) bagi membantu Lembaga Pengarah dalam mengenal pasti dan mengurus risiko utama dalam pengurusan syarikat.

3.1.2. Seksyen 7.1, Garis Panduan Tadbir Urus dan Ahli Lembaga Pengarah Syarikat Menteri Kewangan (Diperbadankan) 2024 mengesyorkan, Lembaga Pengarah menubuhkan jawatankuasa yang bersesuaian seperti JKA bagi membantu Lembaga Pengarah membuat keputusan dan mengawal selia mengikut terma rujukan jawatankuasa yang ditetapkan.

3.1.3. Prinsip B, Amalan 9.0, MCCG 2021 mengesyorkan agar syarikat menubuhkan JKA. Peranan utama JKA adalah untuk menyemak dan memastikan ketelusan dan kebolehpercayaan laporan kewangan serta keberkesanan sistem kawalan dalaman.

3.1.4. JKA perlu melaporkan hasil mesyuarat dan syor kepada Lembaga Pengarah secara jelas dan berkala. Pelaporan yang konsisten ini penting bagi memastikan keberkesanan fungsi JKA dan menyokong peranan pengawasan Lembaga Pengarah.

3.2. PENEMUAN AUDIT

3.2.1. Penubuhan Jawatankuasa Audit (JKA)

a. Analisis Audit mendapati perkara berikut:

- i. 202 (50.3%) syarikat telah menubuhkan JKA atau yang setara dengannya;
- ii. 119 (29.7%) syarikat tidak menubuhkan JKA;
- iii. fungsi JKA bagi 68 (17%) syarikat dilaksanakan oleh Syarikat induk; dan
- iv. 12 (3%) syarikat menyatakan penubuhan JKA tidak berkaitan serta tidak dapat disahkan.

Butiran lanjut seperti dalam **Jadual 3**.

JADUAL 3
STATUS PENUBUHAN JKA

PERKARA	JUMLAH
Syarikat telah menubuhkan Jawatankuasa Audit atau yang setara dengannya	202
Syarikat tidak menubuhkan Jawatankuasa Audit	119
Peranan Jawatankuasa Audit dilaksanakan oleh Syarikat Induk	68
Status syarikat tidak dapat disahkan kerana maklumat tidak lengkap	12
JUMLAH KESELURUHAN	401

Sumber: Pangkalan Data Sistem e-SelfAudit

3.2.2. Pembentangan Laporan Jawatankuasa Audit (JKA) Dalam Mesyuarat Lembaga Pengarah

Selanjutnya daripada 202 syarikat yang telah menubuhkan JKA, sebanyak 166 (82.2%) syarikat telah membentangkan laporan JKA dalam mesyuarat Lembaga Pengarah selaras dengan amalan terbaik tatakelola. Sebanyak 25 (12.4%) syarikat tidak membentangkan laporan JKA dalam mesyuarat Lembaga Pengarah dan 11 (5.4%) syarikat menyatakan tidak berkenaan dan tidak dapat disahkan. Butiran lanjut seperti dalam **Jadual 4**.

JADUAL 4
PEMBENTANGAN LAPORAN JAWATANKUASA AUDIT KEPADA LEMBAGA PENGARAH

PERKARA	JUMLAH
Laporan Jawatankuasa Audit dibentangkan kepada Lembaga Pengarah	166
Laporan Jawatankuasa Audit tidak dibentangkan kepada Lembaga Pengarah	25
Status Laporan Jawatankuasa Audit tidak dapat disahkan	11
JUMLAH KESELURUHAN	202

Sumber: Pangkalan Data Sistem e-SelfAudit

3.3. RUMUSAN

Secara keseluruhannya, 202 (50.3%) daripada 401 syarikat Persekutuan telah menubuhkan JKA atau yang setara dengannya manakala peranan JKA bagi 68 (17%) syarikat dilaksanakan di peringkat Syarikat induk. Bagaimanapun, masih terdapat 119 (29.7%) syarikat yang tidak menubuhkan JKA atau yang setara dengannya. Selain itu, terdapat 25 (6.2%) syarikat yang telah menubuhkan JKA tetapi tidak membentangkan laporan JKA dalam mesyuarat Lembaga Pengarah. Ketiadaan JKA dalam sesebuah syarikat boleh menimbulkan risiko terhadap kawalan dalaman yang membawa kepada kelemahan tadbir urus korporat.

3.4. SYOR AUDIT

Bagi menangani isu yang dibangkitkan, JAN mengesyorkan Kementerian Pengawal dan Lembaga Pengarah kesemua syarikat terlibat mempertimbangkan syor seperti berikut:

- 3.4.1. menubuhkan JKA selaras dengan amalan tadbir urus korporat terbaik bagi meningkatkan akauntabiliti dan sistem kawalan dalaman syarikat; dan
- 3.4.2. memastikan Laporan JKA dibentangkan dalam mesyuarat Lembaga Pengarah sepertimana yang disarankan.

Prestasi Kewangan Syarikat

JABATAN AUDIT NEGARA

120
1904 - 2024
TAHUN

PRESTASI KEWANGAN SYARIKAT

1. PENGENALAN

1.1. SYARIKAT BERHAD MENURUT SYER


Prestasi kewangan syarikat Persekutuan dinilai berdasarkan Penyata Kewangan Beraudit Tahun 2022 dan 2023. Secara keseluruhannya, daripada 460 bilangan syarikat CLBS aktif di peringkat Kerajaan Persekutuan, sebanyak 260 syarikat telah mencatatkan keuntungan berjumlah RM108.972 bilion pada tahun 2022 dan bilangan ini meningkat kepada 285 syarikat pada tahun 2023. Bagaimanapun, jumlah keuntungan pada tahun 2023 menurun sebanyak 8.5% dengan keuntungan tahun semasa berjumlah RM99.699 bilion. Butiran seperti dalam **Jadual 1** dan **Carta 1**.

JADUAL 1
KEUNTUNGAN/(KERUGIAN) CLBS AKTIF

TAHUN	SYARIKAT UNTUNG		SYARIKAT RUGI	
	BILANGAN	RM Juta	BILANGAN	RM Juta
2022	260	108,972.02	200	(14,471.86)
2023	285	99,698.50	175	(32,417.69)

Sumber: Pangkalan Data Sistem e-SelfAudit

CARTA 1
KEUNTUNGAN/(KERUGIAN) SYARIKAT CLBS AKTIF PADA TAHUN 2022 DAN 2023



Sumber: Pangkalan Data Sistem e-SelfAudit

1.2. SYARIKAT BERHAD MENURUT JAMINAN


Bagi 65 syarikat CLBG aktif, analisis prestasi kewangan ditumpukan kepada lebih atau kurangan terhadap dana syarikat. Perkara ini kerana CLBG berfungsi sebagai jentera pelaksana dasar khusus, memacu agenda sosioekonomi dan pembangunan negara dalam bidang-bidang yang tidak semestinya didorong oleh keuntungan komersial. Bilangan CLBG aktif yang mencatatkan lebih menunjukkan peningkatan dari tahun 2022 berbanding tahun 2023. Pada tahun 2022, sebanyak 36 syarikat telah mencatatkan lebih berjumlah RM730.34 juta, dan bilangan ini meningkat kepada 44 syarikat pada tahun 2023 dengan lebih tahun 2023 meningkat kepada RM783.70 juta. Butiran lanjut seperti dalam **Jadual 2** dan **Carta 2**.

JADUAL 2
LEBIHAN/(KURANGAN) CLBG

SYARIKAT	PERKARA	2022	2023	CATATAN
Syarikat Mencatatkan Lebihan	Bilangan	36	44	Peningkatan dalam bilangan syarikat yang mencatatkan lebihan
	RM Juta	730.34	783.70	Peningkatan dalam jumlah keseluruhan lebihan syarikat
Syarikat Mencatatkan Kurangan	Bilangan	25	16	Penurunan dalam bilangan syarikat yang mencatatkan kurangan
	RM Juta	(167.42)	(30.15)	Penurunan dalam jumlah keseluruhan kurangan syarikat
Syarikat Tiada Lebihan/Kurangan	Bilangan	4	5	Peningkatan dalam bilangan syarikat yang tiada lebihan/kurangan

Sumber: Pangkalan Data Sistem e-SelfAudit

CARTA 2
LEBIHAN/(KURANGAN) SYARIKAT CLBG PADA TAHUN 2022 DAN 2023



Sumber: Pangkalan Data Sistem e-SelfAudit

1.3. PELAPORAN PRESTASI KEWANGAN

Pelaporan pada kali ini menumpukan kepada tiga aspek utama yang berkaitan dengan prestasi kewangan syarikat iaitu Pembayaran Dividen oleh Syarikat Kerajaan; Syarikat Kerajaan Dengan Isu Usaha Berterusan dan Syarikat Kerajaan Berstatus Dorman.

2. PEMBAYARAN DIVIDEN OLEH SYARIKAT KERAJAAN PERSEKUTUAN

2.1. LATAR BELAKANG

2.1.1. Pembayaran dividen oleh syarikat Kerajaan merupakan salah satu mekanisme utama pulangan pelaburan kepada Kerajaan selaku pemegang saham, di samping memberi gambaran terhadap tahap prestasi kewangan, kecekapan pengurusan serta kemampanan operasi sesebuah syarikat. Keupayaan syarikat untuk menjana dan membayar dividen secara konsisten juga menjadi petunjuk penting terhadap keberkesanan tadbir urus korporat dan pencapaian objektif penubuhan syarikat.

2.1.2. Menurut seksyen 131 Akta Syarikat 2016 [*Akta 777*], suatu syarikat hanya boleh membuat pengagihan kepada pemegang syer daripada keuntungan yang ada bagi syarikat itu jika syarikat menjadi solven.

2.1.3. Merujuk seksyen 132 Akta 777, Pengarah boleh membenarkan suatu pengagihan dibuat pada bila-bila masa dan mengikut apa-apa amaun sebagaimana yang didapati sesuai jika Pengarah berpuas hati bahawa syarikat itu akan menjadi solven sebaik selepas pengagihan dibuat. Bagi maksud seksyen ini, syarikat dianggap sebagai solven jika syarikat itu berupaya untuk membayar hutangnya jika dan apabila hutang itu menjadi kena dibayar dalam masa dua belas bulan selepas pengagihan dibuat.

2.1.4. Syarikat boleh mengagihkan dividen setelah syarikat dipastikan solven, dan agihan dibuat daripada keuntungan (termasuk pendapatan tertahan [*retained earnings*] atau keuntungan luar biasa).

2.2. PENEMUAN AUDIT

2.2.1. Pembayaran Dividen Kepada Pemegang Saham

a. Analisis Audit terhadap pembayaran dividen hanya dilaksanakan terhadap 575 syarikat yang berstatus CLBS. Setakat bulan Disember 2023, sebanyak 134 (23.3%) syarikat CLBS telah membuat pembayaran dividen kepada pemegang saham berjumlah

RM82.221 bilion pada tahun 2022. Bilangan ini meningkat kepada 145 (25.2%) syarikat yang telah membuat pembayaran sejumlah RM77.735 bilion pada tahun 2023. Pemegang saham antaranya terdiri daripada Kerajaan Persekutuan melalui Menteri Kewangan Diperbadankan (MKD), Badan Berkanun Persekutuan atau syarikat induk yang mempunyai kawalan kepentingan terhadap syarikat subsidiari di bawahnya.

b. Sebanyak 15 (11.2%) syarikat Persekutuan daripada 134 syarikat pada tahun 2022 dan 16 (11%) syarikat daripada 145 syarikat pada tahun 2023 telah membuat pembayaran dividen secara langsung kepada Kerajaan Persekutuan dan diakaunkan ke dalam Akaun Hasil Disatukan berdasarkan pemegangan saham MKD dalam syarikat berkaitan. Jumlah dividen yang dibayar kepada Kerajaan Persekutuan pada tahun 2022 dan 2023 masing-masing berjumlah RM50.777 bilion dan RM43.279 bilion. Butiran syarikat CLBS yang membayar dividen kepada Kerajaan Persekutuan adalah seperti dalam **Jadual 3**.

JADUAL 3
SYARIKAT CLBS YANG MEMBAYAR DIVIDEN KEPADA KERAJAAN PERSEKUTUAN PADA TAHUN 2022 DAN 2023

BIL.	BUTIRAN	TAHUN		PERUBAHAN	
		2023 (RM Juta)	2022 (RM Juta)	RM Juta	%
1.	Petroleum Nasional Berhad (PETRONAS)	40,000.00	50,000.00	(10,000.00)	(20.0)
2.	Actius Terra Global Holdings Sdn. Bhd.	2,100.00	-	2,100.00	100.0
3.	Khazanah Nasional Berhad	1,000.00	500.00	500.00	100.0
4.	Bank Pembangunan Malaysia Berhad	85.00	75.00	10.00	13.3
5.	Pengurusan Aset Air Berhad	21.33	19.01	2.32	12.2
6.	Bank Pertanian Malaysia Berhad	16.00	15.00	1.00	6.7
7.	UDA Holdings Berhad	11.95	38.80	(26.85)	(69.2)
8.	IJN Holdings Sdn. Bhd.	11.55	11.50	0.05	0.4
9.	PBLT Sdn. Bhd.	11.00	12.00	(1.00)	(8.3)
10.	Small Medium Enterprise Development Bank Malaysia Berhad	6.22	5.01	1.21	24.2
11.	Syarikat Perumahan Pegawai Kerajaan Sdn. Bhd.	5.98	37.81	(31.83)	(84.2)
12.	Prokhas Sdn. Bhd.	5.94	55.65	(49.71)	(89.3)
13.	Malaysian Kuwaiti Investment Co. Sdn. Bhd.	1.64	0.63	1.01	160.3
14.	Malaysia Debt Venture Sdn. Bhd.	1.40	1.50	(0.10)	(6.7)
15.	Amanah Raya Berhad	0.60	0.60	-	-
16.	Rangkaian Hotel Seri Malaysia Sdn. Bhd.	0.27	-	0.27	100.0
17.	Cyberview Sdn. Bhd.	-	4.93	(4.93)	(100.0)
JUMLAH		43,278.88	50,777.44	(7,495.56)	(14.8)

Sumber: Pangkalan Data Sistem e-SelfAudit dan Penyata Kewangan Beraudit bagi tahun berakhir 2022 dan 2023

c. Pihak Audit mendapati sebahagian besar dividen yang dibayar kepada Kerajaan Persekutuan disumbangkan oleh Petroliaam Nasional Berhad (PETRONAS), iaitu sejumlah RM50 bilion atau mewakili 98.5% pada tahun 2022 dan RM40 bilion atau mewakili 92.4% pada tahun 2023.

d. Selain daripada pembayaran dividen tunai, terdapat dua syarikat iaitu PLUS Malaysia Berhad dan UEM Group Berhad yang membuat pembayaran dalam bentuk penerbitan sukuk bernilai RM2.045 bilion pada tahun 2022 dan RM1.771 bilion pada tahun 2023.

2.2.2. Syarikat Untung Tidak Membayar Dividen

a. Semakan Audit mendapati tiada ketetapan untuk syarikat Kerajaan membayar dividen kepada pemegang saham sekiranya syarikat mencatatkan keuntungan dan berada dalam kedudukan kewangan yang solven kecuali Garis Panduan MKD 2024 yang menggariskan syarat pembayaran dividen bagi syarikat MKD yang memperoleh keuntungan dalam sesuatu tahun kewangan tetapi Lembaga Pengarah memutuskan untuk tidak membayar dividen atas sebab-sebab tertentu, syarikat perlu mengemukakan permohonan pengecualian pembayaran dividen pada tahun kewangan tersebut untuk pertimbangan MKD.

b. Analisis Audit telah dilaksanakan terhadap 13 syarikat MKD yang mencatatkan keuntungan semasa pada tahun 2022 dan 2023, mencatatkan keuntungan terkumpul pada tahun 2023 serta merekodkan nisbah semasa dan solvensi pada kadar sama dengan atau lebih daripada 1 tetapi tidak membuat pembayaran dividen. Butiran syarikat MKD yang mencatatkan keuntungan terkumpul tertinggi pada tahun 2023 tetapi tidak membayar dividen seperti dalam **Jadual 4**.

JADUAL 4
SYARIKAT MKD BERSTATUS CLBS MENCATAT KEUNTUNGAN
TETAPI TIDAK MEMBAYAR DIVIDEN PADA TAHUN 2022 DAN 2023

BIL.	NAMA SYARIKAT	NAMA AGENSI/ SYARIKAT INDUK	KEUNTUNGAN TAHUN SEMASA (RM Juta)		KEUNTUNGAN TERKUMPUL (RM Juta)	NISBAH SEMASA 2023	NISBAH SOLVENSI 2023
			2023	2022	2023		
1.	Malaysian Refining Company Sdn. Bhd.	PETRONAS	290.16	110.06	6,867.30	1.64	8.28
2.	PETRONAS Penapisan (Terengganu) Sdn. Bhd.	PETRONAS	3,218.90	27.47	957.08	3.14	7.71
3.	PETRONAS Technical Services Sdn. Bhd.	PETRONAS	19.25	7.48	487.16	1.78	2.71
4.	Cenviro Sdn. Bhd.	Khazanah Nasional Berhad	8.09	86.15	148.51	6.92	2.46
5.	PETRONAS Management Training Sdn. Bhd.	PETRONAS	13.33	6.75	91.28	1.08	1.25
6.	Cradle Fund Sdn. Bhd.	-	6.33	1.67	55.43	> 10	1.80
7.	FELCRA Processing & Engineering Sdn. Bhd.	FELCRA Berhad	1.83	2.69	46.79	2.65	2.70

BIL.	NAMA SYARIKAT	NAMA AGENSI/ SYARIKAT INDUK	KEUNTUNGAN TAHUN SEMASA (RM Juta)		KEUNTUNGAN TERKUMPUL (RM Juta)	NISBAH SEMASA 2023	NISBAH SOLVENSI 2023
			2023	2022	2023		
8.	Syarikat P.J. Nagus Sdn. Bhd.	Malaysian Kuwaiti Investment Co. Sdn. Bhd.	6.58	6.73	43.26	1.14	6.86
9.	KLCC (Holdings) Sdn. Bhd.	PETRONAS	1.22	1.12	13.53	> 10	> 10
10.	Petrosains Sdn. Bhd.	PETRONAS	0.76	0.42	4.85	1.19	1.19
11.	IJN International Sdn. Bhd.	IJN Holdings Sdn. Bhd.	3.16	0.72	4.06	2.76	1.68
12.	SIRIM Calibration Sdn. Bhd.	SIRIM Berhad	0.30	1.23	2.93	3.36	5.71
13.	SIRIM Academy Sdn. Bhd.	SIRIM Berhad	0.80	0.73	2.32	2.91	2.72

Sumber: Pangkalan Data Sistem e-SelfAudit dan Penyata Kewangan Beraudit bagi tahun berakhir 2022 dan 2023

c. Selain itu, terdapat 17 syarikat bukan MKD yang tidak membayar dividen walaupun mencatatkan keuntungan pada tahun 2022 dan 2023 serta nisbah semasa dan solvensi pada kadar sama dengan atau lebih daripada 1 bagi tahun 2023. Penetapan pembayaran dividen bagi 17 syarikat ini hanya diputuskan di peringkat Pengarah syarikat seperti mana peruntukan di bawah Akta 777 memandangkan tiada sebarang ketetapan atau arahan atau polisi pembayaran dividen ditetapkan oleh kementerian yang mengawal selia.

2.3. RUMUSAN

Sebanyak 134 syarikat Persekutuan telah membuat pembayaran dividen kepada pemegang saham berjumlah RM82.221 bilion pada tahun 2022. Bilangan ini meningkat kepada 145 syarikat pada tahun 2023 dengan jumlah dividen sebanyak RM77.735 bilion. Daripada jumlah ini, sebanyak 15 dan 16 syarikat telah membayar dividen secara langsung kepada Kerajaan Persekutuan masing-masing berjumlah RM50.777 bilion pada tahun 2022 dan RM43.279 bilion pada tahun 2023. Sebahagian besar dividen kepada Kerajaan Persekutuan disumbangkan oleh PETRONAS iaitu sejumlah RM50 bilion pada tahun 2022 dan RM40 bilion pada tahun 2023. Sebanyak 13 syarikat MKD termasuk subsidiari tidak membayar dividen walaupun mencatatkan keuntungan pada tahun 2022 dan 2023, mencatatkan keuntungan terkumpul pada tahun 2023 serta nisbah semasa dan solvensi pada kadar sama dengan atau lebih daripada 1 bagi tahun 2023.

2.4. SYOR AUDIT

JAN mengesyorkan Kementerian Pengawal dan Lembaga Pengarah bagi kesemua syarikat Kerajaan Persekutuan mempertimbangkan syor seperti berikut:

2.4.1. Kerajaan melalui Kementerian Pengawal perlu menetapkan polisi pembayaran dividen berdasarkan keuntungan yang diperoleh dan kedudukan kewangan syarikat

Kerajaan yang berada di bawah seliaan Kementerian masing-masing. Dalam hal ini, Garis Panduan MKD Tahun 2024 berkaitan pembayaran dividen boleh dijadikan sebagai rujukan;

2.4.2. memastikan kesemua syarikat di bawah kawal selia masing-masing mengatur strategi bagi mempertingkatkan kecekapan operasi dan mengawal kos secara efektif sebagai langkah untuk menjana dan meningkatkan jumlah keuntungan. Prestasi baik syarikat akan dapat memberi pulangan dividen kepada pemegang saham terutamanya Kerajaan Persekutuan; dan

2.4.3. Lembaga Pengarah dan pengurusan syarikat MKD yang mencatatkan keuntungan tahun semasa, keuntungan terkumpul, nisbah semasa dan solvensi pada kadar sama dengan atau lebih daripada 1 perlu mempertimbangkan pembayaran dividen sebagai pulangan atas pelaburan mereka.

3. SYARIKAT KERAJAAN DENGAN ISU USAHA BERTERUSAN

3.1. LATAR BELAKANG

3.1.1. Prinsip usaha berterusan (going concern) adalah satu andaian asas dalam perakaunan dan penyediaan penyata kewangan, yang secara ringkasnya mengandaikan bahawa syarikat akan kekal beroperasi dan memenuhi obligasinya pada masa hadapan tanpa sebarang hasrat atau keperluan yang material untuk menjalani pembubaran atau pengurangan signifikan dalam skop operasi.

3.1.2. Malaysian Financial Reporting Standard (MFRS) 101.25 dan Malaysian Private Entities Reporting Standard (MPERS) 3.8 menyatakan tanggungjawab pihak pengurusan untuk menilai kemampuan entiti untuk terus beroperasi sebagai sebuah entiti yang berterusan semasa menyediakan penyata kewangan. MFRS 101.25 dan MPERS 3.9 juga menyatakan apabila sesebuah entiti tidak menyediakan penyata kewangan atas asas usaha berterusan, ia hendaklah mendedahkan fakta tersebut, bersama-sama dengan asas yang digunakan untuk menyediakan penyata kewangan dan sebab mengapa entiti tidak dianggap sebagai usaha berterusan.

3.1.3. Selanjutnya, juruaudit luar bertanggungjawab untuk memperoleh bukti audit yang mencukupi dan sesuai bagi menyimpulkan sama ada wujudnya ketidakpastian material berhubung peristiwa atau keadaan yang boleh menimbulkan keraguan signifikan terhadap andaian usaha berterusan tersebut. Juruaudit luar akan menarik perhatian melalui perenggan Penegasan Perkara terhadap keupayaan syarikat untuk meneruskan operasi sebagai entiti berterusan.

3.1.4. Antara asas penentuan isu usaha berterusan adalah seperti berikut:

- a. kerugian terkumpul;
- b. liabiliti semasa bersih di mana jumlah liabiliti semasa melebihi jumlah aset semasa; dan/atau
- c. defisit modal/dana iaitu keadaan di mana jumlah kerugian terkumpul syarikat melebihi jumlah modal yang dilaburkan oleh pemegang saham (ekuiti pemegang saham) atau sumbangan dana.

3.1.5. Pelaporan ini akan menumpukan kepada syarikat Kerajaan yang mempunyai isu keupayaan untuk terus beroperasi sebagai usaha berterusan berdasarkan Penyata Kewangan Beraudit bagi tahun berakhir 2023.

3.2. PENEMUAN AUDIT

3.2.1. Isu Usaha Berterusan Yang Dibangkitkan Dalam Sijil Audit

a. Berdasarkan Sijil Audit terhadap Penyata Kewangan Beraudit bagi tahun berakhir 2023, juruaudit luar bagi 64 syarikat telah mengeluarkan pendapat Penegasan Perkara (Emphasis of Matter) kerana wujudnya ketidakpastian yang ketara terhadap keupayaan syarikat untuk terus beroperasi sebagai usaha berterusan.

b. Daripada 64 syarikat tersebut, sebanyak 57 syarikat mempunyai isu kerugian terkumpul, liabiliti semasa bersih dan defisit modal/dana, tiga syarikat mempunyai kerugian terkumpul dan liabiliti semasa bersih, tiga syarikat mempunyai kerugian terkumpul dan defisit modal/dana manakala satu syarikat mempunyai liabiliti semasa bersih. Butiran lanjut seperti dalam **Jadual 5**.

JADUAL 5
BILANGAN SYARIKAT YANG MEMPUNYAI
ISU USAHA BERTERUSAN DALAM SIJIL JURUAUDIT LUAR

ASPEK ISU USAHA BERTERUSAN	BIL. SYARIKAT
Kerugian terkumpul, liabiliti semasa bersih dan defisit modal/dana	57
Kerugian terkumpul dan liabiliti semasa bersih	3
Kerugian terkumpul dan defisit modal/dana	3
Liabiliti semasa bersih	1
JUMLAH KESELURUHAN BIL. SYARIKAT	64

Sumber: Sijil Juruaudit Luar dalam Penyata Kewangan Beraudit bagi tahun berakhir 2023

3.2.2. Isu Usaha Berterusan Dalam Nota Kepada Akaun

a. Sebanyak 77 syarikat telah membuat pendedahan dalam Nota Kepada Akaun berkaitan Asas Usaha Berterusan dalam Penyata Kewangan Beraudit bagi tahun berakhir 2023 yang menjelaskan bahawa syarikat berupaya meneruskan operasi sebagai usaha berterusan antaranya dengan sokongan kewangan berterusan daripada agensi induk dan/atau syarikat induk dan/atau pemegang saham. Pendedahan ini bermaksud sokongan daripada induk atau pemegang saham merupakan antara faktor yang membolehkan syarikat mengekalkan asas usaha berterusan. Pecahan bilangan syarikat yang mempunyai jenis isu dalam Nota Kepada Akaun seperti dalam **Jadual 6**.

JADUAL 6
BILANGAN SYARIKAT YANG MEMPUNYAI
ASAS KEPADA ISU USAHA BERTERUSAN DALAM NOTA KEPADA AKAUN

ASPEK ISU USAHA BERTERUSAN	BIL. SYARIKAT
Kerugian terkumpul, liabiliti semasa bersih dan defisit modal/dana	47
Kerugian terkumpul dan liabiliti semasa bersih	17
Kerugian terkumpul dan defisit modal/dana	7
Liabiliti semasa bersih	5
Kerugian terkumpul	1
JUMLAH KESELURUHAN BIL. SYARIKAT	77

Sumber: Penyata Kewangan Beraudit bagi tahun berakhir 2023

b. Bilangan keseluruhan syarikat yang mempunyai isu usaha berterusan dalam Sijil Audit dan yang dibangkitkan dalam Nota Kepada Akaun adalah sebanyak 141 syarikat. Semakan Audit selanjutnya terhadap Penyata Kewangan Beraudit bagi tahun berakhir 2023 mendapati sembilan syarikat menerima sokongan kewangan daripada Kerajaan Persekutuan dalam bentuk geran dengan baki pendapatan geran tertunda (liabiliti) berjumlah RM1.997 bilion bagi tahun berakhir 2023.

c. Daripada sembilan syarikat tersebut, sebanyak lima syarikat menjalankan aktiviti berkaitan fungsi strategik, tujuan kepentingan awam dan mendukung dasar Kerajaan selaras dengan mandat ditetapkan atau untuk tujuan bukan keuntungan. Baki empat syarikat pula menerima geran yang disalurkan untuk membiayai pinjaman atau faedah pinjaman bercagar serta membiayai operasi atau projek berkaitan. Butiran sembilan syarikat tersebut adalah seperti dalam **Jadual 7**.

JADUAL 7
SYARIKAT DENGAN BAKI PENDAPATAN GERAN TERTUNDA
BAGI TAHUN BERAKHIR 2023

BIL.	NAMA SYARIKAT	BAKI GERAN TERTUNDA BAGI TAHUN BERAKHIR 2023 (RM Juta)	RINGKASAN OBJEKTIF PENUBUHAN SYARIKAT	TUJUAN GERAN DISALURKAN
Syarikat yang melaksanakan fungsi strategik, tujuan kepentingan awam dan mendukung dasar Kerajaan selaras dengan mandat ditetapkan atau untuk tujuan bukan keuntungan				
1.	Prasarana Malaysia Berhad	1,700.00	Melaksanakan projek infrastruktur yang diluluskan oleh Kerajaan Malaysia.	Pembayaran balik sebahagian kemudahan Revolving Credit.
2.	Indah Water Konsortium Sdn. Bhd.	149.56	Mereka bentuk, membina, menaik taraf, memperbaharui, mengendali dan menyelenggara keseluruhan sistem pembetungan awam.	Penyelidikan, pembangunan, penaiktarafan, penggantian dan penambahbaikan aset pembetungan.
3.	Malaysia Automotive Robotics & IoT Institute	29.06	Mempromosikan daya saing industri automotif Malaysia melalui pembangunan modal insan, penyelidikan dan pembangunan teknologi, dan kolaborasi strategik.	Menyokong pelaksanaan pelbagai program strategik bagi memperkasa industri automotif negara, pembangunan modal insan, dan adaptasi teknologi tinggi.
4.	Kumpulan Modal Perdana Sdn. Bhd.	19.58	Membuat pelaburan dalam syarikat yang memiliki pertumbuhan dan teknologi tinggi serta mengurus modal teroka untuk pemerolehan teknologi.	Membiayai syarikat-syarikat berteknologi tinggi dalam sektor Elektrik dan Elektronik serta sektor Tenaga Boleh Diperbaharui.
5.	Aerospace Malaysia Innovation Centre	11.59	Meneroka dan menggalakkan proses pembangunan industri melalui aplikasi strategik sains dan teknologi seperti kerjasama strategik, pembangunan teknologi, penyelidikan dan sebagai penasihat dasar bagi menyokong pembangunan sosio-ekonomi negara.	Membiayai perbelanjaan operasi.
Geran digunakan untuk pembayaran hutang				
6.	Integrated Nautical Resort Sdn. Bhd.	25.47	Pelancongan dan perhotelan.	Nota 22 kepada Akaun: Bayaran balik pinjaman berjangka bercagar.
7.	Sentuhan Budiman Sdn. Bhd.	18.94	Pengoperasian dalam semua jenis aktiviti kewangan bagi projek pembangunan, pengurusan, perolehan atau tujuan lain atas permintaan Kerajaan.	Nota 16 kepada Akaun: - Pembayaran balik faedah bagi kemudahan pinjaman berjangka bercagar. - Untuk kegunaan operasi syarikat-syarikat yang mana Sentuhan Budiman Sdn. Bhd. bertindak selaku pemegang amanah.
Geran digunakan untuk tujuan operasi				
8.	Garuda Suci Sdn. Bhd.	40.86	Menjalankan perniagaan sebagai perunding, pengurus dan pelabur dalam pembangunan, pengurusan serta operasi kemudahan awam.	Membiayai pembinaan Langkawi International Convention Centre.

BIL.	NAMA SYARIKAT	BAKI GERAN TERTUNDA BAGI TAHUN BERAKHIR 2023 (RM Juta)	RINGKASAN OBJEKTIF PENUBUHAN SYARIKAT	TUJUAN GERAN DISALURKAN
9.	Malaysian Technology Development Corporation Sdn. Bhd.	1.82	Mengkomersialkan hasil aktiviti penyelidikan dan pembangunan termasuk penyediaan dana bagi modal teroka, perundingan dan pengurusan untuk menggalakkan teknologi.	Membiayai pembangunan <i>University Supported Technology Incubation Centre Project.</i>
JUMLAH		1,996.88		

Sumber: Perlembagaan Syarikat dan Penyata Kewangan Beraudit bagi tahun berakhir 2023

d. Selain itu, sebanyak 119 syarikat menerima sokongan kewangan daripada agensi induk dan/atau syarikat induk dan/atau pemegang saham dalam bentuk Pendahuluan/Jumlah Terhutang/Sumbangan Modal, yang keseluruhannya berbaki RM13.784 bilion bagi tahun berakhir 2023. Sebanyak 10 syarikat Persekutuan mempunyai baki sokongan kewangan tertinggi bagi tahun berakhir 2023 berjumlah RM9.858 bilion seperti dalam **Jadual 8**.

JADUAL 8
SYARIKAT DENGAN BAKI SOKONGAN KEWANGAN
TERTINGGI BAGI TAHUN BERAKHIR 2023

BIL.	NAMA SYARIKAT	AGENSI/ SYARIKAT INDUK	BAKI SOKONGAN KEWANGAN* BAGI TAHUN BERAKHIR 2023 (RM Juta)
1.	FELDA Investment Corporation Sdn. Bhd.	Lembaga Kemajuan Tanah Persekutuan (FELDA)	1,828.19
2.	**Aset Tanah Nasional Berhad	Menteri Kewangan (Diperbadankan) [MKD]	1,403.13
3.	**Sentuhan Budiman Sdn. Bhd.	Aset Tanah Nasional Berhad	1,400.00
4.	FELCRA Properties Sdn. Bhd.	FELCRA Berhad	893.38
5.	Tanjung Wibawa Sdn. Bhd.	Kumpulan Wang Simpanan Pekerja (KWSP)	869.87
6.	Forest Plantation Development Sdn. Bhd.	Lembaga Perindustrian Kayu Malaysia	826.23
7.	SPNB Aspirasi Sdn. Bhd.	Syarikat Perumahan Negara Berhad	760.49
8.	FIC UK Properties Sdn. Bhd.	Lembaga Kemajuan Tanah Persekutuan (FELDA)	756.23
9.	Themed Attractions And Resorts Sdn. Bhd.	Destination Resorts and Hotels Sdn. Bhd.	665.53
10.	Pinggiran Ventures Sdn. Bhd.	Kumpulan Wang Simpanan Pekerja (KWSP)	454.76
JUMLAH			9,857.81

Sumber: Penyata Kewangan Beraudit bagi tahun berakhir 2023

Nota: (*) – Baki sokongan kewangan terdiri daripada pendahuluan, jumlah terhutang dan sumbangan modal daripada agensi/syarikat induk

(**) – Aset Tanah Nasional Berhad menerima pendahuluan daripada MKD sebanyak RM1.403 bilion di mana RM1.400 bilion telah disalurkan kepada Sentuhan Budiman Sdn. Bhd. untuk disalurkan kepada MKD Kencana Sdn. Bhd. bagi tujuan perolehan 51% saham dalam syarikat Northern Gateway Sdn. Bhd.

3.3. RUMUSAN

Secara keseluruhannya, daripada 141 syarikat yang mempunyai isu usaha berterusan, sebanyak sembilan syarikat menerima sokongan kewangan daripada Kerajaan Persekutuan dalam bentuk geran dengan baki pendapatan geran tertunda (liabiliti) berjumlah RM1.997 bilion bagi tahun berakhir 2023. Sebanyak 119 syarikat pula menerima sokongan kewangan daripada agensi induk dan/atau syarikat induk dan/atau pemegang saham dalam bentuk Pendahuluan/Jumlah Terhutang/Sumbangan Modal yang keseluruhannya berbaki RM13.784 bilion bagi tahun berakhir 2023.

3.4. SYOR AUDIT

Kementerian Pengawal dan agensi/syarikat induk bagi syarikat Kerajaan terlibat perlu memberi perhatian yang sewajarnya mengenai pandangan yang dikeluarkan oleh juruaudit luar berkaitan usaha berterusan, antaranya dengan mempertimbangkan syor seperti berikut:

3.4.1. merangka pelan pemulihan strategik yang komprehensif meliputi semakan semula model perniagaan untuk menetapkan hala tuju syarikat, dan mengoptimumkan kos operasi/pentadbiran bagi meningkatkan margin keuntungan serta mengukuhkan kecairan dan ekuiti pemegang saham; dan

3.4.2. bagi memastikan kelestarian, syarikat perlu menetapkan KPI pemulihan yang berfokus kepada usaha meningkatkan kecekapan operasi dan mengutamakan projek yang selari dengan mandat Kerajaan. Tujuannya adalah untuk menjana sumber kewangan dalaman yang kukuh dan mengurangkan kebergantungan kepada sokongan induk atau pemegang saham.

4. SYARIKAT KERAJAAN PERSEKUTUAN BERSTATUS DORMAN

4.1. LATAR BELAKANG

4.1.1. Menurut perenggan 11, Practice Directive No. 10/2024 yang dikeluarkan oleh Suruhanjaya Syarikat Malaysia (SSM), sesebuah syarikat dianggap dormant jika ia tidak mempunyai transaksi perakaunan yang signifikan sepanjang tempoh kewangan kecuali transaksi yang melibatkan pematuhan statutori bagi mematuhi undang-undang seperti fi audit dan perakaunan. Walaupun tidak aktif, syarikat ini masih tertakluk kepada keperluan pematuhan yang ditetapkan oleh SSM.

4.1.2. Bagi tujuan laporan ini, analisis kewangan adalah tertumpu kepada pematuhan statutori dan pemantauan liabiliti berbanding analisis prestasi operasi.

4.2. PENEMUAN AUDIT

4.2.1. Berdasarkan maklum balas yang dikemukakan dalam Sistem e-SelfAudit pada tahun 2025, sebanyak 116 (18.1%) daripada 641 syarikat Persekutuan telah mengisytiharkan status semasa sebagai dormant. Bagaimanapun, analisis perbelanjaan hanya dilaksanakan terhadap 79 syarikat dormant berdasarkan pengesahan Penyata Kewangan Beraudit bagi tahun berakhir 2022 dan 2023. Perbelanjaan bagi 37 syarikat lain tidak dianalisis kerana berstatus dormant mulai tahun 2024 atau 2025, atau tempoh dormant tidak diisytiharkan oleh syarikat dalam Sistem e-SelfAudit, atau Penyata Kewangan Beraudit tidak dikemukakan bagi tahun 2022 dan 2023 untuk pengesahan.

4.2.2. Analisis Audit mendapati 62 daripada 79 syarikat telah berstatus dormant selama lima tahun atau lebih, manakala 17 syarikat berstatus dormant kurang daripada lima tahun. Sebanyak 27 daripada syarikat terlibat berstatus dormant sejak penubuhan. Jumlah perbelanjaan statutori, iaitu fi audit yang telah dibayar bagi memenuhi keperluan peruntukan terhadap Akta Syarikat 2016 ialah RM0.55 juta, iaitu RM0.29 juta pada tahun 2022 dan RM0.26 juta pada tahun 2023. Butiran adalah seperti dalam **Jadual 9**.

JADUAL 9
PERBELANJAAN STATUTORI FI AUDIT
BAGI SYARIKAT BERSTATUS DORMAN BAGI TAHUN 2022 DAN 2023

BIL.	STATUS	BILANGAN SYARIKAT	TAHUN 2022 (RM Juta)	TAHUN 2023 (RM Juta)	JUMLAH (RM Juta)
1.	Telah berstatus dormant 5 tahun atau lebih	62	0.16	0.16	0.32
2.	Telah berstatus dormant kurang daripada 5 tahun	17	0.13	0.10	0.23
JUMLAH		79	0.29	0.26	0.55

Sumber: Pangkalan Data Sistem e-SelfAudit dan Penyata Kewangan Beraudit bagi tahun berakhir 2022 dan 2023

4.2.3. Analisis Syarikat Persekutuan Berstatus Dormant Lima Tahun atau Lebih

a. Bagi 62 syarikat Persekutuan yang telah berstatus dormant lima tahun atau lebih, perbelanjaan keseluruhan yang dicatatkan berjumlah RM92.06 juta, iaitu RM35.32 juta bagi tahun 2022 dan RM56.74 juta pada tahun 2023. Analisis selanjutnya mendapati 22 syarikat Persekutuan tidak mempunyai obligasi kewangan, manakala 40 syarikat masih mempunyai obligasi kewangan yang melibatkan baki pinjaman kepada Kerajaan; baki pinjaman kepada institusi kewangan swasta; baki terhutang kepada

syarikat induk, syarikat subsidiari, dan lain-lain syarikat berkaitan; dan baki pemiutang lain yang melibatkan kadar faedah.

b. Bagi tahun 2023, daripada 40 syarikat Persekutuan yang masih mempunyai obligasi kewangan, sebanyak empat syarikat mempunyai aset bersih¹ yang membolehkan syarikat menampung keseluruhan liabiliti syarikat tanpa bergantung kepada Kerajaan atau agensi/syarikat induk. Bagaimanapun, 36 syarikat pula mempunyai liabiliti bersih² berjumlah RM1.248 bilion yang mana syarikat terpaksa bergantung kepada sokongan berterusan daripada Kerajaan atau agensi/syarikat induk untuk menyelesaikan obligasi tersebut.

c. Bagi 22 syarikat dormant yang tidak mempunyai obligasi kewangan pula, syarikat masih perlu menanggung perbelanjaan statutori dan perbelanjaan lain walaupun telah berstatus dormant selama lima tahun atau lebih. Pada tahun 2023, daripada 22 syarikat tersebut, sebanyak 18 syarikat mempunyai aset bersih yang membolehkan syarikat menampung perbelanjaan tanpa bergantung kepada sokongan Kerajaan, berbanding empat syarikat yang mempunyai liabiliti bersih. Butiran terperinci adalah seperti dalam **Jadual 10**.

JADUAL 10
MAKLUMAT ASET/LIABILITI BERSIH TAHUN 2023
BAGI SYARIKAT DORMAN MELEBIHI LIMA TAHUN

PERKARA	BILANGAN SYARIKAT	RM Juta
Syarikat Masih Mempunyai Obligasi Kewangan		
Aset Bersih	4	64.27
Liabiliti Bersih	36	1,248.47
Syarikat Tidak Mempunyai Obligasi Kewangan		
Aset Bersih	18	974.41
Liabiliti Bersih	4	33.85

Sumber: Pangkalan Data Sistem e-SelfAudit dan Penyata Kewangan Beraudit bagi tahun berakhir 2022 dan 2023

d. Analisis lanjut telah dibuat terhadap Penyata Kewangan Beraudit bagi 36 syarikat dormant melebihi lima tahun yang mempunyai obligasi kewangan dengan liabiliti bersih pada tahun 2023. Hasil analisis menunjukkan keseluruhan perbelanjaan yang direkodkan oleh syarikat terlibat berjumlah RM34.74 juta pada tahun 2022 dan meningkat kepada RM53.00 juta pada tahun 2023. Kos kewangan merupakan komponen perbelanjaan terbesar yang direkodkan iaitu berjumlah RM30.10 juta pada tahun 2022 dan RM36.61 juta pada tahun 2023. Jenis perbelanjaan yang direkodkan adalah seperti butiran dalam **Jadual 11**.

¹ Aset bersih merujuk kepada jumlah aset melebihi liabiliti

² Liabiliti bersih merujuk kepada jumlah liabiliti melebihi aset

JADUAL 11
JENIS PERBELANJAAN YANG DIREKODKAN OLEH SYARIKAT PERSEKUTUAN
YANG MEMPUNYAI OBLIGASI KEWANGAN DAN BERADA DALAM KEDUDUKAN
LIABILITI BERSIH

PERBELANJAAN	2022 (RM Juta)	2023 (RM Juta)	JUMLAH (RM Juta)
Fi Audit	0.11	0.10	0.21
Kos Kewangan	30.10	36.61	66.71
Perbelanjaan Operasi	0.56	12.99	13.55
Perbelanjaan Pentadbiran	0.95	1.49	2.44
Elaun ALP	0.06	0.04	0.10
Lain-lain	2.96	1.77	4.73
JUMLAH	34.74	53.00	87.74

Sumber: Pangkalan Data Sistem e-SelfAudit dan Penyata Kewangan Beraudit bagi tahun berakhir 2022 dan 2023

e. Analisis selanjutnya terhadap empat syarikat yang tidak mempunyai obligasi kewangan tetapi menunjukkan liabiliti bersih mencatatkan perbelanjaan keseluruhan yang berjumlah RM3.29 juta, iaitu RM19,810 bagi tahun 2022 dan meningkat kepada RM3.27 juta bagi tahun 2023. Jenis perbelanjaan yang direkodkan adalah seperti butiran dalam **Jadual 12**.

JADUAL 12
JENIS PERBELANJAAN YANG DIREKODKAN OLEH SYARIKAT YANG TIDAK
MEMPUNYAI OBLIGASI KEWANGAN TETAPI BERADA DALAM KEDUDUKAN
LIABILITI BERSIH

PERKARA	2022 (RM Juta)	2023 (RM Juta)	JUMLAH (RM Juta)
Fi Audit	0.01	0.01	0.02
Perbelanjaan Operasi	0.01	3.25	3.26
Lain-lain	-	0.01	0.01
JUMLAH	0.02	3.27	3.29

Sumber: Pangkalan Data Sistem e-SelfAudit dan Penyata Kewangan Beraudit bagi tahun berakhir 2022 dan 2023

4.3. RUMUSAN

Secara keseluruhannya, sebanyak 116 (18.1%) daripada 641 syarikat Persekutuan adalah berstatus dormant. Sebanyak 62 syarikat telah berstatus dormant dalam tempoh lima tahun atau lebih. Analisis yang dijalankan terhadap Penyata Kewangan Beraudit tahun 2022 dan 2023 bagi 62 syarikat tersebut mendapati perbelanjaan yang dicatatkan berjumlah RM92.06 juta, iaitu RM35.32 juta bagi tahun 2022 dan RM56.74 juta pada tahun 2023. Sebanyak 40 daripada 62 syarikat mempunyai obligasi kewangan yang mana 36 daripadanya berada dalam kedudukan liabiliti bersih berjumlah RM1.248 bilion. Ini menunjukkan syarikat terpaksa bergantung kepada sokongan berterusan daripada Kerajaan atau agensi/syarikat induk untuk menyelesaikan obligasi tersebut.

4.4. SYOR AUDIT

Kementerian Pengawal dan agensi/syarikat Induk perlu memberi perhatian yang sewajarnya terhadap status kewangan syarikat dormant antaranya dengan mempertimbangkan syor seperti berikut:

4.4.1. syarikat berstatus dormant dalam tempoh lima tahun atau lebih dan tidak mempunyai obligasi kewangan wajar dinilai semula kewujudannya memandangkan sebahagian besar syarikat tidak lagi menjana pendapatan utama disebabkan tidak beroperasi. Namun syarikat masih perlu menanggung kos pentadbiran dan pematuhan statutori. Sehubungan itu, hala tuju syarikat sama ada diaktifkan semula atau dibubarkan perlu diputuskan segera oleh Kementerian Pengawal dan/atau agensi/syarikat induk yang berkaitan; dan

4.4.2. bagi syarikat berstatus dormant dalam tempoh lima tahun atau lebih tetapi mempunyai obligasi kewangan, Kerajaan atau agensi/syarikat induk perlu memastikan syarikat dormant tersebut menyelesaikan obligasi mengikut tempoh masa yang ditetapkan.

BAHAGIAN III

PENGURUSAN SYARIKAT KERAJAAN PERSEKUTUAN

JABATAN AUDIT NEGARA

120 1904 - 2024
TAHUN

4. Pelaburan Hartanah Berhad

JABATAN AUDIT NEGARA

120
TAHUN
1963-2023

JABATAN PERDANA MENTERI


PELABURAN HARTANAH BERHAD

1. LATAR BELAKANG

1.1. Pelaburan Hartanah Berhad (PHB) telah diperbadankan pada 8 Mei 2006 di bawah Akta Syarikat 2016 [*Akta 777*]. PHB merupakan Syarikat Berhad Menurut Syer (SBMS) dengan terbitan modal berjumlah RM2 bilion. PHB dimiliki sepenuhnya oleh Yayasan Pelaburan Bumiputra (YPB) yang merupakan Syarikat Berhad Menurut Jaminan (SBMJ) di bawah kawal selia Jabatan Perdana Menteri (JPM).

1.2. Berdasarkan dokumen pendaftaran PHB di Suruhanjaya Syarikat Malaysia (SSM), PHB ditubuhkan dengan mandat untuk memperkasakan agenda pembangunan dan penyertaan serta pemilikan Bumiputera dalam memperoleh dan mengurus aset hartanah komersial di dalam dan di luar negara. Berdasarkan Perlembagaan Syarikat, objektif penubuhan PHB adalah untuk memperoleh dan membangunkan hartanah serta membuat pelaburan dalam saham, debentur, bon dan sekuriti yang berkaitan dengan hartanah pelaburan. Setakat tahun 2025, PHB telah memperoleh hartanah komersial dan perindustrian di lokasi strategik seluruh negara yang terdiri daripada sembilan tanah dan 28 bangunan merangkumi ruang pejabat, kompleks membeli-belah, gudang logistik, kilang pembuatan, pusat pendidikan dan hospital. Senarai hartanah milik PHB adalah seperti dalam **Rajah 1**.

RAJAH 1
LOKASI HARTANAH MILIK PHB SETAKAT TAHUN 2025




Sumber: PHB

1.3. Selaras dengan mandat meningkatkan penyertaan Bumiputera dalam pemilikan hartanah komersial, PHB melaksanakan aktiviti perolehan dan pembangunan hartanah yang disandarkan kepada Amanah Hartanah Bumiputera (AHB) melalui pemilikan benefisial, di samping mengekalkan pemilikan sah aset serta menanggung turun naik nilai hartanah dalam kunci kira-kira Syarikat. Berdasarkan nilai aset yang disandarkan tersebut, unit dana AHB dicipta dan diterbitkan bagi membolehkan penyertaan pelabur.

1.4. PHB Asset Management Berhad (PHBAM) dipertanggungjawabkan sebagai pengurus dana AHB untuk mengurus pelaburan dan aset dana, melaksanakan strategi pelaburan serta memastikan pengagihan pendapatan kepada pemegang unit dilaksanakan secara berhemat dan selaras dengan mandat dana. Selain daripada pinjaman bank, geran Kerajaan dan tunai daripada operasi syarikat, wang langganan yang diterima daripada pemegang unit turut digunakan untuk membiayai pelaburan baharu. Hasil sewaan, perkhidmatan pengurusan dan pelupusan hartanah seterusnya dimanfaatkan untuk menjana pulangan serta agihan kepada pemegang unit AHB. Struktur ini membolehkan pemegang unit memperoleh kepentingan ekonomi dalam portfolio hartanah komersial tanpa penglibatan langsung dalam pengurusan aset. Model perniagaan PHB adalah seperti dalam **Rajah 2**.

RAJAH 2
MODEL PERNIAGAAN PHB



Sumber: PHB

2. OBJEKTIF PENGAUDITAN

Pengauditan dijalankan untuk menilai sama ada aktiviti perolehan dan pembangunan hartanah telah dilaksanakan dengan ekonomi, cekap dan berkesan; mengamalkan tatakelola yang baik; dan kedudukan kewangan yang mampan bagi mencapai mandat dan objektif penubuhan syarikat.

3. SKOP PENGAUDITAN

Pengauditan terhadap PHB dilaksanakan buat kali pertama sejak penubuhannya pada 8 Mei 2006 walaupun telah diwartakan sejak tahun 2022. Mulai tahun 2025, Jabatan Audit Negara (JAN) telah memperkenalkan Sistem e-SelfAudit melalui platform digital yang membolehkan pengauditan dilaksanakan secara 100% terhadap syarikat yang diwartakan. Selaras dengan itu, PHB juga tertakluk kepada pengauditan melalui Sistem e-SelfAudit setiap tahun mulai tahun 2025. Pengauditan ini melibatkan penilaian terhadap pengurusan PHB yang merangkumi tiga fokus utama seperti berikut:

- a. pencapaian mandat dan objektif penubuhan yang diukur berdasarkan aktiviti utama PHB iaitu perolehan dan pembangunan hartanah bagi tempoh tahun 2021 hingga 2024;
- b. amalan tadbir urus korporat yang baik berdasarkan empat prinsip tatakelola iaitu keberkesanan dan kepimpinan Lembaga Pengarah; keberkesanan Audit, pengurusan risiko dan kawalan dalaman; integriti dalam pelaporan korporat dan hubungan dengan pemegang taruh; serta kemampanan dan tanggungjawab korporat; dan
- c. penilaian terhadap kedudukan kewangan berdasarkan Penyata Kewangan Kumpulan PHB yang telah diaudit oleh Tetuan Ernst & Young PLT bagi tahun kewangan 2021, 2022, 2023 dan 2024. Penilaian ini melibatkan analisis trend untung rugi serta analisis trend aset dan liabiliti.

4. METODOLOGI PENGAUDITAN

Pengauditan dijalankan dengan menyemak rekod, fail dan dokumen yang dikemukakan oleh pengurusan PHB serta menganalisis data berkaitan yang dikemukakan oleh PHB melalui Sistem e-SelfAudit pada 23 Disember 2024. Perbincangan dan temu bual dengan pegawai terlibat juga dibuat bagi mendapatkan penjelasan lanjut. Selain itu, pemeriksaan fizikal terhadap sampel terpilih turut dilaksanakan bagi mengesahkan pelaksanaan aktiviti oleh PHB.

5. PENEMUAN TERPERINCI AUDIT

Pengauditan telah dijalankan mulai Disember 2024 hingga September 2025. Perkara yang ditemui serta maklum balas daripada PHB telah dibincangkan dalam Mesyuarat Penutup pada 5 Januari 2026. Penjelasan bagi setiap penemuan Audit adalah seperti perenggan berikut:

5.1. Pencapaian Mandat Penubuhan

Berdasarkan dokumen pendaftaran PHB di SSM, PHB ditubuhkan dengan matlamat untuk memperkasa dan mencipta kekayaan bagi komuniti Bumiputera melalui penyertaan dalam pelaburan dan pemilikan hartanah. Justeru itu, AHB telah diperkenalkan pada 29 November 2010 dengan saiz dana permulaan sebanyak 1 bilion unit sebagai usaha untuk membolehkan penyertaan pemilikan hartanah komersial oleh Bumiputera di samping menyediakan pulangan yang stabil. Pencapaian mandat penubuhan PHB dinilai berdasarkan tiga perkara, iaitu pemegangan unit AHB, nilai sandaran aset kepada AHB dan pulangan tahunan AHB. Butirannya seperti dalam **Jadual 1** dan perenggan berikutnya.

JADUAL 1
PENGUKURAN PENCAPAIAN MANDAT PHB

ELEMEN DINILAI/ TAHUN	2021	2022	2023	2024
PEMEGANGAN UNIT AHB:				
Individu	72,812	71,432	75,542	82,363
Institusi	14	14	16	19
Jumlah Pemegang Unit	72,826	71,446	75,558	82,382
Jumlah Unit Dilanggan	3,787,572,579	3,806,434,217	4,354,665,230	4,862,687,150
Jumlah Unit Dalam Edaran	3,850,000,000	3,850,000,000	4,650,000,000	5,000,000,000
Peratus Langganan (%)	98.4	98.9	93.6	97.3
NILAI SANDARAN ASET KEPADA AHB:				
Bilangan Aset	18	18	20	21
Nilai Sandaran Aset (RM Juta)	3,850.00	3,850.00	4,650.00	5,000.00
PULANGAN TAHUNAN AHB:				
Agihan Per Unit (sen)	4.70	5.00	5.00	5.00

Sumber: Laporan Tahunan AHB bagi tahun 2021, 2022, 2023 dan 2024

5.1.1. Pemegangan Unit AHB

- a. Berdasarkan trend dari tahun 2021 hingga 2024, bilangan pemegang unit AHB menunjukkan peningkatan sebanyak 13.1% iaitu daripada 72,826 pada tahun 2021 kepada 82,382 pada tahun 2024. Peningkatan ini didorong oleh pertumbuhan ketara dalam kategori individu yang meningkat daripada 72,812 pada tahun 2021 kepada 82,363 pada tahun 2024, manakala pemegang unit institusi meningkat daripada 14 kepada 19 institusi dalam tempoh yang sama.
- b. Jumlah unit dilanggan menunjukkan trend peningkatan berterusan dari tahun 2021 hingga 2024, iaitu daripada 3.788 bilion unit pada tahun 2021 kepada 4.863 bilion unit pada tahun 2024 dengan peratusan langganan mencecah 97.3% pada tahun 2024. Jumlah unit dalam edaran meningkat daripada 3.850 bilion unit pada tahun 2021 kepada 5.000 bilion unit pada tahun 2024 selaras dengan nilai sandaran aset kepada AHB.

5.1.2. Nilai Sandaran Aset Kepada AHB

- a. Berdasarkan Guidelines on Injection and Leaseback of Beneficial Ownership of Assets Between PHB and AHB, kriteria utama perolehan aset menetapkan bahawa aset atau projek pembangunan yang telah siap hendaklah disuntik ke dalam AHB sebagai asas pelaburan dana unit amanah tersebut. Bilangan unit langganan yang ditawarkan di pasaran bergantung pada nilai aset yang disandarkan oleh PHB. Sebelum sesuatu aset boleh dijadikan sandaran, ia perlu memenuhi kriteria tertentu, termasuk menjana 5% pulangan hasil, mematuhi keperluan syariah serta mencapai 80% kadar penghunian yang ditetapkan.
- b. Setakat 31 Disember 2024, PHB memiliki 26 bangunan dengan nilai perolehan RM7.848 bilion. Semakan Audit mendapati 21 (80.8%) bangunan telah disandarkan kepada AHB dengan nilai sandaran RM5 bilion pada tahun 2024. Tiada tambahan aset yang disandarkan kepada AHB pada tahun 2025. Lima bangunan tidak disandarkan iaitu Menara Aras Raya, Icon City Car Park, Tower 6 Skypark, Elevate Medini dan Mayang Mall.
- c. Mayang Mall tidak dijadikan aset sandaran kerana ia mula beroperasi pada 5 Disember 2024. Sementara itu, Menara Aras Raya, Elevate Medini, Icon City Car Park dan Tower 6 Skypark belum memenuhi kriteria sandaran yang ditetapkan oleh PHB.

Maklum balas PHB yang diterima pada 10 Disember 2025 dan 8 Januari 2026

Baki lima bangunan yang belum disandarkan kepada AHB iaitu Menara Aras Raya, Icon City Car Park, Tower 6 Skypark, Elevate Medini dan Mayang Mall adalah tertakluk kepada proses pengurusan kualiti aset yang berterusan dan pemantauan teliti oleh pihak pengurusan. Aset-aset ini berada dalam salah satu daripada kategori berikut:


- i. Aset yang sedang dalam proses perubahan arah melalui *Red Building Turnaround Plan* untuk mencapai kriteria pulangan dan kadar penghunian yang ketat; dan
- ii. Aset Pembangunan Baharu yang baru sahaja beroperasi.

Hanya aset yang memenuhi kriteria ketat dan memberikan nilai optimum kepada pemegang unit AHB sahaja yang akan disandarkan. Langkah ini adalah sebahagian daripada strategi PHB untuk melindungi kestabilan dan kualiti pulangan dana AHB. Sebagai langkah penambahbaikan, Lembaga Pengarah pada 4 September 2025 telah meluluskan Garis Panduan Suntikan Aset AHB baharu (Guidelines on Injection and Leaseback of Beneficial Ownership of Asset Between PHB (Sponsor) and AHB (Fund)). Garis panduan ini bertujuan memastikan aset yang disuntik ke dalam AHB mempunyai aliran pendapatan yang stabil dan mampu menampung komitmen pajakan.

5.1.3. Pulangan Tahunan AHB

Berdasarkan KPI yang telah diluluskan, PHB hanya menetapkan sasaran pulangan bagi tahun 2021 iaitu 5.00 sen seunit. Bagi tahun 2022 hingga 2024, KPI PHB tidak menetapkan sasaran pulangan tahunan kepada pemegang unit. Oleh itu, analisis Audit adalah berdasarkan trend dari tahun 2022 hingga 2024. Semakan Audit mendapati pulangan AHB bagi tahun 2021 hanya mencapai 4.70 sen seunit berbanding 5.00 sen yang disasarkan. Seterusnya pulangan tahunan AHB bagi tahun 2022 hingga 2024 menunjukkan trend yang konsisten iaitu 5.00 sen seunit. Jumlah agihan tahunan AHB adalah antara RM172.80 juta hingga RM231.54 juta. Pembayaran bonus daripada PHB kepada pemegang unit pula adalah antara 0.40 sen seunit hingga 0.67 sen seunit dengan nilai hibah PHB kepada AHB meningkat daripada RM10.20 juta pada tahun 2021 kepada RM27.90 juta pada tahun 2024 seperti butiran dalam **Carta 1**.

CARTA 1
AGIHAN PENDAPATAN AHB SEUNIT BAGI TAHUN 2021 HINGGA 2024



Sumber: Laporan Amanah Hartanah Bumiputera pada 30 September 2021, 2022, 2023 dan 2024

Nota: Bonus – agihan pendapatan tambahan secara terus daripada PHB kepada pemegang unit mengikut had tertentu

Pendapat Audit Secara keseluruhannya, PHB telah melaksanakan mandat penubuhannya dengan baik yang diukur melalui trend peningkatan pemegang unit, pertambahan nilai aset sandaran serta pulangan AHB yang stabil bagi tempoh 2022 hingga 2024. Walaupun tidak menjejaskan mandat secara keseluruhan, beberapa aset yang tidak memenuhi kriteria sandaran menyebabkan nilai aset disandarkan berkurangan dan menghadkan keupayaan PHB mengembangkan penawaran unit dana.

5.2. Prestasi Pencapaian Objektif Syarikat

PHB menjalankan dua aktiviti perniagaan utama iaitu perolehan hartanah dan pembangunan hartanah. Berdasarkan aktiviti yang dilaksanakan, pencapaian objektif syarikat dapat dinilai melalui:

5.2.1. Nilai Saksama Hartanah Pelaburan

5.2.1.1. Nilai Saksama Bangunan

Sebagai sebuah syarikat pelaburan hartanah, PHB tertakluk kepada *Malaysian Financial Reporting Standard (MFRS) 140 – Investment Property* yang menetapkan syarikat hendaklah mengukur nilai saksama hartanah pelaburan secara berkala menggunakan kaedah penilaian yang diiktiraf dan dilaksanakan oleh penilai bertauliah. Analisis Audit bagi tahun kewangan 2021 hingga 2024 mendapati nilai saksama hartanah PHB meningkat daripada RM6.983 bilion pada tahun 2021 kepada

RM7.862 bilion pada tahun 2024. Ini menunjukkan pertumbuhan keseluruhan berjumlah RM878.20 juta (12.6%) dalam tempoh empat tahun. Namun demikian, terdapat tiga aset daripada kategori pejabat iaitu Menara Hextar, Tower 6 Skypark dan Elevate Medini yang menunjukkan penurunan nilai berterusan antara 3% hingga 7% sepanjang tempoh tersebut disebabkan oleh kadar penghunian yang rendah dan penurunan permintaan. Butiran terperinci adalah seperti dalam **Jadual 2**.

JADUAL 2
NILAI SAKSAMA BANGUNAN BAGI TEMPOH TAHUN 2021 HINGGA 2024

BIL.	BANGUNAN	BIL. BANGUNAN	NILAI SAKSAMA PADA 31 DISEMBER (RM Juta)			
			2021	2022	2023	2024
1.	Pejabat	14	3,692.20	3,715.00	3,765.90	3,774.00
2.	Gudang	2	318.40	349.60	469.20	665.50
3.	Peruncitan	5	1,892.00	1,903.00	2,244.00	2,308.00
4.	Hospital	3	626.00	630.00	644.70	661.00
5.	Sekolah	1	400.00	400.00	404.00	401.00
6.	Tempat Letak Kereta	1	54.70	54.70	52.20	52.00
JUMLAH KESELURUHAN		26	6,983.30	7,052.30	7,580.00	7,861.50
PENINGKATAN KESELURUHAN			RM878.20/12.6%			

Sumber: Laporan Juruaudit Luar bagi tahun 2021, 2022, 2023 dan 2024

Maklum balas PHB yang diterima pada 10 Disember 2025 dan 8 Januari 2026

Kaedah pendapatan/pelaburan digunakan bagi menentukan nilai saksama aset Menara Hextar, Tower 6 Skypark dan Elevate Medini. Bagaimanapun, disebabkan kadar penghunian bangunan-bangunan tersebut adalah rendah, nilai saksama aset berkenaan menunjukkan trend penurunan. PHB sedang melaksanakan langkah pemulihan nilai saksama bangunan melalui:

- i. Pemasaran sewaan yang lebih agresif bagi meningkatkan kadar penghunian dan aliran sewa;
- ii. Pakej penyewaan lebih kompetitif dan fleksibel untuk menarik penyewa baharu; dan
- iii. Penambahbaikan fasiliti melalui perbelanjaan modal (CAPEX) bersasar bagi memastikan bangunan lebih menarik, kondusif dan kompetitif di pasaran sewaan.

5.2.1.2. Nilai Saksama Tanah

- a. Analisis Audit terhadap nilai saksama tanah yang dimiliki oleh PHB bagi tempoh tahun kewangan 2021 hingga 2024 pula mendapati nilai keseluruhan aset tanah menurun daripada RM2.697 bilion pada tahun 2021 kepada RM2.455 bilion pada tahun 2024, iaitu penurunan bersih sebanyak RM241.9 juta (9%) dalam tempoh empat tahun. Butiran nilai saksama bagi tanah milik PHB adalah seperti dalam **Jadual 3**.

JADUAL 3
NILAI SAKSAMA TANAH BAGI TEMPOH TAHUN 2021 HINGGA 2024

BIL.	KATEGORI TANAH	BIL. TANAH	NILAI SAKSAMA PADA 31 DISEMBER (RM Juta)			
			2021	2022	2023	2024
1.	Tanah Dalam Pembangunan	4*	2,108.20	2,170.50	2,222.00	1,888.30
2.	Tanah	7**	589.20	606.10	501.60	567.20
JUMLAH KESELURUHAN		11	2,697.40	2,776.60	2,723.60	2,455.50

Sumber: Laporan Juruaudit Luar bagi tahun 2021, 2022, 2023 dan 2024

Nota:

(*) – Bilangan Tanah Dalam Pembangunan pada tahun 2024 menjadi tiga kerana Projek Mayang Mall telah siap dan bertukar pengelasan kepada Bangunan

(**) – Bilangan Tanah pada tahun 2023 dan 2024 menjadi enam kerana satu lot tanah telah dilupuskan pada tahun 2022

- b. Penurunan nilai saksama tanah disumbangkan oleh aktiviti pelupusan aset tanah bukan teras melibatkan tanah Lot 13A Petaling Jaya dan sebahagian tanah di Bandar Enstek serta pengelasan semula kategori aset iaitu Mayang Mall di Kuala Terengganu dari tanah pembangunan kepada bangunan (hartanah pelaburan).
- c. Lot 61 Bangsar kekal sebagai tanah pembangunan utama dengan nilai tertinggi, iaitu RM1.032 bilion pada tahun 2024 meningkat daripada RM940 juta pada tahun 2021 (kenaikan 9.8%). Bagaimanapun, Lot 61 Bangsar mengekalkan nilai saksama sebanyak RM1.032 bilion bagi tahun 2023 dan 2024, selepas peningkatan berterusan antara tahun 2021 hingga 2022. Walaupun nilai ini kekal stabil, kelewatan dalam kemajuan fizikal projek pembangunan di tapak boleh menjejaskan unjuran pertumbuhan nilai pada tahun-tahun berikutnya sekiranya pelan pembangunan tidak disemak semula atau pelaksanaan projek terus tertangguh.

5.2.2. Petunjuk Prestasi Utama

- a. PHB menetapkan sasaran KPI melibatkan empat hingga lima Bidang Keberhasilan Utama (KRA) bagi tempoh tahun 2021 hingga 2024, di mana semua sasaran dan pencapaian telah dibentangkan dan diluluskan oleh Lembaga Pengarah. Secara keseluruhannya **bagi tempoh tahun 2021 hingga 2024, peratus pencapaian KPI keseluruhan PHB adalah antara 42% hingga 88%**. Analisis Audit terhadap pencapaian KPI PHB bagi tempoh tahun 2021 hingga 2024 adalah seperti dalam **Jadual 4** dan perenggan berikutnya:

JADUAL 4
RINGKASAN PENCAPAIAN KPI KESELURUHAN PHB
BAGI TEMPOH TAHUN 2021 HINGGA 2024

BIL.	BIDANG KEBERHASILAN UTAMA	2021 (%)		2022 (%)		2023 (%)		2024 (%)	
		S	P	S	P	S	P	S	P
1.	Kewangan	25.0	21.2	35.0	35.0	30.0	20.0	40.0	30.0
2.	Pihak Berkepentingan/ Pelanggan/Mandat	25.0	17.6	25.0	18.3	25.0	8.0	15.0	13.0
3.	Kecekapan Operasi/Proses Perniagaan Dalam Pembangunan	40.0	27.9	30.0	24.2	30.0	7.0	35.0	35.0
4.	Bakat/Perkembangan dan Pembelajaran	10.0	9.0	10.0	7.9	10.0	6.0	10.0	10.0
5.	Tadbir Urus					5.0	1.0		
JUMLAH		100.0	75.7	100.0	85.4	100.0	42.0	100.0	88.0

Sumber: Laporan Sasaran dan Pencapaian KPI PHB serta Minit Mesyuarat Lembaga Pengarah, Bahagian Korporat Strategik

Nota: S – sasaran P – pencapaian

- i. Berdasarkan **Jadual 4**, analisis Audit mendapati pencapaian tahun 2021 adalah 75.7% dan meningkat kepada 85.4% pada tahun 2022. Pencapaian pada tahun 2023 hanya 42% iaitu yang terendah berbanding tahun 2021 dan 2022. Kesemua KRA tidak mencapai sasaran yang ditetapkan pada tahun 2023 khususnya KRA Pihak Berkepentingan dan KRA Kecekapan Operasi. Semakan Audit mendapati tempoh yang singkat bagi pelaksanaan KPI 2023 merupakan salah satu faktor yang menyumbang kepada ketidakcapaian KPI memandangkan KPI 2023 hanya diluluskan oleh Lembaga Pengarah pada 9 Jun 2023. Kegagalan mencapai sasaran antaranya disebabkan faktor berikut:
- kegagalan memperoleh 10 pemegang unit AHB baharu dari kategori institusi;
 - sasaran kadar penghunian hartanah sebanyak 82% gagal dicapai; dan
 - sasaran untuk memperoleh Sijil Penyiapan dan Pematuhan bagi Projek Mayang Mall, Kuala Terengganu tidak berjaya dicapai.

- ii. Prestasi KPI pada tahun 2024 kembali pulih berbanding tahun 2023 dengan pencapaian keseluruhan 88%. Bagaimanapun, sasaran bagi aspek Kewangan dan Pihak Berkepentingan masih belum dicapai. KRA Kewangan mencapai 30% berbanding sasaran 40% manakala KRA Pihak Berkepentingan pula mencapai 13% berbanding sasaran 15%.

Maklum balas PHB yang diterima pada 10 Disember 2025 dan 8 Januari 2026

PHB telah mengukuhkan kerangka pengukuran prestasi berbanding tahun-tahun sebelumnya melalui Kerangka KPI PHB 2024 yang diluluskan oleh Lembaga Pengarah pada 8 Disember 2023. Dengan pelaksanaan kerangka ini, setiap KPI adalah lebih konsisten, berasaskan skor kad yang jelas dan sejajar dengan visi serta misi PHB. Kerangka tersebut termasuklah mekanisme pengukuran prestasi yang diperhalusi di mana penetapan setiap KPI dan sasarannya adalah terperinci (explicitly stated). Pemantauan prestasi KPI juga diperkukuhkan melalui laporan suku tahunan kemajuan KPI syarikat kepada Lembaga Pengarah. Oleh yang demikian, Lembaga Pengarah dapat memperoleh terus maklumat terkini mengenai prestasi KPI semasa dan seterusnya menjadikan pelaksanaan fungsi pengawasan strategik lebih berkesan.

5.2.3. Pulangan Atas Pelaburan

- a. Pulangan atas pelaburan merupakan satu indikator kewangan dan dianggap satu amalan terbaik dalam pengurusan korporat dan strategi kewangan. Ia digunakan untuk membantu syarikat menilai sama ada sesuatu pelaburan memberi pulangan yang berbaloi berbanding kos yang dikeluarkan. PHB menetapkan pulangan atas pelaburan dinilai berdasarkan jumlah nilai saksama pada tahun 2024 ditambah dengan keuntungan/kerugian terkumpul daripada pengoperasian bangunan berbanding kos bangunan pada tahun 2024.
- b. Hasil analisis Audit menunjukkan **20 daripada 26 bangunan telah mencatatkan pulangan melebihi 100%, iaitu antara 110.3% hingga 260.5%**. Bangunan-bangunan yang menunjukkan anggaran pulangan tersebut mempunyai tempoh operasi antara tiga hingga 16 tahun. Namun, enam bangunan mencatatkan pulangan kurang daripada 100%, iaitu The Shore Shopping Gallery, Icon City Car Park, Menara Hextar, Tower 6 Skypark, Elevate Medini dan Mayang Mall. Butiran lanjut adalah seperti dalam **Jadual 5**.

JADUAL 5
PULANGAN ATAS PELABURAN

BIL.	NAMA BANGUNAN	TAHUN PEROLEHAN	TEMPOH BEROPERASI SETAKAT 31.12.2024 (TAHUN)	KOS BANGUNAN 2024 (RM Juta)	PULANGAN ATAS PELABURAN (RM Juta)		PULANGAN (%)
					*KEUNTUNGAN / (KERUGIAN) TERKUMPUL	NILAI SAKSAMA PADA 31.12.2024	
1.	CP Tower	01.12.2008	16	207.32	108.16	179.00	138.5
2.	Wisma Consplant	01.08.2009	15	225.37	158.66	261.00	186.2
3.	Maersk Warehouse Shah Alam	01.08.2009	15	467.76	130.16	542.00	143.7
4.	Menara Prisma	01.04.2010	14	314.61	173.34	250.00	134.6
5.	Lotus's Setia Alam	01.07.2010	14	93.84	121.00	123.50	260.5
6.	Avisena Specialist Hospital	01.11.2011	13	87.23	90.64	94.00	211.7
7.	Menara Aras Raya	01.05.2013	11	465.84	303.85	425.00	156.5
8.	Dataran PHB	01.05.2013	11	178.39	46.92	164.00	118.2
9.	Menara BT	01.05.2013	11	183.53	91.50	140.00	126.1
10.	Menara 1 Dutamas	01.08.2013	11	261.09	112.58	239.00	134.7
11.	PJ33	01.09.2013	11	342.68	153.19	288.00	128.7
12.	Menara 1 Sentrum	01.11.2013	11	317.20	208.12	496.00	222.0
13.	NU Sentral	01.01.2014	10	818.14	322.21	939.00	154.2
14.	Icon City Car Park	01.03.2014	10	98.54	(8.65)	52.00	44.0
15.	The Shore Shopping Gallery	01.01.2015	9	216.84	(1.17)	100.00	45.6
16.	One Precint	01.04.2015	9	153.42	77.17	165.00	157.8
17.	Gleneagles Hospital	01.10.2015	9	136.12	78.90	216.00	216.7
18.	Quill 18	01.12.2015	9	456.32	118.11	385.00	110.3
19.	NU Empire	01.01.2017	7	589.47	267.04	571.00	142.2
20.	Menara Hextar	01.05.2017	7	150.15	31.94	78.00	73.2
21.	Tower 6, Skypark	01.10.2018	6	123.72	15.45	75.00	73.1
22.	Elevate Medini	01.08.2019	5	402.30	33.96	274.00	76.5
23.	Marlborough College	01.08.2021	3	400.98	85.85	401.00	121.4
24.	Menara Bank Pembangunan (Plaza Conlay)	01.09.2021	3	582.65	6.95	643.00	111.6
25.	KPJ Damansara 2 Hospital	01.01.2022	2	324.55	97.93	351.00	138.3
26.	Mayang Mall	30.07.2024	Dibuka untuk operasi bermula 5 Disember 2024				

Sumber: Jabatan Strategi Korporat/Jabatan Kewangan PHB

Nota: (*) - Jumlah keseluruhan Keuntungan/(Kerugian) Terkumpul dari tahun mula beroperasi hingga tahun 2024

- c. Lima hartanah yang mencapai pulangan atas pelaburan kurang 100% antaranya disebabkan oleh faktor seperti tempoh pengoperasian kurang daripada 10 tahun bagi bangunan yang melibatkan penyewa berbilang, kadar penghunian yang rendah dan kos operasi yang tinggi. Satu bangunan iaitu Mayang Mall belum memberi pulangan atas pelaburan kerana baru memulakan operasi pada tahun 2024.

Maklum balas PHB yang diterima pada 10 Disember 2025 dan 8 Januari 2026

The Shore Shopping Gallery - Pulangan atas pelaburan bagi The Shore Shopping Gallery belum mencapai 100% kerana aktiviti pelancongan merosot semasa tempoh Perintah Kawalan Pergerakan (PKP). Pemulihan permintaan runcit berasaskan pelancong kekal lebih perlahan daripada jangkaan, menyebabkan hasil negatif berpanjangan. Bagi mengatasi isu ini, pengurusan The Shore Shopping Gallery telah diambil alih secara rasmi oleh PHB berkuat kuasa 1 September 2025, menggantikan Outsourced Property Manager (OPM) sebelum ini. Langkah ini dijangka meningkatkan prestasi melalui pengurusan dalaman yang lebih agresif dalam aspek penyewaan, pemasaran, dan kawalan operasi.

Icon City Car Park - Langkah pemulihan telah dilaksanakan melalui *Red Building Turnaround Plan* termasuk pengenalan pakej parkir fleksibel dan pengaturan parkir khas untuk pelanggan korporat.

Menara Hextar - Menara Hextar mencatatkan hasil negatif bagi dua tahun terakhir (2023 dan 2024) berikutan tamatnya skim Guaranteed Rental Return (GRR) yang diperoleh melalui Perjanjian Penghunian Induk bertarikh 6 November 2014. Kadar penghunian menunjukkan pemulihan positif dengan peningkatan daripada 34% pada Disember 2024 kepada 63% pada Oktober 2025, berikutan kemasukan penyewa baharu yang memulakan sewaan pada 1 September 2024.

Elevate Medini - Selepas tamatnya skim GRR pada tahun 2022, Elevate Medini mencatatkan pulangan hasil negatif bagi dua tahun berturut-turut (2023 dan 2024). Penurunan prestasi ini dikaitkan dengan lebih bekalan hartanah di kawasan Medini yang mengakibatkan kadar penghunian rendah. PHB kini melaksanakan strategi penyewaan komprehensif di bawah *Red Building Turnaround Plan*.

Tower 6 Skypark - Tower 6 Skypark termasuk dalam kategori pembelian bangunan ketika dalam pembinaan yang disertakan dengan GRR. Selepas tamat tempoh GRR, kadar penghunian turun kepada 16% pada Disember 2021. Tower 6 Skypark telah memperoleh Perakuan Penyiapan dan Pematuhan (CCC) pada 7 Julai 2025 dan sasaran siap pembinaan kawasan sekitar adalah pada Disember 2025. PHB turut melaksanakan langkah pemulihan melalui *Red Building Turnaround Plan* dengan menawarkan pakej sewa yang menarik.

Pendapat Audit | Secara keseluruhannya, PHB telah melaksanakan aktiviti yang selaras dengan objektif penubuhannya. Pencapaian KPI bagi tahun 2024 menunjukkan prestasi lebih baik berbanding tahun-tahun sebelumnya. Pulangan atas pelaburan juga menunjukkan 20 (76.9%) daripada 26 bangunan PHB telah mencapai pulangan melebihi 100%.

5.3. Pengurusan Aktiviti Pelaburan Hartanah

Aktiviti pengurusan hartanah merupakan aktiviti utama yang merangkumi aspek pemilikan, penyenggaraan dan pengoptimuman nilai aset pelaburan. Melalui pengurusan yang berkesan, PHB memastikan setiap aset yang diperoleh sama ada melalui perolehan bangunan sedia ada atau dalam pembinaan serta pembangunan hartanah berupaya menjana pendapatan yang stabil dan mencapai kadar penghunian yang tinggi.

5.3.1. Perolehan Bangunan

5.3.1.1. Kadar Penghunian

- a. PHB menetapkan kadar penghunian sebagai salah satu kaedah mengukur KPI tahunan di bawah elemen kewangan bagi menentukan peratus ruang yang berjaya disewakan daripada keseluruhan ruang yang tersedia. Ini bagi menentukan keupayaan sesebuah bangunan untuk menjana pendapatan sewaan.
- b. Berdasarkan 24 bangunan yang beroperasi, PHB menetapkan sasaran purata kadar penghunian masing-masing pada kadar 80% (2021), 82% (2022 dan 2023) dan 75% (2024). **Pencapaian sebenar purata kadar penghunian ialah 73% (2021), 70% (2022), 68% (2023) dan 76% (2024). Hanya sasaran tahun 2024 yang berjaya dicapai.** Hartanah Icon City Car Park tidak ditetapkan sasaran kadar penghunian kerana pengukuran bagi hartanah ini hanya dibuat berdasarkan pulangan hasil.

- c. Enam bangunan dalam kategori hospital, gudang dan institusi pendidikan mencatatkan kadar penghunian penuh (100%) melibatkan penyewa tunggal. Bagaimanapun, bagi kategori pejabat dan peruncitan yang mempunyai lebih daripada satu penyewa (penyewa berbilang), pencapaian kadar penghunian tidak dapat mencapai sasaran ditetapkan sepenuhnya.
- d. Terdapat empat bangunan di bawah kategori pejabat dan peruncitan yang tidak mencapai sasaran bagi empat tahun berturut-turut iaitu CP Tower, Menara Aras Raya, Quill 18 dan The Shore Shopping Gallery. Kadar penghunian Elevate Medini pula pada tahap 0% bermula dari pengambilalihan oleh PHB dari penyewa pada tahun 2022. Butiran terperinci seperti dalam **Jadual 6**.

JADUAL 6
KADAR PENGHUNIAN BAGI TAHUN 2021 HINGGA 2024

BIL.	KATEGORI HARTANAH	2021		2022		2023		2024	
		CAPAI	TIDAK CAPAI	CAPAI	TIDAK CAPAI	CAPAI	TIDAK CAPAI	CAPAI	TIDAK CAPAI
1.	Pejabat	4	10	8	6	3	11	6	8
2.	Gudang	2	0	2	0	2	0	2	0
3.	Hospital	3	0	3	0	3	0	3	0
4.	Peruncitan	1	3	0	4	0	4	2	2
5.	Institusi Pendidikan	1	0	1	0	1	0	1	0
JUMLAH		11	13	14	10	9	15	14	10
BANGUNAN CAPAI SASARAN (%)		45.8%		58.3%		37.5%		58.3%	
PURATA KADAR PENGHUNIAN SEBENAR (%)		73.0%		70.0%		68.0%		76.0%	

Sumber: PHB Property Venture Sdn Bhd (PHBPV) dan Purata dari Laporan KPI tahunan PHB

- e. Semakan Audit terhadap lapan hartanah mendapati bangunan-bangunan tersebut berhadapan dengan cabaran seperti kadar penghunian yang rendah, kos operasi yang tinggi dan isu berkaitan pembangunan kawasan sekitar. Selain itu, terdapat empat hartanah yang diperoleh di bawah skim GRR iaitu satu kaedah di mana penyewa utama menjamin pulangan bersih tetap kepada PHB untuk suatu tempoh yang dipersetujui. Namun apabila skim GRR telah berakhir tempohnya, ia memberi kesan langsung terhadap penurunan kadar penghunian dan pulangan hasil hartanah berkaitan. Butiran lanjut seperti dalam **Jadual 7**.

JADUAL 7

PENEMUAN AUDIT TERHADAP PEMERIKSAAN LAPAN BANGUNAN

BUTIRAN PROJEK	STATUS SEMASA LAWATAN AUDIT
1. The Shore Shopping Gallery, Melaka	
Tarikh perolehan: 1 Januari 2015 Kos bangunan: RM216.84 juta Nilai geran Kerajaan: Tiada Kerugian terkumpul: RM1.17 juta	- Kadar penghunian 66.3%. - Kadar sewaan rendah, RM1.80 kaki persegi mengikut kadar pasaran berbanding RM8.00 kaki persegi semasa tempoh GRR pada 2015 hingga 2017. Penurunan kadar sewaan hampir 78% memberi kesan kepada pulangan hasil. - Ketiadaan <i>anchor tenants</i>. - Perbelanjaan operasi bangunan yang tinggi (assessment fee, service charge, sinking fund) yang melebihi RM2.4 juta setahun. Gambar 1 dan 2
2. Elevate Medini, Johor	
Tarikh perolehan: 1 Ogos 2019 Kos bangunan: RM402.30 juta Nilai geran Kerajaan: Tiada Keuntungan terkumpul: RM33.96 juta	- Merupakan bangunan pejabat dan pusat membeli-belah. - GRR telah tamat pada 30 September 2022 dan bangunan diserahkan kepada PHB. - Kadar penghunian 0% selepas berakhirnya tempoh GRR. - Akses terhad kepada kemudahan pengangkutan awam. - Kepadatan penduduk yang masih rendah. - Bangunan bersebelahan masih dalam pembinaan. Gambar 3
3. Menara Bank Pembangunan (Plaza Conlay), Kuala Lumpur	
Tarikh perolehan: 1 September 2021 Kos bangunan: RM582.65 juta Nilai geran Kerajaan: RM134 juta (23%) Keuntungan terkumpul: RM6.95 juta	- Merupakan bangunan pejabat. - Kadar penghunian 33.0% melibatkan 11 dari 34 aras bangunan. - Bangunan siap dibina pada tahun 2020 dan CCC diperolehi pada tahun 2021. - Disiapkan semasa penularan Covid-19 menyebabkan kekurangan permintaan penyewaan ruang pejabat. Gambar 4
4. Tower 6 Skypark, Cyberjaya	
Tarikh perolehan: 1 Oktober 2018 Kos bangunan: RM123.72 juta Nilai geran Kerajaan: RM50 juta (40.4%) Keuntungan terkumpul: RM15.45 juta	- Tempoh GRR 1 Oktober 2018 hingga 30 September 2021. - Kadar penghunian menurun kepada 16.0% pada Disember 2021. - Kadar penghunian semasa 22.0% bagi empat daripada 20 aras. - Lokasi bangunan bersebelahan kompleks beli-belah tidak aktif. - Unit tidak dilengkapi dengan sistem penghawa dingin dan sistem saluran ventilasi (pengudaraan). Penyewa atau pembeli perlu menanggung sendiri kos dan urusan pemasangan sistem. Gambar 5 dan 6
5. Quill 18, Cyberjaya	
Tarikh perolehan: 1 Disember 2015 Kos bangunan: RM456.32 juta Nilai geran Kerajaan: RM150 juta (32.9%) Keuntungan terkumpul: RM118.11 juta	- Kadar penghunian 35.0%. Enam aras di Blok A dan tiga aras di Blok B tidak berpenghuni. - Perpindahan penyewa utama menyebabkan kadar penghunian menurun. - Keluasan pejabat terlalu besar di Blok A iaitu 32,000 kaki persegi berbanding Blok B yang berkeluasan hanya 22,000 kaki persegi menyebabkan kurang permintaan. Gambar 7 dan 8
6. Menara Aras Raya, Kuala Lumpur	
Tarikh perolehan: 1 Mei 2013 Kos bangunan: RM465.84 juta Nilai geran Kerajaan: RM460 juta (98.7%) Keuntungan terkumpul: RM303.85 juta	- Merupakan bangunan pejabat. - Pengurangan keluasan sewaan oleh penyewa utama menyebabkan penurunan kadar penghunian. - Kadar penghunian 41.8% melibatkan 18 daripada 38 aras. - Berlaku kebocoran air pada laluan tangga kecemasan, kerosakan tandas dan saluran pembetulan. - Proses baik pulih dan naik taraf bangunan sedang dijalankan. Gambar 9 dan 10
7. Menara Hextar, Petaling Jaya, Selangor	
Tarikh perolehan: 1 Mei 2017 Kos bangunan: RM150.15 juta Nilai geran Kerajaan: RM150 juta (99.9%)	- Merupakan bangunan pejabat yang diperolehi di bawah skim GRR pada 6 November 2014. - Kadar sewaan yang rendah iaitu RM2.50 kaki persegi berbanding RM4.00 kaki persegi mengikut harga pasaran.

BUTIRAN PROJEK	STATUS SEMASA LAWATAN AUDIT
Keuntungan terkumpul: RM31.94 juta	- Kadar penghunian 34.0%, melibatkan sembilan daripada 17 aras pejabat. - Kawasan persekitaran masih dalam fasa pembinaan. - Akses pengangkutan awam yang terhad. - Penyewa perlu menanggung sendiri kos dan urusan pemasangan sistem penghawa dingin di dalam ruang pejabat.
8. Icon City Car Park, Petaling Jaya, Selangor	
Tarikh perolehan: 1 Mac 2014 Kos bangunan: RM98.54 juta Nilai geran Kerajaan: Tiada Kerugian terkumpul: RM8.65 juta	- Merupakan tapak parkir kereta di bangunan kediaman, pejabat dan kemudahan runcit/makanan. - Aktiviti runcit yang tidak aktif dan kadar penghunian yang rendah. - Jumlah kenderaan/aliran trafik yang rendah. Gambar 11 dan 12

Sumber: Jabatan Audit Negara

GAMBAR 1



The Shore Shopping Gallery
(Lawatan Audit: 26 November 2024 dan 30 Disember 2025)

GAMBAR 2



The Shore Shopping Gallery
(Lawatan Audit: 26 November 2024 dan 30 Disember 2025)

GAMBAR 3



Elevate Medini, Johor
- Kompleks membeli-belah dan bangunan pejabat dengan kadar penghunian 0%
(Lawatan Audit: 27 November 2024)

GAMBAR 4



Bangunan Menara Bank Pembangunan (Plaza Conlay)
(Lawatan Audit: 7 Januari 2025)

GAMBAR 5



Bangunan Tower 6 Skypark
(Lawatan Audit: 12 Disember 2024)

GAMBAR 6



Bangunan Tower 6 Skypark
- Unit tidak dilengkapi dengan sistem penghawa dingin dan sistem saluran ventilasi (pengudaraan)
(Lawatan Audit: 12 Disember 2024)

GAMBAR 7



Bangunan Quill 18
(Lawatan Audit: 12 Disember 2024)

GAMBAR 8




Bangunan Quill 18
- Keluasan pejabat terlalu besar
menyebabkan kurang permintaan
(Lawatan Audit: 12 Disember 2024)

GAMBAR 9



Bangunan Menara Aras Raya
(Lawatan Audit: 7 Januari 2025)

GAMBAR 10



Bangunan Menara Aras Raya
- Kebocoran air pada laluan tangga kecemasan
(Lawatan Audit: 7 Januari 2025)

GAMBAR 11



Icon City Car Park, Petaling Jaya, Selangor
- Premis kedai yang masih kosong
(Lawatan Audit: 8 Januari 2025)

GAMBAR 12



Icon City Car Park, Petaling Jaya, Selangor
- Parkir yang kosong semasa pemeriksaan
(Lawatan Audit: 8 Januari 2025)

- f. Semakan Audit mendapati tiada SOP disediakan bagi tujuan perolehan hartanah sebelum September 2016. Bagaimanapun, bagi perolehan yang dibuat selepas tarikh tersebut, PHB telah menyediakan Investment Policy Statements (IPS) yang menetapkan keperluan untuk melaksanakan proses *Due Diligence* menyeluruh merangkumi hasil bangunan dan kewangan; struktur/fizikal bangunan serta mekanikal dan elektrik; perundangan dan dokumentasi; serta penilaian risiko terhadap penyewa utama bagi hartanah yang telah siap, sedang dalam pembinaan dan dalam pembangunan sebelum sebarang perolehan dibuat.

- g. Analisis Audit mendapati **pelaksanaan *Due Diligence* bagi perolehan aset tidak dilaksanakan secara menyeluruh dan konsisten**. Bagi perolehan sebelum tahun 2016, *Due Diligence* dilaksanakan secara terhad meliputi dua aspek iaitu struktur/fizikal bangunan serta perundangan bagi dua bangunan. Namun demikian, selepas SOP diperkenalkan kelemahan masih berterusan di mana hanya aspek struktur/fizikal bangunan serta mekanikal dan elektrik dilaksanakan bagi dua bangunan seperti yang dinyatakan dalam **Jadual 8**.

JADUAL 8
PELAKSANAAN DUE DILIGENCE PEROLEHAN HARTANAH

BIL.	NAMA BANGUNAN	KOS PEROLEHAN (RM Juta)	TAHUN BELI	ASPEK			
				A	B	C	D
1.	Menara Aras Raya	460.00	2013	X	/	X	X
2.	Icon City Car Park	98.52	2014	X	X	X	X
3.	The Shore Shopping Gallery	212.00	2015	X	/	X	X
4.	Quill 18	455.00	2015	X	/	/	X
5.	Menara Hextar	150.00	2017	X	X	X	X
6.	Tower 6 Skypark	123.00	2018	X	/	X	X
7.	Elevate Medini	350.12	2019	X	/	X	X

Sumber : Jabatan Pelaburan,PHB

Nota :

A	- Hasil bangunan dan kewangan	B	- Struktur/fizikal bangunan serta mekanikal dan elektrik	C	- Perundangan dan dokumentasi	D	- Penilaian risiko
/	- Melaksanakan <i>Due Diligence</i>	X	- Tidak melaksanakan <i>Due Diligence</i>				

Menara Bank Pembangunan (Plaza Conlay) - Tiada proses *due diligence* kerana bangunan tersebut di bawah kategori pembinaan

Maklum balas PHB yang diterima pada 10 Disember 2025 dan 8 Januari 2026

Kadar penghunian keseluruhan telah mengalami penurunan semasa tempoh pasca-pandemik (2022-2023) akibat ketidakstabilan pasaran hartanah komersial. Pemulihan ketara kadar penghunian (76%) pada tahun 2024 adalah disebabkan kejayaan strategi pemasaran dan inisiatif pengekalan penyewa yang dilaksanakan. Langkah penambahbaikan yang berterusan ini telah menunjukkan impak yang ketara dan momentum pemulihan yang kukuh apabila kadar penghunian keseluruhan mencapai 84% setakat Oktober 2025 iaitu hampir mencapai sasaran 85%. Selain itu, PHB juga melaksanakan pengurusan aset berprestasi rendah kategori *multi-tenancy* yang memberi fokus kepada strategi pemasaran dan insentif sewa yang lebih agresif.

PHB telah membangunkan *Red Building Turnaround Plan* yang telah diluluskan oleh Lembaga Pengarah PHB pada tahun 2024. Pelan ini menggariskan empat strategi utama iaitu pengekalan, tukar tujuan, jual aset dan peningkatan nilai. Peruntukan modal juga telah diluluskan bersama pelan ini untuk membiayai inisiatif yang telah disenaraikan.

PHB juga telah mengemas kini dan membangunkan Rangka Kerja Pelaburan Hartanah serta Dasar Pelaburan Hartanah pada 26 Jun 2024 dan Garis Panduan Pelaburan Hartanah pada 31 Julai 2024 serta membangunkan SOP bagi *Evaluation & Initial Approval*, *Due Diligence*, *Approval* dan *Investment Execution*. PHB telah menjalankan *Feasibility Study* dan *Due Diligence* yang komprehensif merangkumi aspek perundangan, teknikal, kewangan dan penilaian bagi cadangan pemerolehan baharu seperti PTP Maersk, Schott Glass Manufacturing Facility dan AEON Mall Taiping.

5.3.1.2. Tunggakan Sewa

- a. Klausula Perjanjian antara PHB dengan penyewa premis menyatakan bahawa bayaran sewa hendaklah dibayar pada hari ketujuh setiap bulan sepanjang tempoh penyewaan. SOP Finance and Treasury Management yang berkuat kuasa pada April 2014 pula memaklumkan tindakan yang boleh diambil oleh PHB terhadap penyewa yang gagal menjelaskan bayaran seperti dalam **Jadual 9**.

JADUAL 9
TINDAKAN YANG BOLEH DIAMBIL TERHADAP TUNGGAKAN SEWA

PERKARA	TINDAKAN
1 bulan tunggakan sewa	Peringatan pertama dihantar kepada penyewa
2 bulan tunggakan sewa	Peringatan kedua dihantar kepada penyewa bersekali dengan panggilan telefon serta menghantar e-mel dan merekodkan maklumat dalam buku log
14 hari selepas peringatan kedua dikeluarkan	Peringatan terakhir akan dihantar kepada penyewa. Susulan selanjutnya akan direkodkan dalam buku log
14 hari selepas peringatan terakhir dikeluarkan	Akaun akan diserahkan kepada Bahagian Undang-undang untuk memulakan tindakan undang-undang

Sumber: SOP Finance and Treasury Management

- b. Semakan Audit mendapati tunggakan sewa bagi tahun 2021 hingga 2024 menunjukkan trend penurunan daripada RM93.52 juta kepada RM79.90 juta iaitu penurunan berjumlah RM7.14 juta (7.6%) pada tahun 2022, RM1.40 juta (1.6%) pada tahun 2023 dan RM5.08 juta (6.0%) pada tahun 2024.

- c. Hartanah yang mempunyai jumlah hutang tertinggi bagi tahun 2021 ialah NU Sentral sebanyak RM31.99 juta, manakala NU Empire mencatatkan tunggakan tertinggi bagi tahun 2022, 2023 dan 2024 iaitu masing-masing RM28.23 juta, RM28.42 juta dan RM27.13 juta.
- d. Empat hartanah yang menunjukkan peningkatan hutang setiap tahun iaitu Dataran PHB, Menara Hextar, Wisma Consplant dan Menara Bank Pembangunan (Plaza Conlay) di mana peratus kenaikannya antara 0.1% hingga ke 531.8% pada tahun 2024. Peningkatan tertinggi direkodkan oleh Menara Bank Pembangunan (Plaza Conlay) disebabkan oleh peningkatan bilangan penyewa selepas pembukaan pada tahun 2021. Butiran lanjut adalah seperti dalam **Jadual 10**.

JADUAL 10
TUNGGAKAN HASIL SEWA BAGI TEMPOH 2021 HINGGA 2024

BIL.	HARTANAH	SYARIKAT PENGENDALI	JUMLAH TUNGGAKAN (RM)			
			2021	2022	2023	2024
1.	CP Tower	PHB	769,385	1,304,944	1,050,801	907,877
2.	Dataran PHB	PHB	2,307,367	2,340,756	2,543,110	2,633,516
3.	Menara 1 Dutamas	PHB	3,021,435	1,756,658	1,444,902	1,084,042
4.	Menara Aras Raya	PHB	111,590	647,213	581,892	926,351
5.	Menara BT	PHB	1,328,977	1,505,690	1,383,050	793,997
6.	Menara Hextar	PHB	12,564,025	16,604,885	16,740,655	16,803,075
7.	Menara Prisma	PHB	2,322,601	250,987	247,397	89,444
8.	NU Empire	PHB	30,801,016	28,231,165	28,417,257	27,127,735
9.	One Precinct	PHB	1,286,217	925,154	579,171	1,316,519
10.	PJ33	PHB	2,891,542	2,867,665	3,155,322	2,780,203
11.	Quill 18	PHB	1,619,562	1,303,973	1,629,127	2,222,240
12.	The Shore Shopping Gallery	PHB	956,098	864,675	852,918	1,183,966
13.	Tower 6 Skypark	PHB	17,140	-	239,993	331,521
14.	Wisma Consplant	PHB	655,546	1,022,135	2,191,480	2,192,809
15.	Menara 1 Sentrum	Sentral 384 Sdn. Bhd.	522,129	441,807	621,051	128,678
16.	NU Sentral	NU Sentral Sdn. Bhd.	31,990,567	26,279,715	22,948,974	18,315,193
17.	Gleneagles Hospital	Ampang 210 Sdn. Bhd.	351,009	30,634	239,443	345,701
18.	Menara Bank Pembangunan (Plaza Conlay)	Conlay 301 Sdn. Bhd.	-	2,274	113,055	714,301
19.	Avisena Specialist Hospital	PHB	10	-	-	-
JUMLAH			93,516,216	86,380,330	84,979,598	79,897,168

Sumber : Jabatan Kewangan, PHB

Nota: Jumlah hutang keseluruhan tidak termasuk lain-lain penghutang (MSC)

- e. Analisis Audit terhadap sampel 20 penyewa yang mempunyai tunggakan sewa tertinggi bagi tahun berakhir 2024 mendapati 17 penyewa mempunyai tunggakan hutang melebihi 180 hari dengan jumlah keseluruhan RM48.30 juta. PHB didapati telah mengambil tindakan susulan terhadap penyewa terlibat, namun tindakan tersebut hanya dimulakan pada tahun 2025 yang merangkumi tindakan undang-undang, pelaksanaan pelan pembayaran dan penyerahan kes kepada agensi kutipan. Analisis Audit selanjutnya mendapati kelewatan mengambil tindakan telah menyebabkan **tunggakan hutang bagi tujuh daripada 17 penyewa berjumlah RM4.53 juta dihapus kira, di mana lima penyewa berjumlah RM3.13 juta dihapus kira pada tahun 2025 dan dua penyewa berjumlah RM1.40 juta diluluskan untuk dihapus kira pada tahun 2026**. Butiran seperti dalam **Jadual 11**.

JADUAL 11
TINDAKAN YANG DIAMBIL OLEH PHB TERHADAP 17 PENYEWA MELEBIHI 180 HARI

HARTANAH	BIL. PENYEWA TERTUNGGAK	HUTANG MELEBIHI 180 HARI (RM Juta)	STATUS TINDAKAN DIAMBIL
NU Empire	2	22.98	- 1 penyewa - saman telah difailkan pada 15 Julai 2025 dan perbicaraan telah ditetapkan pada 22, 23 dan 27 Februari 2027 - 1 penyewa dalam tindakan undang-undang
Menara Hextar	1	16.53	- 1 penyewa - saman telah difailkan pada 8 Julai 2025 dan tarikh perbicaraan masih belum ditetapkan oleh mahkamah. Pihak lawan telah memfailkan permohonan <i>disqualification</i> di mana tarikh pendengaran adalah ditetapkan pada 4 November 2025. PHB telah memfailkan permohonan penghakiman ringkas di mana pendengaran telah ditetapkan pada 19 Januari 2026
Quill 18	1	1.54	- Tindakan undang-undang - dokumen <i>Proof of Debt</i> sedang dimuktamadkan untuk difailkan
NU Sentral	9	4.93	- 1 penyewa mengambil Pelan Bayaran - 5 penyewa tunggakan dihapus kira berikutan syarikat penyewa telah digulung - 1 penyewa dalam tindakan undang-undang dan terbuka kepada penyelesaian melalui penghakiman persetujuan - 1 penyewa dirujuk kepada agensi kutipan hutang - 1 penyewa melibatkan akaun aktif dan dalam pemantauan pasukan pemasaran PHB
PJ33	1	0.74	- 1 penyewa dirujuk kepada agensi kutipan hutang
Dataran PHB	2	0.97	- 1 penyewa mengambil Pelan Bayaran - 1 penyewa tunggakan dihapus kira setelah <i>Proof of Debt</i> difailkan
Menara BT	1	0.61	- 1 penyewa tunggakan dihapus kira berikutan penyewa telah digulung
JUMLAH		48.30	

Sumber: Jabatan Strategi Korporat PHB

Maklum balas PHB yang diterima pada 10 Disember 2025 dan 8 Januari 2026

Majoriti tunggakan sewa yang akhirnya dihapus kira adalah berpunca daripada impak pandemik Covid-19. Bagi kes penyewa yang gagal beroperasi atau tidak lagi berkeupayaan membayar, hapus kira hanya boleh dilaksanakan setelah PHB memperoleh pengesahan rasmi melalui Proof of Debt (POD) bahawa tuntutan tersebut tidak lagi boleh dipulihkan. Sehingga pengesahan tersebut diterima, baki tunggakan perlu kekal direkodkan di dalam akaun. Antara inisiatif struktur yang telah menyumbang kepada penurunan tunggakan pada tahun 2024 termasuklah:

- i. PHB telah melaksanakan *institutionalisation exercise* bagi fungsi Penyewaan dan Pemasaran melalui syarikat PHB Property Ventures (PHBPV);
- ii. Pasukan Kawalan Kredit (Credit Control Team) ditubuhkan di bawah Jabatan Kewangan pada 8 Oktober 2023. Berkuat kuasa Julai 2024, pasukan ini telah dipindahkan sepenuhnya ke bawah PHBPV untuk memberi tumpuan khusus dan pakar dalam urusan kutipan hutang serta rundingan penyewa;
- iii. Proses kawalan kredit telah diperkemas yang merangkumi langkah proaktif dari peringatan awal sehingga tindakan undang-undang/hapus kira; dan
- iv. PHBPV telah melanggan perkhidmatan pelaporan kredit daripada CTOS dan Experian. Ini membolehkan saringan latar belakang kewangan penyewa dibuat dengan teliti sebelum sebarang perjanjian dimeterai.

Pendapat Audit | **Kadar penghunian masih belum mencapai tahap optimum namun telah menunjukkan momentum pemulihan apabila kadar penghunian keseluruhan mencapai 84% pada tahun 2025. Selain itu, tunggakan sewa yang kekal tinggi walaupun menunjukkan sedikit penurunan pada tahun 2024 boleh memberi kesan terhadap aliran tunai serta keupayaan syarikat menampung kos operasi dan pelaburan semula aset.**

5.3.2. Pengurusan Pembangunan Hartanah PHB

Bagi tempoh tahun 2021 hingga 2024, PHB telah melaksanakan lima projek pembangunan hartanah bernilai RM1.63 bilion melalui kaedah konvensional, *design & build* dan *turnkey*. Dua projek pembangunan telah dipilih sebagai sampel Audit, iaitu Projek Pembangunan Mayang Mall, Kuala Terengganu dan Projek Pembangunan Lot 61 Bangsar. Kedua-dua projek ini dilaksanakan secara konvensional di mana PHB melaksanakan sendiri pembangunan projek bermula daripada proses reka bentuk hingga pemilihan kontraktor.

5.3.2.1. Mayang Mall, Kuala Terengganu

Mesyuarat Lembaga Pengarah Bil. 1/2016 pada 10 Mac 2016 telah meluluskan cadangan pembangunan Projek Kampung Ladang Tanjung yang meliputi tiga fasa dengan kos berjumlah RM673.60 juta termasuk perolehan tanah di Lot PT. 4285 berjumlah RM106 juta. Skop kerja terbahagi kepada tiga fasa di mana Fasa 1 melibatkan pembinaan pusat membeli-belah Mayang Mall dan Oceanarium; Fasa 2 melibatkan pembinaan hotel dan Fasa 3 melibatkan pembinaan pangsapuri servis. Pengauditan difokuskan kepada Fasa 1 yang terdiri daripada dua pakej, iaitu Pakej 1 melibatkan kerja tanah serta cerucuk, dan Pakej 2 melibatkan pembangunan blok pusat membeli-belah.

a. Prestasi Fizikal Projek

- i. Kontrak Perjanjian bagi Projek Mayang Mall telah ditandatangani antara PHB dan kontraktor utama. Mengikut kontrak, Pakej 1 bernilai RM62.40 juta, bermula pada 9 Mei 2017 dengan tempoh pelaksanaan selama 12 bulan dan tarikh penyiapan asal ditetapkan pada 8 Mei 2018. Bagaimanapun, projek tidak dapat disiapkan dalam tempoh kontrak ditetapkan dan kontraktor telah diluluskan lanjutan masa (EOT No. 1 hingga EOT No. 3) selama 369 hari. Projek telah disiapkan sepenuhnya pada 12 Mei 2019. Kelewatan bagi Pakej 1 disebabkan oleh perubahan skop kerja cerucuk yang melibatkan pertambahan 50 *piles caps* dan keadaan aras air yang tinggi dalam tanah di tapak projek.
- ii. Kontrak bagi Pakej 2 yang bernilai RM324.27 juta telah bermula pada 8 Januari 2018 dengan tempoh pelaksanaan selama 37 bulan dan tarikh penyiapan asal ditetapkan pada 28 Februari 2021. Bagaimanapun projek tidak dapat disiapkan dalam tempoh kontrak yang ditetapkan. Lanjutan itu, satu perjanjian tambahan (Supplementary Agreement – SA) 1 telah ditandatangani berikutan terdapat pindaan kepada terma dan syarat kontrak, di mana tarikh penyiapan projek telah dipinda kepada 16 Ogos 2021. Namun projek masih gagal disiapkan. Kontraktor selanjutnya telah diluluskan lanjutan masa (EOT No. 1 hingga EOT No. 3) selama 534 hari menjadikan tarikh siap dipinda baharu ditetapkan pada 19 Januari 2023. Bagaimanapun, sebelum berakhirnya EOT No. 3, PHB melalui subsidiarinya, iaitu Tanjung 286 Development Sdn. Bhd. (T286) dan kontraktor utama telah menandatangani Perjanjian Penyelesaian (Settlement Agreement) pada 16 Januari 2023 setelah kedua-dua pihak bersetuju untuk penamatan bersama bagi kontrak pembinaan Mayang Mall, dengan kemajuan kerja semasa adalah pada 98.2%.

- iii. Kemudiannya PHB telah melantik Kontraktor Penyelamat dengan nilai kontrak RM70.75 juta untuk menyiapkan baki kerja Pakej 2 yang bermula pada 1 Disember 2023 hingga 30 Julai 2024. Projek telah disiapkan dalam tempoh ditetapkan di mana Perakuan Siap Kerja (CPC) telah dikeluarkan pada 30 Julai 2024. Butiran seperti dalam **Jadual 12**.

JADUAL 12
BUTIRAN PROJEK PEMBANGUNAN MAYANG MALL

PAKEJ	NILAI KONTRAK (RM Juta)	BUTIRAN KERJA	TEMPOH PENYIAPAN KERJA			STATUS
			MULA	ASAL	SEBENAR	
1	62.40	Kerja tanah dan kerja cerucuk	09.05.2017	08.05.2018	12.05.2019	Selesai
2	324.27	Blok pusat membeli-belah	08.01.2018	28.02.2021	16.01.2023	Ditamatkan
	70.75	Kontraktor Penyelamat: Blok pusat membeli-belah	01.12.2023	30.07.2024	30.07.2024	Selesai

Sumber: Dokumen Kontrak dan fail Projek Mayang Mall

- iv. **Pembinaan Mayang Mall didapati mengalami kelewatan selama 369 hari bagi Pakej 1 dan 1,254 hari bagi Pakej 2** seperti butiran dalam **Jadual 13**.

JADUAL 13
BUTIRAN KELEWATAN PENYIAPAN PROJEK MAYANG MALL

BIL.	PERKARA	BILANGAN HARI	CATATAN
PAKEJ 1			
1.	EOT No.1 – No.3	369	Tarikh siap kerja asal: 08.05.2018 Tarikh selepas EOT No. 1-3: 12.05.2019
JUMLAH PAKEJ 1		369	
PAKEJ 2			
1.	Supplementary Agreement (SA) 1	169	Tarikh siap kerja asal: 28.02.2021 Tarikh selepas SA 1: 16.08.2021
2.	EOT No.1- No.3	534	Tarikh siap kerja terkini (EOT No. 3): 19.01.2023
3.	Lantikan kontraktor penyelamat	309	SST: 21.11.2023 (Tarikh milik tapak: 01.12.2023)
4.	Kerja-kerja sambungan oleh kontraktor penyelamat	242	CCC: 15.07.2024 CPC: 30.07.2024
JUMLAH PAKEJ 2		1,254	

Sumber: Kontrak SA 1 dan Dokumen EOT

Nota: SST – Surat Setuju Terima CCC – Perakuan Penyiapan dan Pematuhan

CPC – Perakuan Siap Kerja

- v. Mayang Mall telah memulakan operasi dan dibuka kepada orang ramai pada 5 Disember 2024. Setakat bulan November 2025, kadar penghunian adalah 85%. Walaupun mengalami kelewatan selama hampir tiga tahun, pembinaan Mayang Mall telah memberi pulangan hasil kepada Kerajaan Negeri Terengganu dari segi kutipan cukai dan bayaran sewaan tanah. Sejumlah RM87,594 cukai telah dibayar oleh PHB dari tahun 2016 hingga 2024 manakala RM150,000 bayaran sewaan tanah tambahan telah dibayar mulai tahun 2023. Pembukaan

Mayang Mall juga memberi peluang pekerjaan kepada penduduk tempatan dan negeri-negeri berdekatan.

b. Kos Projek

- i. Lembaga Pengarah pada 20 November 2017 telah meluluskan peruntukan sebanyak RM440.78 juta bagi pembinaan Mayang Mall termasuk kos perolehan tanah. Setakat 31 Disember 2024, PHB telah membelanjakan sejumlah RM715.16 juta bagi pembinaan Mayang Mall. Semakan Audit mendapati berlaku **peningkatan kos sebanyak RM274.38 juta (62.2%) berbanding peruntukan asal RM440.78 juta** yang diluluskan oleh Lembaga Pengarah. Butiran seperti dalam **Jadual 14**.

JADUAL 14
KOS PEMBINAAN MAYANG MALL

BUTIRAN	PERUNTUKAN (RM Juta)	SEBENAR (RM Juta)	PERBEZAAN (RM Juta)
Kos Pembinaan	300.56	450.33	-149.77
Kos Perunding	26.80	26.45	0.35
Kos Umum	100.30	219.04	-118.74
Kos Pentadbiran	13.12	19.34	-6.22
JUMLAH KOS KESELURUHAN	440.78	715.16	-274.38

Sumber: Laporan Penyata Kewangan Beraudit Tanjung 286 Development Sdn. Bhd. (T286) bagi tahun berakhir 31 Disember 2024

- ii. Semakan Audit selanjutnya mendapati bahawa peningkatan kos sebanyak RM274.38 juta berpunca daripada Arahan Perubahan Kerja (VO) dan pelantikan kontraktor penyelamat selepas penamatan kontraktor asal; peningkatan kos umum sebanyak RM118.74 juta yang berpunca daripada kenaikan kadar faedah atas pinjaman dan peningkatan kos pentadbiran sebanyak RM6.22 juta yang merangkumi lain-lain kos berkaitan pengurusan projek.

Maklum balas PHB yang diterima pada 10 Disember 2025 dan 8 Januari 2026

Kelewatan penyediaan Pakej 2 turut dipengaruhi oleh proses siasatan Suruhanjaya Pencegahan Rasuah Malaysia (SPRM) terhadap kontraktor Mekanikal dan Elektrikal (M&E) yang terlibat pada ketika itu. PHB memberikan ruang kepada SPRM untuk menjalankan siasatan sebelum tindakan pembangunan seterusnya dapat dilaksanakan. PHB melantik kontraktor penyelamat bagi memastikan projek dapat diteruskan dengan lebih stabil, telus dan mengikut kepatuhan tadbir urus.

c. Penamatan Bersama (Mutual Termination) Dengan Kontraktor Utama Mayang Mall

- i. Mesyuarat Khas Lembaga Pengarah PHB Bil. 7/2022 pada 19 Disember 2022 telah bersetuju Penamatan Bersama dengan kontraktor utama pembinaan Mayang Mall berdasarkan justifikasi seperti berikut:
 - kontraktor utama telah memecat kontraktor M&E disebabkan siasatan SPRM berkaitan isu tuntutan palsu oleh kontraktor M&E. Lanjutan itu, kontraktor utama telah menghantar cadangan penambahan kos bagi menyiapkan baki kerja M&E berjumlah RM66.20 juta yang bertentangan dengan keputusan PHB iaitu menyiapkan baki kerja berjumlah RM8 juta tanpa sebarang kos tambahan. Namun kontraktor utama tidak melaksanakan kerja seperti diarahkan dan tiada peningkatan terhadap prestasi kerja di lapangan dalam tempoh empat bulan selepas pemecatan kontraktor M&E.
- ii. Keputusan Penamatan Bersama ini seterusnya telah dilaksanakan melalui Perjanjian Penyelesaian (Settlement Agreement) bertarikh 16 Januari 2023 yang ditandatangani antara T286 dan kontraktor utama. Selanjutnya, berdasarkan Klausula Mukadimah D Settlement Agreement, segala hak dan tanggungjawab PHB di bawah Perjanjian telah dinovasikan kepada T286 melalui Novation Agreement bertarikh 8 Julai 2020. Semakan Audit mendapati perkara seperti berikut:
 - **cadangan penambahan kos daripada kontraktor utama dan arahan untuk menyelesaikan baki kerja M&E diputuskan dalam Mesyuarat Lembaga Pengarah PHB walaupun hak dan tanggungjawab PHB dalam Perjanjian telah dinovasikan kepada T286.** Pihak Audit juga tidak menemui bukti yang menunjukkan keputusan tersebut disahkan (endorsement) atau diluluskan melalui resolusi sewajarnya di peringkat Lembaga Pengarah T286;
 - memandangkan subkontrak M&E telah ditamatkan dan terdapat kegagalan di pihak kontraktor utama untuk melaksanakan baki kerja M&E, T286 mempunyai hak untuk mengeluarkan notis bertulis kepada kontraktor utama menurut Klausula 51.1(a)(iv) Perjanjian. Notis ini bertujuan untuk meremedikan kegagalan melaksanakan kerja mengikut kontrak dalam tempoh 14 hari dari tarikh penerimaan notis tersebut atau mana-mana tarikh yang ditetapkan. Sekiranya kontraktor utama gagal meremedikan kegagalan

dalam tempoh masa yang ditetapkan, T286 berhak untuk menamatkan Perjanjian melalui suatu notis bertulis menurut Klausu 51.1(b) Perjanjian;

- tiada bukti menunjukkan T286 melaksanakan haknya di bawah Klausu 51.1(a)(iv) Perjanjian apabila kontraktor utama gagal menyelesaikan baki kerja-kerja M&E, sebaliknya Lembaga Pengarah PHB dalam Mesyuarat Khas Lembaga Pengarah Bil. 7/2022 pada 19 Disember 2022 telah memutuskan untuk menamatkan Perjanjian secara penamatan bersama melalui Settlement Agreement yang ditandatangani pada 16 Januari 2023; dan
- berdasarkan Klausu 2.6 Settlement Agreement, pihak-pihak kepada Settlement Agreement bersetuju bahawa kenaan Liquidated Ascertained Damages (LAD) akan diketepikan sehingga *Handover Date* iaitu tarikh Settlement Agreement ini ditandatangani dan kontraktor utama tidak berhak untuk menuntut *Loss and Expenses* (L&E) atau apa-apa kos tambahan di bawah Perjanjian dan Settlement Agreement.

iii. **Settlement Agreement yang dimeterai memberikan implikasi kewangan berjumlah RM35.41 juta** melibatkan pelepasan wang tahanan, bayaran baki kemajuan kerja dan pelarasan perubahan kerja (VO) serta nilai Settlement Agreement seperti dalam **Jadual 15**. Selain itu, PHB juga kehilangan sejumlah RM12.88 juta (RM79,000 x 163 hari) berkaitan LAD yang boleh dikenakan kepada kontraktor utama bermula 4 Ogos 2022 hingga 16 Januari 2023. Jumlah keseluruhan kerugian yang perlu ditanggung oleh PHB disebabkan oleh penamatan bersama yang dipersetujui adalah RM48.29 juta.

JADUAL 15
KANDUNGAN PERJANJIAN PENYELESAIAN (SETTLEMENT AGREEMENT)

BIL.	BUTIRAN	JUMLAH (RM Juta)
1.	Pelepasan Wang Tahanan	9.57
2.	Bayaran Baki Kemajuan Kerja dan Pelarasan VO	10.55
3.	Nilai Settlement Agreement	15.29
	JUMLAH	35.41

Sumber: IPC 53 & 55 (kontraktor asal), Final Account (kontraktor asal), IPC 7 (kontraktor penyelamat)

iv. Seterusnya, Klausu 70 Perjanjian menyatakan tiada sebarang pengubahsuaian, pindaan atau penepian mana-mana peruntukan Kontrak ini akan berkuat kuasa melainkan dibuat melalui persetujuan bersama dan dibuat secara bertulis melalui perjanjian tambahan yang merujuk secara khusus kepada Kontrak ini serta ditandatangani sewajarnya oleh pihak terlibat. Peruntukan berkenaan dengan pindaan, variasi atau pengubahsuaian tersebut hendaklah menjadi

tambahan kepada dan dibaca sebagai bahagian penting dalam Kontrak ini yang akan kekal berkuat kuasa sepenuhnya di antara kedua-dua pihak. Selain itu, Klausula 5.0 Settlement Agreement menyatakan semua terma dan peruntukan Settlement Agreement adalah tidak boleh ditarik balik dan hendaklah mengikat serta berkuat kuasa bagi manfaat pihak-pihak di sini termasuk pengganti, wakil sah dan penerima serah hak majikan serta penerima serah hak kontraktor yang dibenarkan.

- v. Berdasarkan Mesyuarat Khas Lembaga Pengarah Bil. 6/2023 dan 7/2023 masing-masing pada 21 Ogos 2023 dan 30 Ogos 2023, pihak Audit mendapati **Lembaga Pengarah PHB telah bersetuju membayar tuntutan L&E berjumlah RM13.57 juta walaupun di dalam kontrak tidak membenarkan tuntutan tersebut.** Tuntutan L&E ini adalah disebabkan oleh PKP semasa Pandemik Covid-19 dan merupakan sebahagian daripada Nilai Perjanjian Penyelesaian yang berjumlah RM15.29 juta. Berdasarkan dokumen dan maklumat yang dikemukakan, tiada sebarang pindaan kepada Settlement Agreement dibuat antara pihak-pihak terlibat.

Maklum balas PHB yang diterima pada 10 Disember 2025 dan 8 Januari 2026

Walaupun Perjanjian Mayang Mall telah dinovasikan kepada T286, penglibatan Lembaga Pengarah PHB adalah wajar kerana T286 merupakan syarikat tujuan khas (*Special Purpose Vehicle*) yang bersifat dormant, tadbir urus T286 tertakluk kepada Kerangka Tadbir Urus dan Had Kuasa Kelulusan Kumpulan PHB (*Group Limit of Authority*). Selain itu, penyelesaian kewangan melibatkan pendedahan kewangan Kumpulan PHB dan didahulukan melalui mekanisme *shareholder advance*.

Keputusan penamatan bersama (*Mutual Termination*) dengan kontraktor utama diambil bagi memitigasi risiko kelewatan operasi Mayang Mall yang menyebabkan kehilangan peluang pendapatan sebanyak RM20.40 juta setahun, selain mengelakkan pendedahan risiko kewangan timbang tara berjumlah RM353.49 juta. Penyelesaian melalui penamatan bersama dianggap sebagai langkah paling strategik untuk menjamin kelangsungan projek dan nilai kepada pemegang unit AHB berbanding proses litigasi yang panjang. Rundingan telah berlangsung sejak November 2022 dan penyelesaian ini membolehkan PHB bergerak ke hadapan dengan memuktamadkan isu tersebut secara berkesan.

PHB mengambil maklum mengenai pembayaran Kos Tambahan (L&E) yang tidak mengikut klausa kontrak yang telah dipersetujui. Lembaga Pengarah telah bersetuju dengan permohonan tuntutan L&E kontraktor utama berjumlah RM13.57 juta selepas mengambil kira cadangan Pihak Pengurusan, senario profil risiko, dan menggunakan Peraturan Pertimbangan Perniagaan (Business Judgement Rule) seperti berikut:

- Rundingan telah berlangsung sejak November 2022 dan penyelesaian ini membolehkan PHB bergerak ke hadapan dengan memuktamadkan isu tersebut secara berkesan;
- PHB dapat memaksimumkan peluang pendapatan daripada SOGO yang dianggarkan RM21.28 juta setahun, seterusnya meningkatkan aliran tunai dan pulangan pelaburan;
- Pandemik Covid-19 telah menyebabkan peningkatan kos buruh dan bahan binaan yang perlu ditanggung oleh kontraktor dan adalah menjadi amalan standard industri untuk menampung kos tersebut; dan
- Memastikan komitmen berterusan SOGO sebagai penyewa utama (anchor tenant) bagi mengekalkan reputasi cemerlang PHB, kadar penghunian yang optimum, dan aliran pendapatan yang mampan.

Pendapat Audit

Had Kuasa Kelulusan Kumpulan PHB (LOA) tidak mewujudkan atau menghidupkan semula (reinstate) hak kontraktual PHB di mana keputusan substantif berkaitan Perjanjian Mayang Mall sepatutnya dibuat oleh pihak yang sah di bawah perjanjian, iaitu T286. LOA merupakan instrumen tadbir urus dalaman Kumpulan PHB yang bertujuan mengawal proses kelulusan dalaman dan pengurusan risiko kewangan. LOA bukanlah sebahagian daripada *Novation Agreement* dan tidak dirujuk secara nyata atau tersirat ke dalam perjanjian tersebut. Keputusan untuk menamatkan Perjanjian secara Penamatan Bersama melalui SA tidak menunjukkan bahawa pihak T286 menjaga kepentingannya dan kesan daripada keputusan ini telah merugikan T286. Ini kerana sekiranya Perjanjian ditamatkan mengikut Klausa 51.1(b) Perjanjian, T286 berhak untuk antara lain melucuthakkan Bon Pelaksanaan dan menuntut terhadap kontraktor utama apa-apa kerugian, kos, perbelanjaan dan ganti rugi yang dialami akibat dari penamatan Perjanjian ini sebagaimana diperuntukkan dalam Klausa 51.1(c) Perjanjian.

5.3.2.2. Lot 61 Bangsar

Projek Lot 61 Bangsar merupakan sebuah pembangunan bercampur milik PHB yang merangkumi komponen menara pejabat, hotel, apartmen servis, podium runcit sokongan (ancillary retail podium), tempat letak kereta bawah tanah serta pelbagai kemudahan awam. Projek ini dirancang dilaksanakan dalam lima fasa selama 15 tahun, bermula dari tahun 2016 hingga 2031. Perolehan tanah berukuran 18.91 ekar milik Perbadanan Aset Keretapi telah dilaksanakan pada 18 Ogos 2010 dengan nilai RM200 juta. Pengauditan memfokuskan kepada pembangunan Fasa 1 yang melibatkan pembinaan Menara 1, Tempat Letak Kereta (TLK) dan Pusat Pencawang Utama (PPU). Projek Fasa 1 dilaksanakan melalui tiga pakej seperti butiran dalam **Jadual 16**.

JADUAL 16
RINGKASAN PROJEK PEMBANGUNAN LOT 61 BANGSAR FASA 1

PAKEJ	KOS PROJEK (RM Juta)	SKOP KERJA	TARIKH MULA KONTRAK	TARIKH SIAP ASAL MENGIKUT KONTRAK	TEMPOH KONTRAK
1	37.00	Kerja tanah, cerucuk, dan tembok penahan	02.05.2017	02.01.2018	8 bulan
2	273.65	Kerja tanah serta pembinaan TLK bawah tanah (Menara 1 – 3) termasuk PPU	16.04.2018	02.02.2021	34 bulan
3	-	Pembinaan Menara 1 (Projek Dibatalkan)	-	-	-

Sumber: Dokumen Kontrak dan SST

a. Prestasi Fizikal Projek

- i. Mesyuarat Lembaga Pengarah Bil. 1/2016 yang diadakan pada 10 Mac 2016 telah meluluskan cadangan Pembangunan Lot 61, Bangsar. Seterusnya, kelulusan Kebenaran Merancang (KM) diperoleh daripada Dewan Bandaraya Kuala Lumpur (DBKL) pada 23 Ogos 2016, diikuti dengan kelulusan Perintah Pembangunan (DO) pada 15 November 2016. Kelulusan Pelan Jabatan Bomba dan Penyelamat (PB) diterima pada 16 Januari 2017, manakala kelulusan akhir bagi Pelan Bangunan (BP) telah diperoleh pada 17 Februari 2017.
- ii. Mengikut kontrak, Pakej 1 bernilai RM37 juta, bermula pada 2 Mei 2017 dengan tempoh pelaksanaan selama lapan bulan dan tarikh penyiapan asal ditetapkan pada 2 Januari 2018. Bagaimanapun, projek tidak dapat disiapkan dalam tempoh kontrak ditetapkan dan kontraktor telah diluluskan lanjutan masa (EOT No. 1) selama 87 hari disebabkan oleh pertambahan skop kerja *super ramp* yang memberi kesan kepada reka bentuk cerucuk. Projek telah disiapkan sepenuhnya pada 30 Mac 2018.

- iii. Pakej 2 pula melibatkan kerja tanah dan pembinaan TLK bawah tanah termasuk PPU yang bernilai RM273.65 juta bermula pada 16 April 2018 selama 34 bulan dan tarikh penyiapan asal ditetapkan pada 2 Februari 2021. Bagaimanapun, tarikh siap asal yang ditetapkan telah dipinda beberapa kali melalui Perjanjian Tambahan (Supplementary Agreement - SA) 1 dan EOT No. 1 dan No. 2 yang diluluskan oleh PHB. Seterusnya SA 2 telah ditandatangani pada 30 Januari 2023 yang menyebabkan tarikh siap Pakej 2 dipinda kepada 15 Jun 2024.
- iv. Pakej 2 tidak dapat disiapkan pada tarikh yang ditetapkan. PHB melalui Perunding Pengurusan Projek (PMC) telah mengeluarkan Perakuan Tidak Siap Kerja (Certificate of Non-Completion – CNC) kepada kontraktor Pakej 2 pada 16 Jun 2024. **Setakat 30 Oktober 2025, Pakej 2 masih belum disiapkan dengan kelewatan selama 1,731 hari.** Semakan Audit mendapati punca kelewatan Pakej 2 adalah seperti berikut:
- Dua perubahan skop projek dan satu perubahan dalam butiran KM oleh PHB merupakan antara faktor kelewatan penyiapan projek. Ini kerana setiap perubahan kepada skop projek memerlukan Pindaan Perintah Pembangunan [Amendment Development Order (ADO)] dikemukakan semula kepada DBKL. Butiran perubahan skop kerja dan implikasinya adalah seperti dalam **Jadual 17**.

JADUAL 17
PERUBAHAN SKOP KERJA PROJEK LOT 61 BANGSAR FASA 1 PAKEJ 2

SKOP PROJEK	PUNCA KUASA	BUTIRAN SKOP PROJEK	IMPLIKASI
Skop Asal Projek	Mesyuarat Lembaga Pengarah Bil. 1/2016 (10.03.2016)	Skop Asal Projek: - Menara 1 (Pejabat dan ruang perniagaan), - TLK bawah tanah bagi Menara 1 - Pusat Pencawang Utama (PPU)	Kelulusan Pihak Berkuasa Tempatan (PBT) diperoleh: KM: 23.08.2016 DO: 15.11.2016 PB: 16.01.2017 BP: 17.02.2017
Perubahan Skop No.1	Mesyuarat Lembaga Pengarah Bil. 2/2017 (27.09.2017)	Tambahan Skop Projek: TLK bawah tanah bagi Menara 2 dan 3	Keperluan Meminda DO (ADO) - Tarikh mohon ADO : 22.02.2018 - Tarikh lulus ADO: 02.08.2018 [DBKL tetapkan syarat tambahan pembinaan laluan bawah tanah (Underpass Tunnel)]
Perubahan KM	Tarikh mohon KM baharu: 12.12.2019 Tarikh Lulus KM baharu: 11.03.2021	Perubahan No. Plot Perubahan No. Plot dalam Pelan Induk Pembangunan (tanpa perubahan lokasi): - Plot No.1 dibahagikan kepada Plot No.2 dan No.3 - Plot No.2 ditukar kepada Plot No.1 - Plot No.3 ditukar kepada Plot No.4	Keperluan Meminda DO (ADO 1) Perlu mohon pindaan DO (ADO 1) - Tarikh mohon ADO 1: 12.12.2019 - Tarikh Lulus ADO 1: 30.06.2022
Perubahan Skop No.2	Mesyuarat Lembaga Pengarah Bil. 1/2023 (27.03.2023)	Penangguhan Pembinaan Menara 1 dan Skop Kerja <i>Underpass Tunnel</i> dikeluarkan: - Pembinaan Menara 1 ditangguh untuk pembangunan akan datang - Penamatan kontrak bagi skop kerja <i>Underpass Tunnel</i>	Keperluan Meminda DO (ADO 2) Perlu mohon pindaan DO (ADO 2) - Tarikh mohon ADO 2: 21.08.2024 - Tarikh lulus ADO 2: 18.08.2025

Sumber: Fail Projek Lot 61 Bangsar

- Berdasarkan **Jadual 17** di atas, terdapat skop kerja tambahan berkaitan pembinaan terowong laluan bawah tanah (*Underpass Tunnel*) yang perlu dilaksanakan bagi memenuhi syarat kelulusan ADO yang diluluskan DBKL pada 2 Ogos 2018. Selaras dengan syarat tersebut, PHB telah melantik kontraktor pada 24 Mei 2022 untuk membina *Underpass Tunnel* dengan tempoh siap selama 48 bulan berakhir pada 31 Mei 2026. Namun, PHB telah menamatkan kontrak kerja tersebut pada 25 September 2023 dengan prestasi kemajuan kerja ketika itu pada tahap 9.7%. Setakat 10 September 2025, PHB bersetuju membayar sejumlah RM17.33 juta (9.7% daripada kos kontrak) berdasarkan keseluruhan kerja yang telah dilaksanakan oleh kontraktor terlibat.
- Penamatan kontrak *Underpass Tunnel* telah menyebabkan berlakunya perubahan skop yang memerlukan PHB untuk mengemukakan ADO 1 dan ADO 2 termasuk keputusan PHB untuk menangguhkan pembinaan Menara 1. Pihak Audit mendapati DBKL telah meluluskan ADO 2 pada 18 Ogos 2025 dengan mengekalkan keperluan pembinaan *Underpass Tunnel* sebelum CCC boleh dikeluarkan. Bagaimanapun, setakat 30 Oktober 2025, pembinaan *Underpass Tunnel* masih belum dilaksanakan walaupun PHB mengesahkan kemajuan kerja adalah pada tahap 99.9%. **Kegagalan PHB untuk memenuhi syarat yang ditetapkan oleh DBKL telah menjejaskan proses mendapatkan CCC** bagi Projek Lot 61 Bangsar yang seterusnya menyebabkan bangunan tersebut tidak sah untuk diduduki dan beroperasi.

Maklum balas PHB yang diterima pada 10 Disember 2025 dan 8 Januari 2026

Bagi tujuan mendapatkan CCC, satu rayuan telah dikemukakan kepada DBKL untuk memperoleh CCC tanpa pelaksanaan pembinaan *Underpass Tunnel*. Perbincangan awal bersama pihak DBKL telah diadakan pada 21 Ogos 2025 dan permohonan lesen operasi tempat letak kereta telah dikemukakan oleh pihak Pengurusan Fasiliti PHB pada 30 September 2025 kepada DBKL. Setakat 31 Oktober 2025, pihak DBKL masih dalam proses semakan permohonan rayuan yang dikemukakan oleh PHB.

b. Peningkatan Kos Projek

- i. Mesyuarat Lembaga Pengarah Bil. 1/2016 pada 8 Mac 2016 telah meluluskan peruntukan kos keseluruhan bagi pembangunan Fasa 1 berjumlah RM437.59 juta yang terdiri daripada kos pembinaan, kos umum dan kos pentadbiran. Seterusnya, Mesyuarat Lembaga Pengarah Bil. 2/2017 pada 27 September 2017 telah bersetuju dengan cadangan perluasan skop projek melibatkan tambahan kos pembinaan sebanyak RM175.80 juta, menjadikan peruntukan kos pembinaan baharu berjumlah RM568.21 juta berbanding RM392.41 juta. Kos pembinaan ini melibatkan pembinaan Menara 1, pembinaan TLK di Menara 1 dan 2 serta sebahagian Menara 3, kos infra termasuk *Underpass Tunnel* dan perunding. Walau bagaimanapun, mesyuarat tersebut tidak memperincikan sebarang keputusan berkaitan penambahan peruntukan bagi kos umum dan kos pentadbiran. Sehubungan itu, jumlah peruntukan keseluruhan projek selepas kelulusan tersebut adalah RM568.21 juta.
- ii. **Setakat 31 Oktober 2025, jumlah perbelanjaan projek oleh PHB telah mencecah RM881.65 juta, melebihi RM313.44 juta daripada peruntukan yang diluluskan RM568.21 juta.**
- iii. **Analisis Audit turut mendapati PHB telah membelanjakan sejumlah RM409.16 juta (72.0%) daripada RM568.21 juta kos pembinaan yang diperuntukkan. Baki yang masih belum dibelanjakan ialah RM159.05 juta, dan jumlah ini tidak mencukupi untuk menampung kos pembinaan Menara 1 (RM226.44 juta) dan *Underpass Tunnel* (RM31.26 juta) yang keseluruhannya dianggarkan berjumlah RM257.70 juta.** Ini menunjukkan terdapat kurangan peruntukan sebanyak RM98.65 juta untuk menyelesaikan kerja-kerja Fasa 1. Antara peningkatan kos tertinggi ialah pembinaan TLK yang telah meningkat sebanyak RM144.35 juta (66.1%), iaitu daripada kos asal berjumlah RM218.38 juta kepada RM362.73 juta.
- iv. Perbelanjaan bagi kos umum (caj kewangan dan caj kerajaan) menunjukkan peningkatan RM384.50 juta (851.0%) berbanding kelulusan asal berjumlah RM45.18 juta. Ini disebabkan oleh peningkatan caj kewangan kepada RM378.25 juta berbanding RM22.29 juta. Butiran lanjut seperti dalam **Jadual 18.**

JADUAL 18
PRESTASI PERBELANJAAN BAGI PROJEK LOT 61 BANGSAR
SETAKAT 31 OKTOBER 2025

BUTIRAN	PERUNTUKAN DILULUSKAN		PERBELANJAAN SEBENAR	PENINGKATAN KOS
	08.03.2016	27.09.2017		
	RM (Juta)	RM (Juta)	RM (Juta)	RM (Juta)
Menara 1	215.36	226.44	-	-
Menara 2	101.02	-	-	-
TLK Menara 1	-	218.38	362.73	144.35
TLK Menara 2				
TLK Menara 3				
Kos Infra	28.14	60.00*	8.03	-
Kos Perunding	47.89	63.39	38.40	-
KOS PEMBINAAN	392.41	568.21	409.16	159.05
KOS UMUM	45.18	TM	429.68	384.50
KOS PENTADBIRAN	TM	TM	42.81	42.81
JUMLAH KOS KESELURUHAN	437.59	568.21	881.65	-

Sumber: Minit Mesyuarat Lembaga Pengarah Bil. 1/2016 dan Bil. 2/2017

Nota: (*) – termasuk kos pembinaan *Underpass Tunnel*

(TM) – tiada maklumat dinyatakan dalam Minit Mesyuarat Lembaga Pengarah

Maklum balas PHB yang diterima pada 10 Disember 2025 dan 8 Januari 2026

Peningkatan kos pembinaan berpunca daripada peluasan skop projek, ketidakstabilan pasaran bahan binaan, serta kenaikan kos umum dan caj kewangan akibat lanjutan tempoh pelaksanaan. Bagi menangani impak ini, PHB sedang melaksanakan Kajian Kemungkinan Menyeluruh (*Comprehensive Feasibility Study*) Lot 61 Bangsar yang merangkumi semakan semula kos, penstrukturan skop, serta penilaian daya maju kewangan untuk membentuk Pelan Pembangunan Strategik yang lebih mampan. Walaupun kekal dengan mandat pembangunan, PHB akan lebih berhati-hati dalam mengurus risiko projek secara langsung dan mula memberi tumpuan kepada perolehan aset siap bina yang menawarkan pulangan lebih pantas. Hasil kajian dan hala tuju baharu ini disasarkan untuk pembentangan dan kelulusan Lembaga Pengarah selewat-lewatnya pada September 2026.

Pendapat Audit

Kelemahan dalam perancangan dan pelaksanaan projek pembangunan Lot 61 Bangsar menyebabkan projek lewat disiapkan, peningkatan kos dan kegagalan mendapatkan CCC. Kegagalan mendapatkan CCC menyebabkan TLK yang telah siap dibina tidak dapat beroperasi bagi memberi pulangan pelaburan kepada PHB. Peningkatan ketara kos pembinaan TLK dan kos umum khususnya caj kewangan yang melebihi peruntukan asal menunjukkan bahawa kos projek tidak

dirancang dan dipantau dengan berkesan. Selain itu, baki peruntukan yang tidak mencukupi untuk menampung kerja pembinaan utama iaitu Menara 1 dan *Underpass Tunnel* menimbulkan risiko terhadap kesinambungan dan penyempurnaan projek mengikut skop yang diluluskan.

5.4. Prestasi Kewangan Kumpulan PHB


5.4.1. Penyata Kewangan Beraudit Kumpulan PHB bagi tahun 2021, 2022, 2023 dan 2024 telah diaudit oleh Tetuan Ernst & Young PLT dan telah diberi pendapat tanpa teguran. Pendapatan dan perbelanjaan utama didapati selaras dengan aktivitinya sebagai syarikat dalam sektor perkhidmatan dan terlibat dalam pelaburan hartanah, terutamanya hartanah komersial yang telah siap dibina serta pemerolehan tanah kosong yang berpotensi untuk dibangunkan.

5.4.2. Analisis Audit terhadap Penyata Kewangan Beraudit bagi tahun berakhir 31 Disember 2024 mendapati Kumpulan PHB mencatatkan keuntungan terkumpul berjumlah RM3.249 bilion. Keuntungan terkumpul Kumpulan PHB meningkat secara berterusan dari tahun 2021 hingga 2024, iaitu daripada RM3.066 bilion (2021) kepada RM3.249 bilion (2024). Peningkatan keuntungan terkumpul pada tahun 2024 berbanding tahun 2023 antaranya disumbangkan oleh peningkatan dalam pendapatan operasi berjumlah RM68.36 juta (17.3%) dan peningkatan nilai saksama hartanah berjumlah RM65.34 juta (63.6%).

5.4.3. Analisis trend untung rugi menunjukkan Kumpulan PHB merekodkan trend penurunan keuntungan selepas cukai bagi tempoh tahun 2021 hingga 2023. Bagaimanapun, keuntungan sebelum cukai meningkat pada tahun 2024 menjadi RM117.24 juta berbanding RM31.75 juta pada tahun 2023. Maklumat lanjut adalah seperti dalam **Carta 2** dan **Carta 3**.


5.4.4. Semakin lanjut mendapati antara sebab penurunan keuntungan selepas cukai adalah kenaikan kos perkhidmatan dan kos kewangan. Peningkatan kos perkhidmatan pada tahun 2022 adalah disebabkan oleh pelaksanaan semula kerja penyenggaraan tahun 2020 dan 2021 yang ditangguhkan berikutan pandemik Covid-19. Bagi tahun 2023 pula, kenaikan kos disebabkan oleh PHB perlu menanggung kos operasi dan penyenggaraan bagi dua bangunan yang telah tamat tempoh Pulangan Sewa Terjamin (Guaranteed Rental Return) iaitu NU Empire dan Menara Hextar.

CARTA 2
TREND KEUNTUNGAN SELEPAS CUKAI, PENDAPATAN DAN PERBELANJAAN
KUMPULAN PHB BAGI TEMPOH TAHUN 2021 HINGGA 2024



Sumber: Penyata Kewangan Beraudit Kumpulan PHB bagi tahun 2021 hingga 2024

CARTA 3
TREND KEUNTUNGAN SELEPAS CUKAI DAN KEUNTUNGAN TERKUMPUL
KUMPULAN PHB BAGI TEMPOH TAHUN 2021 HINGGA 2024



Sumber: Penyata Kewangan Beraudit Kumpulan PHB bagi tahun 2021 hingga 2024

5.4.5. Analisis nisbah aset kepada liabiliti mendapati jumlah aset melebihi liabiliti bagi tempoh tahun 2021 hingga 2024 pada kadar 1.45 hingga 1.55. Keadaan ini menunjukkan tahap kemampuan syarikat bagi memenuhi obligasi jangka panjang. Maklumat lanjut adalah seperti dalam **Jadual 19**.

JADUAL 19
ANALISIS NISBAH KEWANGAN KUMPULAN PHB
BAGI TEMPOH TAHUN 2021 HINGGA 2024

BUTIRAN	2021	2022	2023	2024
	(RM Juta)			
Jumlah Aset	14,277.88	15,348.28	15,715.21	16,794.40
Jumlah Liabiliti	9,211.80	10,248.31	10,583.50	11,545.44
ASET – LIABILITI	5,066.08	5,099.97	5,131.71	5,248.96
NISBAH ASET KEPADA LIABILITI	1.55	1.50	1.48	1.45

Sumber: Penyata Kewangan Beraudit Kumpulan PHB bagi tahun 2021 hingga 2024

5.4.6. Bagi tempoh tahun 2011 hingga 2024, Kerajaan telah menyalurkan peruntukan pembangunan berjumlah RM1.270 bilion. Semakan Audit mendapati sejumlah RM590 juta telah dibelanjakan untuk perolehan enam bangunan siap dibina manakala sejumlah RM680 juta telah digunakan untuk membiayai tujuh projek pembangunan.

**Pendapat
Audit**

Secara keseluruhannya, kedudukan kewangan Kumpulan PHB bagi tempoh tahun 2021 hingga 2024 menunjukkan prestasi yang positif dengan peningkatan keuntungan selepas cukai dan keuntungan terkumpul pada tahun 2024. Jumlah aset yang konsisten melebihi liabiliti menunjukkan PHB mampu memenuhi obligasi kewangannya.

5.5. Tatakelola Syarikat

Pengauditan terhadap aspek tatakelola syarikat telah dilaksanakan bagi menilai tahap pematuhan PHB terhadap prinsip tatakelola yang ditetapkan merangkumi keberkesanan dan kepimpinan Lembaga Pengarah; keberkesanan Audit, pengurusan risiko dan kawalan dalaman; integriti dalam pelaporan korporat dan hubungan dengan pemegang taruh; serta kemampunan dan tanggungjawab korporat. Penilaian ini dibuat berasaskan Arahan Yang Amat Berhormat Perdana Menteri No. 1 Tahun 2023 Siri 1 No.1 Tahun 2024 – Gerakan Pemantapan Tatakelola Nasional bagi Syarikat Berkepentingan Kerajaan dan Syarikat Berhad Menurut Jaminan (Arahan YAB PM 2024), Malaysian Code on Corporate Governance (MCCG) 2021 dan OECD Guideline on Corporate Governance of State-Owned Enterprise 2024. Semakan Audit mendapati secara keseluruhannya PHB menunjukkan pematuhan yang baik terhadap amalan tatakelola yang ditetapkan. Bagaimanapun, Elemen 1 berkaitan keberkesanan dan kepimpinan Lembaga Pengarah memerlukan perhatian dan penambahbaikan. Rumusan bagi setiap elemen seperti dalam **Jadual 20**.

JADUAL 20
PENEMUAN AUDIT ASPEK TATAKELOLA SYARIKAT

ELEMEN DINILAI	KRITERIA / RUJUKAN	PENEMUAN AUDIT	IMPLIKASI
1. Keberkesanan dan Kepimpinan Lembaga Pengarah			
Pengerusi; Lembaga Pengarah; Setiausaha Syarikat; Ketua Pegawai Eksekutif (KPE); Jawatankuasa Berkaitan; Pelan Strategik/KPI dan Prosedur Operasi Standard (SOP)	Perenggan 2.1. Terma Rujukan (TOR) Lembaga Pengarah PHB menetapkan Lembaga Pengarah PHB hendaklah dianggotai oleh seorang Pengerusi; Pengarah Urusan/KPE PHB; tiga orang wakil yang mewakili Kerajaan; dan dua orang wakil daripada sektor swasta	Penetapan bilangan Lembaga Pengarah dalam TOR tidak selaras dengan Perlembagaan Syarikat. Setakat 31 Oktober 2025, hanya seorang wakil Kerajaan dilantik daripada tujuh ahli Lembaga Pengarah	Ketidakpatuhan terhadap TOR boleh menjejaskan pematuhan kuorum Mesyuarat Lembaga Pengarah sekiranya wakil Kerajaan yang ada tidak dapat hadir.
2. Keberkesanan Audit, Pengurusan Risiko dan Kawalan Dalam			
Jawatankuasa Audit, Risiko dan Integriti (BARIC) serta Audit Dalam	MCCG 2021	PHB telah menubuhkan BARIC serta Audit Dalam dengan peranan dan tanggungjawab yang diperincikan dengan jelas	Tadbir urus korporat dan perlindungan kepentingan pemegang saham dapat dilaksanakan dengan lebih berkesan.
3. Integriti dalam Pelaporan Korporat dan Hubungan dengan Pemegang Taruh			
Penyediaan Penyata Kewangan Beraudit dan laporan tahunan	Akta Syarikat 2016 dan Amalan Pelaporan Korporat, MCCG 2021	Berdasarkan Penyata Kewangan Beraudit Kumpulan PHB bagi tahun 2021 hingga 2024, didapati pelaporan telah dibuat secara konsisten dan merangkumi maklumat operasi, pelaburan serta prestasi kewangan	Penyampaian maklumat yang telus dan menyeluruh kepada pihak berkepentingan dapat dipastikan.
4. Kemampanan dan Tanggungjawab Korporat			
Amalan kelestarian dan tanggungjawab sosial korporat	OECD Guideline on Corporate Governance of State-Owned Enterprise 2024	PHB telah menyediakan peruntukan dan melaksanakan program tanggungjawab sosial korporat serta pemuliharaan alam sekitar bagi tempoh 2021 hingga 2024	Menunjukkan komitmen berterusan syarikat terhadap aspek sosial dan alam sekitar selaras dengan amalan kemampanan yang baik.

Sumber: Jabatan Audit Negara

Maklum balas PHB yang diterima pada 10 Disember 2025 dan 8 Januari 2026

Pelantikan wakil Kerajaan adalah di bawah bidang kuasa Kementerian Kewangan, dan pihak Kementerian hanya menghantar seorang wakil untuk menganggotai Lembaga Pengarah PHB. Bagi memastikan kelancaran mesyuarat dan pematuhan kuorum, PHB akan memastikan setiap Mesyuarat Lembaga Pengarah dijadualkan setelah mendapat pengesahan kehadiran wakil Kerajaan. Selain itu, TOR Lembaga Pengarah akan dipinda supaya lebih fleksibel, iaitu bilangan wakil Kerajaan akan bergantung kepada pelantikan oleh pihak Kerajaan dan menjalankan semakan menyeluruh agar ia selaras dengan peraturan, amalan tadbir urus dan kehendak semasa.

**Pendapat
Audit**

Secara keseluruhannya, tadbir urus korporat PHB berada pada tahap baik dan selaras dengan amalan terbaik sektor awam dan korporat. Bagaimanapun, pihak Syarikat perlu mengambil tindakan pembetulan terhadap ketidakselarasan komposisi Lembaga Pengarah bagi memastikan pematuhan sepenuhnya terhadap keperluan Terma Rujukan dan memperkukuh integriti struktur tadbir urus.

6. RUMUSAN AUDIT

Secara keseluruhannya, PHB telah melaksanakan mandat penubuhannya untuk memperkasa penyertaan Bumiputera dalam pemilikan hartanah komersial melalui AHB dan aktiviti utama PHB juga telah dilaksanakan selaras dengan objektif penubuhannya. Kedudukan kewangan Kumpulan PHB juga menunjukkan prestasi positif dengan peningkatan keuntungan dan keupayaan aset melebihi liabiliti. Bagaimanapun, terdapat kelemahan pengurusan projek pembangunan hartanah di Mayang Mall dan Lot 61 Bangsar yang telah menyebabkan projek lewat disiapkan, peningkatan kos dan kegagalan mendapatkan CCC. PHB mengamalkan tadbir urus korporat yang baik namun terdapat ketidakselarasan komposisi Lembaga Pengarah berbanding ketetapan Piagam Lembaga Pengarah.

7. SYOR AUDIT

Pihak yang berkepentingan iaitu Kementerian Kawal Selia (JPM), Lembaga Pengarah dan Pengurusan PHB diminta untuk mempertimbangkan syor berikut:

7.1 mengambil tindakan segera dan berkesan bagi menangani aset yang berprestasi rendah agar dapat mencapai tahap pulangan dan kadar penghunian yang optimum;

7.2. memastikan tindakan terhadap penyewa yang ingkar selaras dengan peruntukan perjanjian dan SOP. Pemantauan berstruktur terhadap penyewa yang mempunyai tunggakan melebihi 180 hari perlu dipertingkat melalui pelaksanaan tindakan undang-undang, pelan pembayaran atau rujukan kepada agensi kutipan secara lebih tegas dan konsisten;

7.3. hala tuju projek Lot 61 Bangsar perlu dimuktamadkan dan dibentangkan kepada Lembaga Pengarah bagi mengelakkan isu kelewatan berpanjangan, peningkatan kos, dan kegagalan mendapatkan CCC yang menjejaskan pengoperasian tempat letak kereta bagi tujuan penjana hasil awal;

7.4. meminda Perlembagaan Syarikat Subsidiari serta menambah baik struktur *Novation Agreement* dengan memasukkan klausa pengekalan kuasa substantif yang secara nyata mengikat keputusan subsidiari kepada kelulusan Lembaga Pengarah PHB; dan

7.5. mengambil tindakan pembetulan terhadap ketidakselarasan komposisi Lembaga Pengarah dengan melantik wakil daripada JPM bagi memastikan pematuhan sepenuhnya terhadap keperluan Terma Rujukan dan memperkukuh integriti tadbir urus syarikat.

BAHAGIAN IV

**STATUS TINDAKAN BAGI ISU YANG DILAPORKAN
DALAM LAPORAN KETUA AUDIT NEGARA BAGI
AKTIVITI KEMENTERIAN/JABATAN DAN SYARIKAT
KERAJAAN PERSEKUTUAN**

- **KEDUDUKAN SETAKAT 31 DISEMBER 2025**

JABATAN AUDIT NEGARA

120 TAHUN
1805 - 2025

STATUS TINDAKAN BAGI ISU YANG DILAPORKAN DALAM LAPORAN KETUA AUDIT NEGARA BAGI KEMENTERIAN/JABATAN DAN SYARIKAT KERAJAAN PERSEKUTUAN

- KEDUDUKAN SETAKAT 31 DISEMBER 2025

1.1. Pindaan Akta Audit 1957 [*Akta 62*] yang telah diluluskan di Parlimen telah memperluas dan memberi kuasa kepada Ketua Audit Negara untuk melaksanakan susulan audit bagi mengkaji semula tindakan yang telah diambil oleh Persekutuan, Negeri, Pihak Berkuasa Awam atau badan yang ditentukan terhadap apa-apa syor, ulasan atau pandangan yang dibuat oleh Ketua Audit Negara dalam Laporan Ketua Audit Negara (LKAN).

1.2. Bagi tujuan tersebut, Papan Pemuka Dalam Talian Ketua Audit Negara (Auditor General's Dashboard [*AGD*]) telah dibangunkan dan diperkasakan untuk mempercepatkan penyelesaian isu Audit yang dibangkitkan dalam LKAN oleh jabatan/agensi dan syarikat Kerajaan Negeri. Ia sekali gus dapat memperbaiki prestasi tadbir urus penyampaian sektor awam secara keseluruhannya.

1.3. Susulan Audit melalui sistem AGD adalah sebagaimana yang diperuntukkan di bawah seksyen 9A Akta 62 dan pelaporan mengenai status susulan dalam LKAN adalah dibuat di bawah subseksyen 9(8) Akta 62 yang memperuntukkan "walau apa pun peruntukan seksyen ini, Ketua Audit Negara boleh pada bila-bila masa mengemukakan laporan kepada Yang di-Pertuan Agong mengenai apa-apa perkara yang berbangkit daripada pelaksanaan mana-mana tugasnya atau perjalanan mana-mana kuasanya di bawah Akta ini atau di bawah mana-mana undang-undang bertulis, dan boleh mengemukakan satu salinan mana-mana laporan sedemikian kepada Raja atau Yang di-Pertua Negeri sesuatu Negeri atau kepada seseorang Menteri".

1.4. Impak kepada susulan audit ini, Kerajaan telah berjaya mengutip hasil dan mendapat bayaran balik berjumlah RM316.68 juta, antaranya melalui tuntutan penalti, sewa tertunggak, kutipan Liquidated Ascertained Damages (LAD), tunggakan pajakan tanah, kutipan duti dan cukai. Daripada jumlah tersebut, sejumlah RM221.52 juta adalah daripada Kementerian/Jabatan Kerajaan Persekutuan dan Syarikat Kerajaan Persekutuan manakala selebihnya sejumlah RM95.16 juta daripada Kerajaan Negeri/Jabatan /Agensi Negeri.

1.5. Portal AGD boleh diakses oleh orang awam untuk mengetahui **status tindakan bagi isu LKAN secara masa nyata (real time)**. Setiap isu dikategorikan mengikut tiga warna ikon lampu isyarat lalu lintas iaitu **Merah (tiada maklum balas atau maklum balas tidak menjawab isu yang dibangkitkan), Kuning (dalam tindakan) dan Hijau (tindakan telah selesai diambil)**.

1.6. Susulan Audit secara dalam talian melalui sistem AGD membantu memastikan isu Audit dan syor berkaitan dengan isu yang dilaporkan, disusul dan tindakan penambahbaikan diambil oleh jabatan/agensi dan syarikat Kerajaan Negeri. Susulan yang dilaksanakan adalah turut berdasarkan piawaian pengauditan antarabangsa yang dikeluarkan oleh The International Organization of Supreme Audit Institutions (INTOSAI). Perenggan 42, International Standards of Supreme Audit Institutions (ISSAI) 300 menyatakan "Auditors should follow up previous audit findings and recommendations wherever appropriate. Follow-up should be reported appropriately in order to provide feedback to the legislature together, if possible, with the conclusions and impacts of all relevant corrective actions".

1.7. Setakat 31 Disember 2025, sejumlah 286 (5.0%) daripada 5,686 isu yang masih Dalam Tindakan adalah melibatkan LKAN Tahun 2016 hingga LKAN 3/2025. Butiran terperinci dan kedudukan terkini isu yang berstatus Dalam Tindakan bagi Kementerian/Jabatan Kerajaan Persekutuan dan Syarikat Kerajaan Persekutuan boleh diakses melalui sistem AGD menggunakan QR Code seperti berikut:



Nota : Maklumat yang dipaparkan semasa imbasan melalui QR Code adalah yang terkini.

1.8. Kementerian/Jabatan Kerajaan Persekutuan dan Syarikat Kerajaan Persekutuan adalah disyorkan untuk terus komited melaksanakan tindakan penambahbaikan. JAN sedang menyusul isu yang belum selesai sehingga tindakan korektif dan penambahbaikan yang bersesuaian diambil. Status bagi tindakan tersebut boleh diakses oleh pihak awam melalui portal AGD.

PENUTUP

JABATAN AUDIT NEGARA

120
1906 - 2026
TAHUN

PENUTUP

1. Secara keseluruhan, pelaksanaan Program R&D&C&I menunjukkan prestasi Perbelanjaan Kasar R&D (GERD) dan pelaksanaan projek yang rendah serta wujud kelemahan tadbir urus dan pemantauan telah menjejaskan keberkesanan program walaupun peruntukan signifikan dilaburkan oleh Kerajaan untuk memperkukuh ekosistem R&D&C&I. Antara isu yang dikenal pasti adalah baki geran penyelidikan yang tidak dipulangkan bagi projek telah siap atau ditamatkan; ketidakpatuhan terhadap syarat perjanjian/garis panduan; peruntukan R&D&C&I digunakan untuk perbelanjaan mengurus dan prototaip projek tidak dapat dikesan.
2. Selain itu, terdapat juga kelemahan dalam perbelanjaan dan kawalan dalaman semasa pelaksanaan awal Projek MyDID di bawah pengurusan MIMOS. Struktur tadbir urus projek tidak berfungsi sebagaimana yang ditetapkan.
3. Pengauditan melalui Sistem e-SelfAudit terhadap 641 syarikat Kerajaan Persekutuan pada tahun 2025 mendapati empat syarikat aktif telah menjalankan aktiviti yang tidak selaras dengan objektif penubuhan syarikat. Enam syarikat tidak mematuhi perlembagaan syarikat dalam aspek keanggotaan lembaga pengarah, 52 syarikat tidak melantik sekurang-kurangnya satu pertiga Pengarah Bebas manakala 113 syarikat tidak melantik Pengarah Bebas dalam Lembaga Pengarah seperti mana Arahan YAB Perdana Menteri. Sebanyak 13 syarikat MKD tidak mengisytiharkan dividen walaupun mencatatkan keuntungan pada tahun 2022 dan 2023 serta berada dalam kedudukan solven. Selain itu, 141 syarikat mempunyai isu usaha berterusan (going concern), di mana sembilan daripadanya menerima sokongan kewangan daripada Kerajaan Persekutuan berjumlah RM1.997 bilion pada tahun 2023. Di samping itu, 62 syarikat telah berstatus dormant melebihi tempoh lima tahun dengan perbelanjaan statutori dan perbelanjaan lain berjumlah RM92.06 juta tahun 2022 dan 2023.
4. Pengauditan terhadap Pelaburan Hartanah Berhad (PHB) mendapati dua projek pembangunan lewat disiapkan yang memberi kesan peningkatan kos berjumlah RM587.82 juta. Selain itu, terdapat tunggakan sewa bangunan yang tinggi berjumlah RM79.90 juta pada tahun 2024 dan *due diligence* tidak dilaksanakan sepenuhnya menyebabkan kadar penghunian tidak mencapai sasaran.
5. Pemantauan yang berterusan di semua peringkat Kementerian/ Jabatan/ agensi serta badan lain termasuk syarikat Kerajaan perlu diberi perhatian serius untuk memantapkan pengurusan kewangan. Penyediaan prosedur kerja yang jelas, pemahaman dan pematuhan kepada peraturan kewangan serta penyeliaan rapi terhadap tugas pegawai akan mewujudkan amalan dan budaya kerja yang berkualiti dan berintegriti.

6. Sehubungan dengan itu, pihak Audit mengesyorkan tindakan seperti berikut diambil:

- a. Penyelarasan secara berpusat bagi ekosistem R&D&C&I wajar dilaksanakan, bagi memastikan penyeragaman dan pengukuhan aktiviti penyelidikan dapat dilaksanakan dalam memperkukuh tahap pencapaian dan keberkesanan R&D&C&I secara keseluruhan. Reformasi struktur diperlukan meliputi aspek kawalan kewangan, pembangunan garis panduan, pematuhan perjanjian, pengurusan fasiliti dan aset R&D serta penilaian impak projek agar objektif strategik negara dalam inovasi dan teknologi tinggi dapat dicapai menjelang tahun 2030.
- b. Memantapkan tadbir urus Geran Pembangunan Projek MyDID bagi memastikan semua perbelanjaan projek dilaksanakan dengan kelulusan Jawatankuasa yang berkaitan serta mematuhi struktur kos dan tujuan peruntukan yang telah diluluskan. Ini bagi memperkukuh tadbir urus korporat, meningkatkan keberkesanan penggunaan geran pembangunan dan memastikan tujuan asal geran tercapai.
- c. Meningkatkan amalan tatakelola yang baik dan memantau serta menilai prestasi pengurusan kewangan syarikat-syarikat Kerajaan Persekutuan bagi memastikan syarikat mencapai objektif penubuhan yang ditetapkan, mengurangkan kebergantungan kepada sokongan induk atau pemegang saham, menjana keuntungan dan pulangan dividen kepada Kerajaan Persekutuan. Selain itu, perhatian juga perlu diberikan bagi menilai semula hala tuju syarikat berstatus dormant dalam tempoh lima tahun atau lebih bagi mengurangkan kos pentadbiran dan pematuhan statutori yang perlu ditanggung oleh syarikat.
- d. Pengurusan dan Lembaga Pengarah PHB perlu memuktamadkan hala tuju projek pembangunan yang masih belum disiapkan bagi mengelakkan isu kelewatan berpanjangan yang menyebabkan peningkatan kos serta mengambil tindakan terhadap penyewa yang mempunyai tunggakan melebihi 180 hari sama ada melalui pelaksanaan tindakan undang-undang, pelan pembayaran atau rujukan kepada agensi kutipan secara lebih tegas dan konsisten.

'Audit Berkualiti Meningkatkan Akauntabiliti'

Ketua Audit Negara

Putrajaya

30 Januari 2026

AKRONIM DAN SINGKATAN

JABATAN AUDIT NEGARA

120 TAHUN
1901 - 2021

AKRONIM DAN SINGKATAN

ABT	Akaun Belum Terima
ADO	Pindaan Perintah Pembangunan (Amendment Development Order)
AHB	Amanah Hartanah Bumiputera
ALP	Ahli Lembaga Pengarah
AM	Pengurusan Aset (Asset Management)
AMIC	<i>Aerospace Malaysia Innovation Centre</i>
AP	Arahan Perbendaharaan
APK	Arahan Perubahan Kerja
APP	Agensi Pelaksana dan Pemantau
ASEAN	<i>Association of Southeast Asian Nations</i>
BARIC	Jawatankuasa Audit, Risiko dan Integriti (Board Audit, Risk and Integrity Committee)
BBP	Badan Berkanun Persekutuan
BERD	<i>Business Expenditure on Research and Development</i>
BP	Pelan Bangunan
BSM	Bahagian Sekuriti Makanan
CA	<i>Certificate Authority</i>
CCC	Sijil Perakuan Penyiapan dan Pematuhan (Certificate of Completion and Compliance)
CFSB	Cradle Fund Sdn. Bhd.
CIP	<i>Cradle Investment Programme</i>
CLBG	Syarikat Berhad Menurut Jaminan (Company Limited by Guarantee)
CLBS	Syarikat Berhad Menurut Syer (Company Limited by Shares)
CNC	Perakuan Tidak Siap Kerja (Certificate of Non-Completion)
COVID-19	<i>Coronavirus Disease 2019</i>
CPC	Perakuan Siap Kerja (Certificate of Practical Completion)
DBKL	Dewan Bandaraya Kuala Lumpur
DO	Perintah Pembangunan (Development Order)
DPF	Dana Pembangunan Fundamental
DSTIN	Dasar Sains, Teknologi dan Inovasi Negara

EOT	Lanjutan Masa (Extension of Time)
EPU	Unit Perancang Ekonomi (The Economic Planning Unit)
FELDA	Lembaga Kemajuan Tanah Persekutuan (Federal Land Development Authority)
FKE	Fakulti Kejuruteraan Elektrik
FRIM	Institut Penyelidikan Perhutanan Malaysia (Forest Research Institute Malaysia)
FST	Fakulti Sains dan Teknologi
GERD	<i>Government Expenditure on Research and Development</i>
GII	<i>Global Innovation Index</i>
GREEN BOOK	<i>The Green Book – Enhancing Board Effectiveness, GLC Transformation Programme 2006</i>
GRR	<i>Guaranteed Rental Return</i>
ICC	<i>Innovation and Commercialisation Centre</i>
ICT	<i>Information and Communication Technology</i>
IDN	Identiti Digital Nasional
iGFMS	<i>Integrated Government Financial Management Application System</i>
IMR	Institut Penyelidikan Perubatan (Institute for Medical Research)
IP	Harta Intelek (Intellectual Property)
IPC	<i>Interim Payment Certificate</i>
IPS	<i>Investment Policy Statements</i>
IPT	Institut Pengajian Tinggi
IPTA	Institut Pengajian Tinggi Awam
IPTS	Institut Pengajian Tinggi Swasta
JAN	Jabatan Audit Negara
JKA	Jawatankuasa Audit
JKP	Jawatankuasa Pemandu
JKR	Jabatan Kerja Raya
JKT	Jawatankuasa Teknikal
JPDN	Jawatankuasa Pengurusan Baki Dana Penyelidikan
JPM	Jabatan Perdana Menteri
JPN	Jabatan Pendaftaran Negara
JPT	Jabatan Pendidikan Tinggi
JTKK	Jawatankuasa Teknikal Kajian Kebolegunaan Kanabis dan Ketum
JTPK	Jawatankuasa Tindakan Pembangunan Kementerian

KAA	Fokus Utama Audit (Key Audit Area)
KDN	Kementerian Dalam Negeri
KDNK	Keluaran Dalam Negeri Kasar
KE	Kementerian Ekonomi
KM	Kebenaran Merancang
KPI	Petunjuk Prestasi Utama (Key Performance Indicator)
KPKM	Kementerian Pertanian dan Keterjaminan Makanan
KPT	Kementerian Pendidikan Tinggi
KRA	Bidang Keberhasilan Utama (Key Result Area)
KSU	Ketua Setiausaha
L&E	<i>Loss and Expenses</i>
LAD	Ganti Rugi Tertentu dan Ditetapkan (Liquidated and Ascertained Damages)
LOA	<i>Limits of Authority</i>
M&E	Mekanikal dan Elektrikal
MARDI	Institut Penyelidikan dan Kemajuan Pertanian Malaysia
MCCG	Kod Tadbir Urus Korporat Malaysia (Malaysian Code on Corporate Governance)
MDA	Pihak Berkuasa Peranti Perubatan Malaysia (Medical Device Authority)
MDV	<i>Malaysia Debt Ventures Berhad</i>
MESTECC	Kementerian Tenaga, Sains, Teknologi, Alam Sekitar dan Perubahan Iklim (Ministry of Energy, Science, Technology, Environment and Climate Change)
MFRS	<i>Malaysian Financial Reporting Standards</i>
MIDA	Lembaga Pembangunan Pelaburan Malaysia (Malaysian Investment Development Authority)
MIDF	<i>Malaysian Industrial Development Finance Berhad</i>
MIMOS	MIMOS Berhad
MITI	Kementerian Pelaburan, Perdagangan dan Industri (Ministry of Investment, Trade and Industry)
MKD	Menteri Kewangan (Diperbadankan)
MKD HANDBOOK	Garis Panduan Ahli Lembaga Pengarah Lantikan Menteri Kewangan
MKN	Majlis Keselamatan Negara
MOF	Kementerian Kewangan (Ministry of Finance)
MOSTI	Kementerian Sains, Teknologi dan Inovasi (Ministry of Science, Technology and Innovation)

MPC	Perbadanan Produktiviti Malaysia (Malaysia Productivity Corporation)
MPERS	<i>Malaysia Private Entities Reporting Standard</i>
MTEN	Majlis Tindakan Ekonomi Negara
MYDIDSB	MyDigital ID Sdn. Bhd.
MyIPO	Perbadanan Harta Intelek Malaysia (Intellectual Property Corporation of Malaysia)
MyProjek	Instrumen Pengurusan Projek
NACSA	Agensi Keselamatan Siber Negara (National Cyber Security Agency)
NIBM	Institut Bioteknologi Kebangsaan Malaysia
NMB	NanoMalaysia Berhad
NOC	<i>Notice of Change</i>
NSC	<i>Nominated Subcontractor</i>
NSFE	<i>National Scientific Facilities and Equipment</i>
OE	Belanja Mengurus (Operation Expenditure)
OECD	<i>Organisation for Economic Co-operation and Development</i>
OPM	<i>Outsourced Property Manager</i>
PB	Kelulusan Jabatan Bomba dan Penyelamat
PBT	Pihak Berkuasa Tempatan
PEMACU	Program Dana Pemacu Teknologi Strategik
PETRONAS	Petroleum Nasional Berhad
PHB	Pelaburan Hartanah Berhad
PHBAM	PHB Asset Management Berhad
PHBPV	PHB Property Venture Sdn. Bhd.
PKP	Perintah Kawalan Pergerakan
PMC	Perunding Pengurusan Projek
POD	<i>Proof of Debt</i>
PPD	Pelan Pelaksanaan Dasar
PPU	Pusat Pencawang Utama
PPUN	Pemulihan, Pemuliharaan, Ubahsuai dan Naiktaraf
Projek MyDID	Projek Pembangunan MyDigital ID
PTJ	Pusat Tanggungjawab
R&D	Penyelidikan dan Pembangunan (Research and Development)
R&D&C&I	Penyelidikan, Pembangunan, Pengkomersialan & Inovasi (Research, Development Commercialization and Innovation)

RM	Ringgit Malaysia
RMC	Pusat Pengurusan Penyelidikan (Research Management Centre)
RMK13	Rancangan Malaysia Ketiga Belas
RMKe-11	Rancangan Malaysia Kesebelas
RMKe-12	Rancangan Malaysia Kedua Belas
RMU	Unit Pengurusan Penyelidikan (Research Management Unit)
RU	<i>Research University</i>
SA	<i>Supplementary Agreement</i>
SARS	<i>Severe Acute Respiratory Syndrome</i>
SBK	Syarikat Berkepentingan Kerajaan
SBMJ	Syarikat Berhad Menurut Jaminan
SBMS	Syarikat Berhad Menurut Syer
SDG	<i>Sustainable Development Goals</i>
Sdn. Bhd.	Sendirian Berhad
SIRIM	<i>Standard and Industrial Research Institute of Malaysia</i>
SOP	Prosedur Operasi Standard (Standard Operating Procedure)
SPRM	Suruhanjaya Pencegahan Rasuah Malaysia
SPV	Syarikat Bertujuan Khas (Special Purpose Vehicle)
SRF	Dana Penyelidikan Strategik
SRF-APP	Dana Penyelidikan Strategik MOSTI oleh Agensi Pelaksana dan Pemantau
SSM	Suruhanjaya Syarikat Malaysia
SST	Surat Setuju Terima
STI	Sains, Teknologi dan Inovasi
STIE	Sains, Teknologi, Inovasi dan Ekonomi
TLK	Tempat Letak Kereta
TOR	Terma Rujukan (Term of Reference)
TRL	Tahap Kesiediaan Teknologi (Technology Readiness Level)
UKM	Universiti Kebangsaan Malaysia
UM	Universiti Malaya
UMT	Universiti Malaysia Terengganu
UNITEN	Universiti Tenaga Nasional
UPM	Universiti Putra Malaysia

UPSI	Universiti Pendidikan Sultan Idris
USM	Universiti Sains Malaysia
UTAR	Universiti Tunku Abdul Rahman
UTM	Universiti Teknologi Malaysia
VO	Arahan Perubahan Kerja (Variation Order)
WIPO	<i>World Intellectual Property Organization</i>
WP	Pengurusan Wang Awam
WRM	Wang Rezab MARDI
YAB	Yang Amat Berhormat
YPB	Yayasan Pelaburan Bumiputera

JABATAN AUDIT NEGARA

Aras 1-9, Blok F2 & F3, Kompleks F, Lebuhr Perdana Timur, Presint 1
Pusat Pentadbiran Kerajaan Persekutuan
62000 Putrajaya



www.audit.gov.my